

Maracopa Jesocristo tahimari dsodo inajaro

Marcos

Maracopa jodiiodeni, odsa panani Jerosarecca madija. Pohnuapa Jesocca dodosse jararaha Jesocca dodosse Pedro huatimade tojajari. Pedrodosa ccaridsadsa Jesocca ima tohuattajari quinahi nade. Dsotodepa Pablo, Bernabedenidsa Jeso tahimari maride ccaridsajari.

Maraco dsodo inajaropi: Jesopa madija bedissa naha tossonaraha pohnuapa Dio Bedi. Najaro ima madija mittamanahijine dsodo inajaro. Jodio quejena-jarajarideni Jeso tahimari mittamanahijine pohnuadenidsa dsodo inajaro.

**Huano Baotistapa dsama
huamonihuaji madija mari
icanabaquujari**

*Mateo 3.1-12; Roca 3.1-9;
Huano 1.19-28*

1 ¹Ajjjaro ima bicanipi Dio Bedi
^{*}Jesocristo tahimari icassiejera-
nijinecca. Pohnuapa tahimari madija
huapimadsa tojaridsanijine ajima
najaro: ²Maittaccadsama Dio Pohnuapa
Bedidsa huati tapojarissa najaro
Pohnuapa Atti cacomerabote Isahia
dsodo inajaro. Dio Attipa:

–Tahide titahimari tohuaccade
madija ojaria titedsejema
dosse onapohuitohui.

Nahi mittamanadsa madija
bodidenipa titohui
najoramanapohuijine, onajaro
–napohui nade Dio.

³ –Najarina dsama huamoni
ssono caji, siba caji tanihuaji
madidsapa

atti mohui taha madija huahua
huahua ihinajonabaquui
nahitohui.

Pohnuapa attipa: “¡Ia Medsedede
ccajonabote nahi!
¡Tinajoramanaji!

¡Pohnuapa tedsejema jahui
tijinedeni tobicapoji!
Najaroa aji tibodideni
pohnuatohui tinajoramanaji”
nanaja nahitohui dsama
huamonihuaji madijaripa
–napohui nade Dio.

⁴Najarina aja madija oni ^{*}Huanopa
dsama huamoni ssono caji, siba caji
tanihuaji madija maride tojajari-
paja. Pohnuadsa: Baotista, quiquina-
najari. (Ettidsapi: Totopade, ina-
jaro.) Pohnuapa attipa: –¡Ticcadeni
imasiri tineboridsamanaji! –nana-
ridsa najari. –Tibodideni ajima
tiquinaji: “Occa imasiri onebona.
Jidapapi Diotohuira odsanapona”
tiquinaji. Nadsana ^{*}totopa



ticajiridsamanaji. Nema tiquina-
dsapi Dio ticcadeni imasiridsa:
“Epeje, ohuati ajimani” nahijine
–nahi nade Huano. ⁵Madija
huapima Huano atti mittamana-
hijine jahijonana canajaridenipa
odsa panani *Jerosarecca, Jodeacca
dsamadsa madiridsamanajarideni
huapima bacco bacco najonamana-
jari. Poccadeni imasiri Diodsa
ecomeramanadsapi Huanopa hueni
Jordaodsa topa topa ihidsanabaqqi
najari.

⁶Nadsama Huanopa dsama
huamonihuaji madidsapa pocca
eteropi camello cone ba nani ssequi
nadsa huedsajari. Pocca ssoquepi
bani etero. Pohua taparipa sese,
dsamacca jidsi oquine najari.

⁷Huano mari icanabaquidsa
ajijaro ima huati tajari: –Madija

dacorajaripa ccajonabote nahi.
Ohuapi tahide mari mari onapo-
raha aja dsotodecca mamaride
ccajonajarina deni tojajari. Ohuapi
ajimani ojani. Pina pocca medessa
onanijinepi opajira-jerani. Pohua
amoricca sadaria diccade naqui
opajira-jerani. ⁸Ohuapi passodsa
tiadeni topa odsanabaqqijaro.
Naraha aja ccajonabote najarina
Dio Corime tibodidenidsa madi-
hijine tiadenidsa inanaridsahitohui
–nahi nade Huano.

Jeso totopa cajjaricca ima

Mateo 3.13-17; Roca 3.21-22

⁹Nadsapa Jeso dsama arobeni
onini Carireacca odsa Nasareti-
dsa madiraha hueni Jordaohuaji
qquedsippajari. Bacco dsippa-
dsapa Huano Jeso topa idsanajari.

¹⁰Nadsa Jeso passodsa totehema-
dsa tocattamacossa nanaja meme
tohuaba najaro. Dio Corime ahuato
taha pina midsorissa naha Jeso-
huaji ccaronajari. ¹¹Bacco narona-
dsapa memehuaji atti mittaronajari:
—Tiapi occa ejedeni. Tiadsa ohuati
huana tajaro. Ticca ima bica tajaro-
jine ohuatidsejaro —nahi nade Dio.

**Jeso imasiri inananijine Satana
nattome inaraha jehe najarajari**

Mateo 4.1-11; Roca 4.1-13

¹²Huano Jeso topa idsanaha jica-
dsapa Dio Corime Jeso iaquemora-
jari, dsama huamoni ssono caji, siba
caji tanihuaji madihijine. ¹³Jeso
madihi inoridsapa bani huadi
tahicca caji tajari. Nahidsa Jeso
huada 40 naha madidsana imasiri
totonanade *Satanapa Jeso nattome
inajari. Pohuapa Jeso imasiri inana-
nijine dissera taraha Jesopa Satana
attidsa jehe najarajari. Nadsapa Dio-
cca dodosse tabaqqi memehuaicca
Jeso acco icamamanajari.

**Jesopa Carireahuaji maride
tojapojari**

Mateo 4.12-17; Roca 4.14-15

¹⁴Naraha Huano Baotista toponi
cocorodsa coro idsimamanahi
nattipa Jeso dsama arobeni Carirea-
huaji toccanijari. Nahihuaji Dio-
cca ima bicani icassiejeranijinecca
mari icanabaqqi-ridsajari. ¹⁵Pohua
attipa: —Jidapapi *Diocca cacahuehe
iadsa bacco najonabote nani. Pina
Dio huati tapohuissa najaro. Ticca-
deni ima Diodsa tecomeranadsa
ticcadeni imasiri tinebomanaji. Dio-
tohuira tidsanapomanaji. Diocca ima
bicani ticassiejeranijineccadsara jehe
tiqinannya taji —nahi nade Jeso.

**Jesopa aba cocorodedeni 4
quinaha huahua inabaqqijari**

Mateo 4.18-22

¹⁶Jeso Carireacca coridsa inidi
toccabacossadsa *Ssino, pohua
ohuaha Adiri tedseje qqii ina-
baqqijari. Pohuadenipa aba
cocorodedeni. Aba corode toque-
jenaraha Jeso bacco najonajari.
¹⁷Pohuadenidsa huati tajari: —Jina,
ohuadsa ticadaridsaji, ohuatimade
tiquejenadsapi tiadeni onahatta-
baqquinijine. Tahidepi abadsa
tidsepedeni ijimanaporaha jidapapi
madija ohuadsa toquejenahijinena
tidsepedeni ijimanitohui, onajaro
—najari Jeso. ¹⁸Najaro ima mitta-
mananaja poccadeni tajapa icanebo-
manadsa Jesodsa tohuedajari.

¹⁹Nadsapa denima jai tojabacossa-
naja Jesopa Sebedeo bedideni
Satiaco, pohua imecote Huano
tedseje qqii inabaqqijari. Pocca-
deni tajapa ssequinimade canoadsa
jassi dsajari. ²⁰Nadsapa Satiaco
Huano tedseje Jeso huahua ina-
baqqijari. Najarideni naco ama-
dsati poccadeni abi Sebedeo,
pocca tatarabaidsadedeni tedseje
canoadsa jassi dsadsa inebobaqqi-
manajari. Nadsapa Satiaco, Huano
tedseje Jesodsa tohuedajari.

**Satanacca dodosse tocorime
madija bodidsa madidsajari**

Roca 4.31-37

²¹Nadsama Jesopa pohua
huatimadedeni tedseje Capernaon-
huaji bacco toquinajari. Nahidsa
*jassinajacca huadadsa Dio Atti
mamarihuaji jai tojedsimadsa
Jesopa madija mari icanabaqqi-
jari. ²²Nadsa mittamanadsapa:

—A, pocca marinaja bica taha
 —quinahi nade. Jeso pocca
 marinaja mari icanabaquidsapa
 pohuana nahatojide rajari, atti caji
 tajaria. Aja jodiodenicca marinaja
 maridedeni attissa najarajari.
²³Nadsapa Dio Atti mamarihuaji
 madija pohua bodidsa *Satanacca
 dodosse tocorime cajijari naco
 huittarijari. Jeso qqui tadsapa
 pohua bodiccajine jadsirema atti
 atti najari: ²⁴—¡Nasaretihuajicca
 Jeso! ¿Nejecotohuira ticcajonajaro?
 ¿Icca ima tinajicanijine ticcajona-
 jaroqui? Ticca ima nahato onani.
 Tiapi Diocca Ejedeni Bicabote tijani
 —nahi nade.

²⁵Naraha joma nahijine Jesopa
 atti dadoradsa huati tajari: —¡Epeje!
 ¡Didi taji! ¡Najari madijadsa tiqqe-
 naji! —najari. ²⁶Nadsapa tocorime-
 jine najari madija tohuedimadsapa
 pitora pitora najari. Nadsapa
 jadsirema johua johua nadsapa
 pohua bodicca qquenajari.
²⁷Nadsapa qqui toquinajaridenia
 huajo caniredsapa: —A ¿nejecoma
 najari? —naridsamanahi nade.
 —Jesocca marinaja pina dsatissa
 naha. A, atti cajidsa dosse imaha
 —quinajari. —Tocorime cajijari
 pohua bodicca Jeso attidsa ibora
 taha —quinahi nade. ²⁸Nadsapi
 Jesocca ima amadsati tojaribaqqui-
 jaro. Carireacca dsama pohuadeni
 inoricca huajirema nahicca madi-
 ridsamanajarideni naco pohua tahi-
 mari mittaridsamanajari.

**Jesopa Ssino-Pedro massodini
 inanomijaro**

Mateo 8.14-15; Roca 4.38-39

²⁹Nadsapa nani jodiodenicca Dio
 Atti mamarihuaji jahininedsapa

Jeso, Satiaco, Huano quinadsa
 Ssino, Adiridenicca odsahuaji jai
 tojedsimajari. ³⁰Nanidsapi Ssino
 massodini coma tehe, huapini
 ppocorehe pori canajaro. Naraha
 nahidsa jai tojedsimadsapa ama-
 dsati ponicca dsamacoma tahi-
 marini Jesodsa huati toquinajari.
³¹Nadsapa Jeso ponidsa tohuajire-
 ssidsa dsapani equidi, joca imadsapi
 huapini tonahuihui najaro. Tonomi-
 dsapi pohuadeni inajipabaqquijari.

**Jesopa comaquiri najarideni
 inanomi-ridsabaqquijari**

Mateo 8.16-17; Roca 4.40-41

³²Nadsapa maji tonahuidsapa
 madija comaquiri najarideni,
 aja madija bodidenidsa Satanacca
 dodosse tocorime cajimanajari-
 deni naco eccajonabaqquijari nade.
³³Nadsapa nahicca madija huapima
 madiridsamanajarideni Ssino, Adiri-
 denicca odsacca noccobijidsa queri-
 qqumanajari. ³⁴Naraha Jesopa
 comaquiri najarideni huapima
 comani onihini onihini cajiridsamana-
 raha inanomibaqquijari. Tocorime
 huapi taha naco dosse ininebaqqui-
 jari. Pohuadenipa Jesodsa nahato-
 qqui naraha Jeso pohua tahimari
 ecomeramananjine jipera tadsapa
 didi inanabaqquijari.

**Jesopa Dio Atti mamari
 caji taridsajaro huaji mari
 icanabaqqui-ridsajaricca ima**

Mateo 4.23; Roca 4.42-44

³⁵Nadsapa ssiajaricossadsa
 Jeso totehema, odsa pananidsa
 toqquenadsapa madija madide
 nohuerahihuaji toccajari, Diodsa
 huati tahijine. ³⁶Dsotodena Ssino-
 Pedro pohua tessedeni tedseje

Jesotohui qqui naridsamanajari.

³⁷Bacco quinadsapa: –Huapima tia qquide jahijonapomapaja –quinahi nade. ³⁸Naraha pohuadenidsa huati tajari: –Jina, odsa onihihuaajina jajjana. Odsa onihicca, odsa onihi-cca mari ocanabaqqui-ridsahijine occaronajarode –nahi nade Jeso.

³⁹Nadsapa dsama Carireahuaji ccaridsa ccaridsa naridsajari. Nani *Isaraeri potemahi jodiodenicca Dio Atti mamari onihi onihi naridsa-nihuaajicca mari icanabaqqui-ridsajari. Madija bodicca tocorime qqenaridsahijine naco dosse dosse ihinineridsa najari nade.

Huapi jadsimarojari Jeso inanomijari

Mateo 8.2-4; Roca 5.12-16

⁴⁰Nadsapa madija dsamacoma onini *leprajine huapi jadsimarohi Jesodsa ccasonajari. Pohua bodipa: –Jesopa deni tojahi, ohuapi ajimani ojani –nadsa Jeso baccohuaji pohua pitodsa huitta nadsa Jesodsa huati tajari: –Ohua Medsede, ohuapi bica onejeraraha tia jipa tinadsapi ohua tinanabicanijine nahato tinani –najari.

⁴¹Nadsapa Jeso pohua bodidsa: –Tohuati nahana tahi –nadsa pohua dsepedsa bara inadsa: –Jehe, jipa onani. Tibicaji –najari.

⁴²Nanaja amadsati pohua huapicca tomossissi nadsapa tobicajari.

⁴³Nadsapa Jeso pohua dosse inajari. Pohua tobicahicca ima madija ohuahadenidsa huati naridsa-jarahijine naco pohuadsa huati tajari.

⁴⁴Jeso attipa: –Aji tibicanicca ima madijadenidsa huati taridsa tejerana –najari. –Naraha *Diodsa dada toqqumahuaajina ticcaji,

onajaro. Nanidsa tiqquedsimadsapi dada toqqumade ojariadsara tepi tobicani tia nohue tinaji. Nadsapi Diodsa ticca ima bica tejeranicca toppineradsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana. Pina Moisesicca marinajadsa iboraqquri inajarossa tinanaji, onajaro. Nadsapi huapimadsa ticca ima toppinerani ahuato tadsapi: “Pajissa tibicajaro” quinahijine, onajaro –nahi nade Jeso. ⁴⁵Naraha aja tobicajaripa toccajari, Jeso pohua inanabicahi tahimari huati naridsajari. Najarojine Jeso pocca nomietohui madija disseraqquri nadsapa odsa panani onihi, onihidsa totoqquedsima najarajari Jeso, pohua qqui toquinahi noppine. Nama nadsapa madija madide nohuerahihuaajina ccaridsa ccaridsa najari. Naraha madija huapimapa nama naha pohuatohui quinadsapa jajahi toja najari pocca nomietohui.

Jesopa madija ssomi tojahi inabiquemanijari

Mateo 9.1-8; Roca 5.17-26

2 ¹Nahidsa Jesopa madi madi nanaja odsa panani Capernaohuaji toccanipomadsapa bacco tanijari. Nadsapa madija: –Jeso odsadsa bacco nanihi –quinahi ima mittaridsamanajari. ²Nadsapa pohuatohui queriquimanadsa poccadeni odsa boronima, odsa bodima ijiridsa najari. Nadsapa Jeso Dio Atti mari icanabaqquijari. ³Nadsapa madija ide tone biqueradsa isso ssomi tojahipa pohua taborodsa dsojo icanajonamanajari. Pohua tesse ahuaji pama, ahuaji

pama najonamanahi nade. ⁴Naraha madija siba tadsapa Jeso bacco quinahijine pajirama-jaradsa odsa tetepihuajina iaccamaromana-jari. Jeso huedsahi tetepidsa odsa icatabojidsamanajaro. Nahidsana madija ssomi tojahi pohua tabordsa poridsa odsa bodihuaji tappa icanaronamanajari. ⁵Jeso pohua-tohui dissessera tahi qqui tadsapa pohua bodidsa nahato tajari: –Pajissa, Jesopa madija inanomihijine nahato tahi –quinahi Jeso pohuadsa ahualo tadsapi coma tajaridsa huati tajari: –Otesse, aji imasiri tinanajaro huapimapi onanamossini. Jidapapi ticca ima Diodsa tobicani –nahi nade Jeso.

⁶Naraha nahidsa jodiodenicca marinaja maridedeni naco jassi tariridsajari. Pohuadeni bodipa: ⁷–Apaja, Jesopa: “Imasiri onanamossina” naha. Pohua attipa: “Ohuapi pina Dio ojani” nanaja najarissa naha. ¡Jesocca imapi bica tejerani! ¡Pina Dio itamassojarissa nahi! Naraha Dio Pohuana ojarijari imasiri inanamossinijine –quinahi nade jodiodenicca marinaja maridedeni. ⁸Nama quinaraha Jesopa pohuadeni bodidenicca ima nahato tadsapa pohuadenidsa huati tajari: –¿Nejecotohui tibodidenidsa nema tiquinajaro? –najari. ⁹–Jari, tibodideni huatomamanaji ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabichahina ¿denima najora tajarorane? ¹⁰Aji ohua *Madija Bedi ojaropi tiadenidsa occa ima ahualo onanana. Madija-ccca imasiri onanamossinijine Diocca

dacorehe ocajini. Aji namidsa naqui ohuatti ocajini nahatoqquiri tiquinanijinepi coma tajaridsa huati onana –najari Jeso. ¹¹Nadsapa madija ssomi tojahidsa huati tajari: –Tiadsa huati onadsa: ¡Titehemaji! ¡Titaboro tididsa ticca odsahuaji ticcaniji! –nahi nade Jeso.

¹²Nadsapa totehema, madija huapima cattomama canaraha amadsati pohua taboro idi nadsa pocca odsahuaji toccanijari. Nadsapa madija huapima cappinamanaraha huatidsemanadsapa: –A, ¡Diojine bica tani! –quinajari. –Nema nani qqui qqui inejerraccede –quinajari.

Jesopa Rebidsa huahua najaricca ima

Mateo 9.9-13; Roca 5.27-32

¹³Jeso coma tajari inabiquemanihi nattipa coridsa poni huapihuaji toquedsippapomajari. Madija sibema pohuadsa queriquimanadsapa mari icanabaquijari. ¹⁴Nahidsa Jeso denima toccadsapa madija oni Rebi qqui inajari. Najaripa Arapeo bedi. Pohuapa romanodenicca taminecca dosseniji dsiniro ihinaccamana nanihuajicca odsa bedeni bodidsa huittidsajari. Nadsapa Jeso pohuadsa huati tajari: –Jina, ohuadsa ticcaji –nadsa Jesodsa toccajari.

¹⁵Nahi dsotodepa Rebi tadsarihuaji Jeso tedseje jipacquimanahijine madija huapi taha huahuanaridsa jassi nahuajanijari. Nahidsapa *romanodenicca taminecca dosseniji dsiniro nanaccadeni, jodiodenicca marinaja ecahuamana-jerajarodeni naco Jeso pohua huatimadenidsama jassi nahuajanijari. Najarideni Jesodsa

jahiridsajaripa huapi tahi. ¹⁶Naraha jodiodenicca marinaja marideni, *marinaja pariseodsa jehe quinajaridenipa madija bicaquiri najarajarideni Jeso tedseje jipamanahi qqui toquinajari. Najaro imadsa jiperaquiri nadsapa Jeso huatimadedenidsa atti atti quinajari: –A ζnejecotohui tia maridepa romanodenicca taminecca dosseniji dsiniro nanaccadedeni tedseje, imasiri cajimanajarideni tedseje jipajari? –quinajari nade. (Aja madija nama najarideni tedsejapa jipade *oppina tani quiquinajari.)

¹⁷Naraha Jeso pohuadeni attendeni mittadsa manaco Jeso huati tajari: –Nomiquire najaridenipa toponi totonanomide tohuini quina-jararaha comaquiri najaridenina toponi totonanomide tohuini quiquinajari. Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode. Naraha madijapa: “Tapi bicaquiri inani” quiquinajaridenicca ima onanabicanijine occajona-jerajaro. Imasiri totonanadedenicca ima onanabicanijinena occajonajaro –nahi nade Jeso.

**Jesodsa jipehe nebocossanicca
ima huati toquinajari**

Mateo 9.14-17; Roca 5.33-39


¹⁸Huano Baotistacca mamari tabaqqi jipehe nebocossamana, jodiodeni marinaja pariseodsa jehe quinajarideni naco jipehe nebocossamana najari, Diodsara huati huati dsanapomanahijine. Nadsapa madija Jesohuaji bacco najonamanadsapa pohuadsa huati toquinajari: –Huano Baotista pocca

mamari tabaqqi tedseje jipehe nebocossamanajari. Pariseodenicca *mamari tabaqqi naco jipehe nebocossamanaraha ζnejecotohui ticca mamari tabaqqia jipehe nebocossamanaha najarahi? –quinahi nade.

¹⁹Nadsapa Jeso pohuadenidsa huati tajari: –Dsabissopa amoneje cajibote najari pocca ejete tojadsapi ζpohuadsa queriquimanajarideni jipehe nebocossamana taco? Nebocossamana-jarahi –nahi nade. –Dsabisso cajibote najari tedseje huatidsemanadsapa jipehe nebocossamana-jarajari. ²⁰Naraha nidsa huada onihicadsa dsabisso cajibote najari iaccamanadsapa pohua tessedenipa jipehe nebocossamanahitohui –nahi nade Jeso. (Aja pohua atti nama najaripa pohuapa pina dsabisso cajibote najari. Pohua huatimadedeni jipehe nenebocossamana najarajari, najari.)

²¹–Ima onihina naqui ajima najaro: Etero ssessequidenipi etero jadanidsapi etero dsati ihibedsacossamana nejerajaro. Etero dsati etero jadanidsa podsacossadsa dsotode ssahua nadsapi joca naqqi tani. Nadsapi etero jadani sseo tapomadsapi denima totabaccora tani –nahi nade. (Aja pohua atti nama najaripa pocca marinaja pina jodiodenicca marinajassa nejerani. Jeso pocca marinajapi dsati.)

²²–Ima onihina naqui ajima najaro: Uva ppejene nahatodsati bani etero ssequi nahi jadahidsa sso sso ihidsamana najarajari. Uva ppejene nahatodsati bani etero jadahidsa sso todsadsa ssicatsadapa jocaquera tajarijine sseo tahi caji tahi. Sseo tadsapa uva



ppejene sso taha jica tahi, dsamine naco totabaccoradsapa coro quina tahi. Nadsama uva ppejene dsatipa bani etero ssequi nahi dsatidsara sso sso totods najari –nahi nade Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

**Jassinajacca huadadsa Jeso
huatimadedenipa aroso
jidsadsa trigo bono pore
dsanapomanajari**

Mateo 12.1-8; Roca 6.1-5

²³Nadsapa dsotode naco *jassinajacca huadadsa Jeso pohua huatimadedeni tedseje huidsaja nocconi motta jai tojeqqimajari. Jai tojeqqimadsapa aroso jidsadsa trigo bono pore ippimanadsa apa dsanapomanajari. ²⁴Naraha jodiodeni marinaja pariseodsas jehe quinajarideni qqui toquinadsapa pohuadenidsa bica tejeradsa Jeso-dsa huati toquinajari: –¡Ajana! Tetimadedenipa huidsajacca bono pore quinadsapa pina jassinajacca huada jerajarodsas dsepedeni ijimanajarissa quinaha. Jassinajacca huadadsapi idsepe ijiniijine *oppina taraha –quinajari.

²⁵Naraha Jeso pohuadenidsa huati tajari: –¿Naraha tiadenipi aji Dio Atti maittaccadsama dsodo naniccadsa Dabicca ima hua hua

titiquina naraha tetideni ajimanajarorane? Najaro imapi Dabipa pohua tessedeni tedseje dsamatapa cappiramanadsa pemimanadsapa pan Diodsa da tahicca oppina taraha jipamanajari. ²⁶Aja maittaccadsama Diodsa dada toqqimadedenicca tamine deni tojajari onipa Abiata madidsa nahihuaji Dabi toqquedsimadsa pan tohui huati tajari. Pan ohuaha nohueradsa Diodsa da tahiccaraha Dabi jipajari, pohua tessedenidsa naco da inabaquidsa jipamanajari. Najari pan Diodsa da tahipa dada toqquima cacahuadedenira jijipamana najariraha Dabideni pemimanadsa jipamanajari oppinera tahi –nahi nade Jeso.

²⁷Naraha Jesopa denima pohuadenidsa huati huati dsanapojari: –Dio madija inahatobaqquijaripa jassinajacca huada madija inapajiramananissa tanijine inahatobaqquijarajari. Diopa jassinajacca huada tahimarini huati tapojaripa jassinajacca huadapi madijadsa bica tanijinena huati tapojari –nahi nade. ²⁸–Ohua Madija Bedi oजारona jassinajacca huada jinede ojani. Jassinajacca ima cacahuadepe ohuana paji –nahi nade Jeso.

Madija dsepe siricca ima

Mateo 12.9-14; Roca 6.6-11

3 ¹Naraha Dio Atti mamarihuaji Jeso toqquedsimani-pomadsapa madija dsepe siri naco nahidsa huittaritari. ²Nadsama jodiodeni marinaja pariseodsas jehe quinajaridenipa Jeso inoccodsamanajari. Jesopa jassinajacca huadadsa madija inanomibacquidsapa pohuadenidsa pina jassinajacca huada jerajarodsas

pohua dsepe ijjarissa najari, quina-jari. Pohuadeni bodipa: –Jidapana jassinajacca huadadsa ajari dsepe siri inanomidsapa Jesodsa ima inahananijine –quinajari. ³Naraha Jesopa dsepe siridsa huahua najari: –Titehemadsa ahuaji ticcajonaji –najari. ⁴Nadsapa dsepe siri ccajonadsa Jesopa madija huapimadsa huati tajari: –Jari, Moisesicca marinaja, icca madijacca marinaja naqui nahatoqquiri tiquinadsapi ohuatti tecomeramanaji. Jassinajacca huadasapi ζnejecoma najaro ima inananina “Bica tani” tiquinajaro? Jassinajacca huadadsa madija inabica-baqquidsa “Oppina tani” ζtiquinajaroqqui? Madija inajidsobaqquidsana “Bica tajaro” ζtiquinajarorane? –najari. –Jassinajacca huadadsa naco ijine madija tossiajadsa ζoppina taqui? “Paja dsoqquerina” ζtiquinajarorane? –najari. Naraha pohuadeni cacomamanajari. Nahatoqquiri naraha cappinamanadsa joma quinajari. ⁵Nadsapa Jeso madija huapima jassi nahuajanijari icahadi-baqquidsa noccodeni icattabaqqui najari. Nadsapa pohua bodi ojijari, huaribodeni sibaqquiri nadsa. Nadsapa dsepe siridsa: –Jari, tidsepe ohuahuaaji da ticanajonaji –nahi nade. Nadsa pohua dsepe pohuahuaaji da icanadsapi tocanomijaro. ⁶Naraha pariseodeni jai tojenadsapa tamine Herodecca madija tedseje queriqquimanajari. Nahidsa ima idimamanajaro, Jeso dsoqquehijine.

Madija huapi taha Jesotohui jahimissajari

Mateo 12.15-16; Roca 6.17-19

⁷Nadsapa Jeso pohua huatimadenima coridsahuaji jai

tojedsippajari. Aja dsama arobeni Carireahuajicca madija naco huapi taha Jesodsa jahimissajari. ⁸Madija ohuahadeni naco Jesocca ima mittamanadsa pohua canahatoriri canahi qquide tohuini quinadsa Jesotohui jahimissassa canajari. Madija huapi taha jahijonana canajari. Dsama arobeni Jodeahuajicca, odsa panani Jerosarehuajicca, dsama arobeni Idomeahuajicca, hueni Jordao jippehuajicca, odsa panani Tirohuajicca, odsa panani Sidohuajicca madija naco jahijonana canajari. ⁹Nadsapa madija si tocajajari canadsapa Jeso pohua huatimadedenidsa huati tajari: –Canoa qqui ticanamanaji. Nidsa nanidsa oqquedsanijine. Madija huapi taha jahijonahi ia mere inamanarana –nahi nade. ¹⁰Aja comaqquiri najari inanomibaqquidsapo ohuaha tonomi, ohuaha tonomi naridsamanajarijine pohuadsa jahijonedsati naco Jeso bara quinahijine pohuahuaaji jo todsimahi najari.

¹¹Aja madija bodidenicca tocorime Jeso qqui toquinadsapa Jeso baccohuaji pohuadeni pitodsa jassi tadsa attideni dacoradsa johua johua quinajari: –¡Tiapi Dio Bedi tijani! –quinahi nade Jesodsa. ¹²Naraha pohua tahimari ecomamananijine Jeso atti dacoradsa huati tajari: –¡Najaro otahimari huati tiquina tejeraji! –nahi nade.

***Jeso pocca dodosse tabaqqui 12 quinajari icattejidsabaqquijari**

Mateo 10.1-4; Roca 6.12-16

¹³Jesopa coridsahuaji madija mari icanabaqquia jicadsapa ssonohuaaji

toquemorajari. Nadsapa Jeso pohua jipa tahicca madijatohui huahua inajonabaquidsapa pohuadsa queriquimanajari. ¹⁴Nadsapa 12 quinahana icattejidsabaquijari, pohua huatimade toquejenahijine. Najaridenipa Jeso dosse inabaquiridsadsa pohua tahimari maride jahiridsahijine. Nadsapa Jeso pohuadeni oni icanacanibaquijari: –Occa dodosse tabaqqi –najari. ¹⁵Pocca dacorehe pohuadenidsa inanaridsajaroa madija bodidenicca tocorimedeni dosse dosse ihininebaqqi nahijine pohuadeni inapajirabaquijari. ¹⁶Nadsama 12 quinajarideni icattejidsabaquijari onidenipa ajama quinajari: Tahidepa Ssino. Pohua oni Jesojine icanacansatipa: *Pedro, najari. ¹⁷Madija ohuaha onipa Satiaco. Pohua ohuahapa Huano. Pohuadeni pamahapa Sebedeo bedi. Najarideni pamahapa Jesojine onideni icanacansatipa: Boanereque, najari. (Ettidsapi pina: ttottorodecca madija, najari.) ¹⁸Madija ohuahadeni onideni naco Adiri, Feripe, Batorome, Mateo, Tomas quinajari. Madija ohuaha onipa Satiaco. Satiacopa Arapeo bedi. Madija ohuaha onipa Tadeo (pohua oni ohuahapa *Joda). Madija ohuaha onipa Ssino, pohuadsa: romanodeni momohuade, quiquinanajari. ¹⁹Madija ohuaha onipa *Joda Iscariote. Najaripa Jeso ccaccorade. Najarideni Jeso icattejidsa-baquijaripa 12 quinaha pohuadsa toquejenajaride.

**Jesocca dacorehe ahuato
tajaroraha pohuadsa ima
inanamanajaro**

Mateo 12.24-32;

Roca 11.14-23; 12.10

²⁰Nadsapa Jeso odsa bacco tanidsapa madija pohuadsa

toqueriquini-manapomajari. Madija pohuadsa disseraquiri nadsapa pocca mamari tabaqqi tedseje dsepedeni ijimanahissa tajari. Nama quinadsapa jipamanahijine ssamo tajari. ²¹Naraha Jeso imeni, pohua imecotedeni tedseje ima mittamanajari: –Jeso bodi tossamohui, jipa-jarahi –quinahi mittamanadsa pohua iaccanimanahijine jahijonajari.

²²Nahidsa naco odsa panani Jero sarehuajicca jodiodenicca marinaja maridedeni bacco quinajari. Najarideni attidenia: –Tocorimedenicca tamine *Beheosebopa Jeso bodidsa madidsajari. Pocca dacorehe caji-jarijinea pocca dodosse tabaqqi dosse ininebaquijaripaja –quinahi nade. Naraha maidsamanajari.

²³Nadsapa Jeso pohuadenidsa huahua najari. Pohuadeni bodi huatomanahijine ajijaro namidsa imadinicca ima huati huati tajari: –¿Satanapa pohua dosse tonine taco? Nohuerahi –nahi nade.

²⁴–Dsama huapimacca taminepa madija ecahuabaquira dsoode pocca madija cahadiremanadsa ahuaji atti ahuaji atti quinadsapa pocca cacahuehe inassamomanajaro. Nadsapa pocca madija domo tocca tahi. ²⁵Najarossa najaro odsa cajariecca madija cahadiredsapa poccadeni ima tossamodsapi tojaribaqqi tahi. ²⁶Ima najarossa najaroa Satanapa pocca dodosse tabaqqi madija bodidsa madidsamanajarideni dosse ininebaquidsapa pina pohua pocca madija tedseje cahadirejarissa najari. Nama nadsapa pocca dossehe inassamodsapi sara tabaquihitohuiraha –najari Jeso.

²⁷ –Nadsama imasiri totonanade Satanapa dacorehe cajiraha ohuapi deni ojajaro. Puhuapa ajamani pina ajijaro ima tiadenidsa huati onabote najarossa najaro. Nadsama bobotidepa: “Odsacca todseptaji obotina” najariraha odsa jinede dacorabote odsadsa madidsadsapa botihijine pajira-jarahi. Naraha bobotide denima dacoradsapa odsa jinede dama inadsa jore inaquidsapa pohua dseptaji botihijine pajirahi, onajaro. Ima najarossa najaroa aji ohua pina bobotide denima dacorajarissa onajaro. Occa dacorehe deni tojadsapi pina Satana jore onaquijarissa nadsa pocca dodosse tabaqqi dosse dosse ohoninebaqqi najaripaja –nahi nade Jeso.

²⁸ Nadsapa Jeso jodiodenicca marinaja maridedenidsa denima huati huati tajari: –Pajissara tiadenidsa huati onajaro: Madija imasiri inanamanaraha nidsa dsotode: “Icca ima inebona” quina dsapa poccadeni imasiri Diodsa ecomeramanadsa Diopa poccadeni imasiri huapima epeje inananitohui. Poccadeni tamassohue huapima naqui Dio epeje inananitohui.

²⁹ Naraha Dio Corime itamassomanadsa, pohuajine tojajarodsmaidsehe huahua quinadsa naco Diopa pohuadeni atti huati ajamarahitohui. Poccadeni imasiri epeje inana-jeranitohui. Poccadeni ima oppina tajaropi pohuadenidsa nema dsanaponitohui –nahi nade Jeso. ³⁰ Aja Jeso atti nama najaria jodiodenicca marinaja maridedeni maidsamanadsa: –Jesopa Satanacca dacorehe cajijarjine canahatoriri canaridsajari

–quinadsapa manaco Jesopa pohuadenidsa ima oppina tani huati tajari.

Jeso imeni, pohua imecotedeni

Mateo 12.46-50; Roca 8.19-21

³¹ Nadsama Jeso imeni pohua imecotedeni tedseje Jeso pohuahuari bacco toquinajari. Amossinihuaji domo huadsa huati toquinajari: –Jesodsa huahua tiquinaji –quinajari. ³² Madija Jesodsa jassi tarijari deni pohuadsa huati toquinajari: –Ticca ami, timecotedeni amossinidsa titohui domo huapaja –quinahi nade.

³³ Naraha Jeso pohua attipa: –Occa amipi ¿nejecojarona paji? Ohuemecotedeni naco ¿nejecojaridenina paja? –nahi nade.

³⁴ Nadsapa pohuadsa jassi tarijarideni icatabaqquidsapa pocca madija jararaha: –Ajjaridenina pina occa amissa, pina ohuemecotedenissa quinajari. ³⁵ Madijadenipa Dio Pohua jipa tahicca ihinanamana najarodenina pina ohuemecotedenissa quinajari. Amonejedeni naqui Dio Pohua jipa tahicca ihinanamana najarodenina pina occa amissa, pina ohuemecotedenissa quinajaro, onajaro –nahi nade Jeso.

Jesocca marinaja huidsaja ppappadecca ima tadsajani mari icanabaqqijari

Mateo 13.1-23; Roca 8.4-15

4 ¹ Jesopa coridsa inididsa maride tojapomajari. Madija ohuaha ohuaha quinaha pohuadsa toqueriqqijari. Madija pohuadsa panahicca tojadsapa Jeso coridsacca canoadsana toqqedsadsapa canoacca huihuittaridsa huittaritari.

Nadsama madijapa nahi coridsa inidicca ssiquidsa domo huajari.

²Nadsapa pohuadenidsa ima huapi tehe mari icanabaquijari. Pocca marinaja ajijaro namidsa imadinicca ima tadsajani mari icanabaquijari.

Jesocca marinajapi ajima najaro: ³ –Titaharibobo canaji. Huidsaja ppappadepa pocca huidsaja huirade toccajari. ⁴Nocco huira inaridsajari. Naraha motapa jahuihuaji catojaja najari. Nadsapa ppiriri jahironadsa amadsati saca quina-jari. ⁵Aja nocco huira naridsajari mota naco siba ccababa tanidsa catojajari. Nanidsapi ssiqui bicani badsira taraha nama naha huassinaja moro tajari. ⁶Moro taraha jabo huapihuajira toccabaquijari. Maji ccajonadsapa maji ppoconejine botejari. ⁷Nocco mota naco namidsa cotihi caji tahihuaji catojajaria cotihi tedseje paja moro toquinarihi naraha cotihijine ssomi tojajari. Nadsapa bono-jarajari. ⁸Nadsapa nocco mota huira naridsajaripa nami bicanidsa catojaridsadsapa mororo canaridsadsa bica taha napijari. Bono cajiridsadsapa ede ojariapa bono 30 naha cajijari. Ede ohuahaccapa bono 60 naha cajijari. Ede ohuahaccana 100 naha cajijari. ⁹Nadsama teribodeni ticajimana-dsapi ohuatti timittamananissa taji, onajaro –nahi nade Jeso.

**Madija motapa Jesocca
marinaja mittamana-jarajari**
Mateo 13.10-17; Roca 8.9-10

¹⁰Nadsapa madija mota jai tojaniraha madija pamaha madimanageripa Jesocca dodosse tabaqqui 12 quinajarideni tedseje Jesodsa huati

toquinajari: –Jeso, ajijaro namidsa imadinicca ima tadsajani ia mari ticanabaquijaropi ¿nejecoma najaro ticca marinaja? –quinahi nade. ¹¹Naraha Jeso pohuadenidsa huati tajari: –Jehe maittaccadsama Diocca cacahuehecca ima dsati najoraporaha madija inahattabaqqui-jaraccade. Jidapanana Diojine pocca cacahuehe tahimarini dsati tiadenidsana ahuato tani. Naraha madija motapa ajijaro namidsa imadinicca ima tadsajani pohuadeni mari ocanabaquidsapa mittamana-jarajaripaja. ¹²Nama nadsapa *Dio Atti cacomerabote Isahia dsodo inapojarossa najaro. Isahia attipa:

“Qqui qqui toquinaraha pina qqui toquirahi nahitohui. Pohuadeni bodi pina ssamoqquri najarissa nahitohui.

Diocca dosseniji mimittamana naraha pina mittamanerahi nahitohui.

Mittamana-jaradsapa bodideni naco cacajiquimeramana-jaradsapa Dio poccadeni imasiri epeje inajeranitohui”

napohui nade Isahia atti –nahi nade Jeso.

–**Huidsaja ppappadecca
imapi ajima najarona paji
–najari Jeso**
Mateo 13.18-23; Roca 8.11-15

¹³Nadsapa Jeso huati tajari: –Aji occa marinaja ajijaro namidsa imadinicca ima tadsajani tiadeni mari ocanabaquidsapi ¿timittamana-jerajaroqui? Timittamana-jeradsapi occa marinaja ¿nejecoma

najarodsana timittamananijine? onajaro – najari. ¹⁴ – Jidacca occa marinajapi ajima najaro: Huidsaja ppappadepa pina Dio Atti mamaridessa najari. Noccopa pina Dio Atti madijadsa totoja najarossa najaro. ¹⁵ Nocco huira inaridsajari mota jahuihuaji catojaripa pina madija Dio Atti mittamanaraha pohuadeni bodi iboqquiri nadsapa bodidenidsa Dio Atti toqqedsimajerarossa najaro. Aja ppiriri nocco saca inaridsajaripa pina maidsehe jinede *Satana ccajonadsa bodideni inassamobaqquijarissa najaro. Nadsapa Dio Atti pohuadenidsa nohuerajaro.

¹⁶ – Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa amadsati huatidsemanajari. ¹⁷ Pohuadenipa Diodsa jehe dsanapomanahijineraha Dio Atti pohuadeni bodidsa toja-jerajaropi pina aja siba ccababa tanidsa nocco moro taraha jabo huapihuajira toccabaqquijaricca imassa najaro. Nadsama aja maji ppoconejine botejaricca imapi Dio Attidsa jehe quinajarijine pohuadenidsa najidsohue ssonaridsa, ocasserani ahuanadsapa jehe quidsati attideni: “Epejena, Dio Attipi inebona” quinajari.

¹⁸ – Madija ohuaha bodidenicca imapi pina namidsa cotihi caji tajaricca imassa najaro. Pohuadenipa Dio Atti mittamanaraha ¹⁹ pohuadeni dsepedeni ihijimana najarotohuira disseraqquri nadsapa Dio Atti tocahaterahissa tajarajari. Dsiniro tohuira quinadsa naco najaro imajine poccadeni jeheniji maidsehe toja tani. Huapima pohuadeni tohuini quinajaricca tohuira

bodideni huatoma-manadsa naco Dio Atti huatideni ajamamanajari. Nama quinajaridenipa poccadeni jeheniji pina aja nocco moro taraha cotihijine ssomi tojadsapa bono-jarajarissa najaro. Dio Atti mittamanaraha pohuadenijine Dio Atti madija ohuahadenidsa toja-jeranitohui.

²⁰ – Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Poccadeni jeheniji napidsapi pina aja nocco nami bicanidsa moro tahissa tadsapa bono cajiijari. Ede ojariapa bono 30 naha cajiijari. Ede ohuahaccapa bono 60 naha cajiijari. Ede ohuahaccana 100 naha caji-ridsajari. Aja Diodsa jehe quinahissa tajaripa madija mari icanabaqquiridsadsapa madija ohuaha ohuaha quinaha Diodsa inanabaqqui-manahitohui – nahi nade Jeso.

Jojororo tahimari

Roca 8.16-18

²¹ Jesopa denima huati tajari: – Nadsama jojororo toquehessidsa ssapotodsa boco icanahijine ¿bica taco? Bica tajarahi. Aja jojororo toquehessidsapa huahuada dopanihuaji tocanajimahijine jarahi. Jojororo toquehessidsapa aja pohua cacahittari nahidsana cacahittari najari, nahi madija huapima ssijani cajimanahijine. ²² Nadsama jidapana ima ahuatora tanicca caji taraha nidsa dsotodepi ahuato tanitohui. Aji jidapana occa marinaja mota ahuatora tadsa timittamana-jeraraha nidsa dsotode tiadenidsa ahuato tadsana timittamananitohui, onajaro. ²³ Nadsapi teribodeni ticajimanadsapi ohuatti

timittamananissa taji, onajaro
– nahi nade Jeso.

²⁴Nadsapa huati tapomajari:
– Najaro ohuatti tibodideni huato-
nissa tadsa tecahuamanaji. Naraha
timittamananissa tejeradsapi
ticahattera-jeranitohui. Timitta-
mananissa tadsapi ticahattereje
dsanaponi nanitohui. ²⁵Aji
tiadeni ohuatti tecahuamana-
dsapi denima ticahatteranitohui.
Naraha occa marinaja timittamana-
raha ohuatti tecahuamana-jera-
dsapi occa marinaja odininitohui,
onajaro. Nadsapi tiadeni tiadenira
ticamaidsanimanadsa naqui: “Dio
Atti ocajini, nahato onani” tiquina-
raha najaro naqui odininitohui.
Paji, nemamana tejeraji, onajaro
– nahi nade Jeso.

**Diocca cacahuehepi pina
nocco moro tajarissa najaro**


²⁶Jesopa ima onihi huati tajari:
– Jehe, *Diocca cacahuehe tojaridsa-
jaropi pina ajiaro imassa najaro.
Madijapa dsamatapa nocco huira
inaridsajari. ²⁷Dsomepa huahuada
najari, ssiaja nocco tojadsapa onihi-
huaji dsepe ihiji najari. Naraha
dsamatapa noccopa pohua ehuerahi
moro moro tajari. Madijapa dsama-
tapa nocco moro inannahijine ssamo
taraha Diona nahato tajari. Dio-
jine moro moro tajari. ²⁸Jehe,
nami bica tadsa tahidepa ede napi-
jari. Dsotodepa mohue toccajari.
Dsotodepa bono cajijari. ²⁹Nadsapa
bono jadadsa jinede attipa: “Bono
jadahi pore onana” nadsa porede
toccajari. Bono pore inajari, jicadsapa
pocca odsahuaji eccanijari. Jehe, Dio-
cca cacahuehepi pina najaro imassa
najaro – nahi nade Jeso.

**Jesopa mostaza noccocca ima
tadsajani mari icanabaquijari**

Mateo 13.31-32; Roca 13.18-19

³⁰Nadsama Jeso huati tapoma-
jari: – Tibodideni huatomanaji.
¿Nejecoma najarona paji Diocca
cacahuehe? Aji Diocca cacahuehe
tahimarini timittamananijinepi
ajijaro namidsa imadinicca ima
onihidsa tiadeni mari ocana-
baquina – nahi nade Jeso. ³¹– Dio-
cca cacahuehepi pina *mostaza
noccossa najaro. Mostaza noccopa
potera tajari. Ppa nahi nocco
ohuaha naco potera tahi caji taraha
mostaza noccopa denima potera
tajari. ³²Jehe, mostaza noccopa
potera taraha ppa idsadsa napi-
dsapa huidsajacca ppa nahidsa
pohuana deni tojjari. Motaradsapa
pohua ininedsa naco ppiriri pohua-
deni tadsari eppe nahuinedsa bina
tarimana tahi. Jehe, Diocca caca-
huehecca ima mari ocanabaquijari
pina najaro imassa najaro.
Tahidepi madija pamahadsa tojapo-
jaro, dsotodena madija huapimadsa
tojaridsadsapi Diocca cacahueheda
madija tohuapihitohui – nahi nade
Jeso.

³³Jesopa pohua tahimari ajiaro
namidsa imadinicca ima onihi
onihi najaro tadsajani mari mari
ihicanabaquijari. Madija
huapimadsa huati tadsapa pohua-
deni mittamanahijine pajiraniccar
mari icanabaquijari. ³⁴Pohuadeni-
dsa huati tadsapa ajiaro namidsa
imadinicca imadsara mari mari
ihicanabaquijari. Naraha
dsotode pocca mamari tabaquijari
dsana pocca marinaja inahatta-
baquijari.



**Jesopa jojode inatappa
ssodadani inatappa
nanicca ima**

Mateo 8.18, 23-27; Roca 8.22-25

³⁵Najaro ssiajadsa maji tonahuisa Jesopa pohua huatimadedenidsa huati tajari: –Jina, coridsa jippehuaji jajiana –nahi nade.

³⁶Nadsapa pohuadsa queriqquimanajarideni inebobaquijari. Jesopa najaro canoadsa huittaridsa maride tojaraha maride jicadsa paja iaccamanarihi najari. Madija ohuahadeni naco canoa onihidsa tohuaccamissamanajari.

³⁷Jai tojadsapa jojode dacorehema ccajona, passo dacorehema ccajona nadsapi coridsa ssoda ssoda najarojine canoadsa passo ssonidsa ssonidsa najaro.

³⁸Naraha Jesopa canoa dsotoni-huaji pohua tati poponima ibemadsa tohuittamissadsa huadajonajari. Nadsapa Jeso pohuadsa huahua quinajari: –¡Ia Maride nocco tijaji! ¡Je icanabote nani! ¿Nema nehe poni ijicanijinequi? –quinajari. ³⁹Nanaja

Jeso nocco tojadsa totehemadsa jojodedsa passodsas huati tajari: –¡Epeje taji! ¡Mohua tejeraji! –nahi nade. Naneje jojode, passo ssoda ssoda najaro naqui joma najaro. Joma nadsapi passo podsippa-nissa tajaro. ⁴⁰Nadsapa pocca mamari tabaqquidsas huati tajari: –¿Nejecotohui ticappinamanajaro? Tiadenipi ohuadsa: “Jehe, Jesopa ia tohuacahua-baqquihijine pajirahi” ¿tiquinejerajarorane? –najari Jeso.

⁴¹Naraha pohuadenipa cappinamanajari. Bodideni jabojo quinadsa pohuadenira imahaha canajari: –Aja ia Maridepa ¿nejeco madija? Pohuapa jojode, passo ssodadanimas quejemas naraha jojodedsa: “Epeje taji” nadsa jojode joma naha –quinajari.

**Jerasahuajicca madija bodidsa
Satanacca dodosse tocorime
madidsajari**

Mateo 8.28-34; Roca 8.26-39

5 ¹Aja coridsa jippehuaji bacco toquinajaricca dsamas oninipi Jerasa. ²Nahidsana Jesopa

toqqemoraraha madija bodidsa
 *Satanacca dodosse tocorime madi-
 dsajari tonoccobirihuaji qqena-
 dsa Jesodsa bacco dsippajari.

³⁻⁴Pohuapa tonoccobiri caji tani-
 huaji mamadi najari. Nadsapa nahi
 Jerasahuajicca madijapa biji jore
 quinaraha joca tajojo, joca tajojo
 najari. Isso naco jore quinaraha ttai
 tajojo, ttai tajojo najari. Cadena-
 dsa naco jore quinaraha pohuajine
 tajoppi tajoppi najaro. Jore quina-
 pomadsa naco nama dsanapodsapa
 pohuaha deni tojadsanapojari. Jore
 quinadsa ecahuamanahijineraha
 jorededeni ajamani toquejena-
 dsapa paja inebomanarihi najari.

⁵Pohuapa ssiaja ccaridsa, dsome
 ccaridsa nanaridsa najari. Johua
 johua nanaridsa najari. Ssonohuaji
 ccaridsa, tonoccobirihuaji ccaridsa
 nadsapa sibadsa pohua ime ca jeo,
 ca jeo tonanamarojari. ⁶Nanaja
 Jeso huaji tanidsa qqemorahi
 qqui tadsapa joppa najonajari, Jeso
 bacchohuaji pohua pitodsa huitta
 najari. ⁷⁻⁸Naraha Jesopa amadsati
 pohua bodiccadsa huati tajari:

– ¡Tocorime, najari madija tinebojo!
 – najari. Nadsapa tocorime
 jadsirema huati tajari: – Jeso
 ¿nejecotohuira ticcajonajaroneje?
 ¿Ohua najidsode ticcajonajaroqui?
 Tiapi Dio deni tojajaricca Ejedeni
 tijani. ¡Dio onima ohua tinajidso
 tejeraji, onaha! – najari. ⁹Naraha
 Jesopa tocorimedsa huati tapoma-
 jari: – ¿Tia onipi nejeco? – najari.
 – Ohua onipi Siba tani, tocorime
 huapi inani – nahi nade.

¹⁰Nadsapa madija bodicca
 tocorimedenia Jesodsa huatide
 disseraqquri najari: – ¡Ajijaro
 dsama huaji tanihuaji ia dosse

tinabaqqi tejeraji, inaha! – quina-
 jari. ¹¹Naraha nahi ssono huajira
 tanidsa poroco huapi taha jipa-
 ridsamanajari. ¹²Nadsapa tocorime-
 deni Jesodsa huati toquinapoma-
 jari: – Poroco huapimadsana ia
 dosse tidsimabaqqiji. Nanidsana
 iquejenana – quinajari.

¹³Nadsapa Jeso: – ¡Jehe, poroco-
 dsana tiquejenana! – najari. Nadsapa
 najari madija bodicca tocorime
 jahinedsapa porocodsana jai toje-
 dsimaridsajari. Nanaja porocopa
 coridsa inidi sseberanihuaji domo
 toqquedsippadsa diri-ri-ri todsippa-
 dsapa cojo-jo-jo quinajari, tocatoje-
 dsippajari. Poroco huapimapa 2 mil
 quinajari. Coridsadsa je tocanire-
 dsapa cacotedsanajari.

¹⁴Nadsapa poroco cacahuade-
 denipa ahuajicca odsa pananihuaji
 ima joppa tocanajari, ohuahapa
 huidsajahuaji ima joppa tocanajari.
 Nama naridsamanajari. Ima inana-
 ridsamanadsapi cattade jahijonana
 canajari, madija huapima.

¹⁵Nadsapa qquide jahijonadsapa
 Jeso huahihuaji bacco najonamana-
 jari. Aja madija tocorimedeni caji-
 pojaripa tonomihira qqui toquina-
 jari. Nahidsa huitta canajari. Etero
 huedsapomajari, bodi huatohue
 naco cajipomajari. Nadsapa madija
 huapima cappinamanajari. ¹⁶Qqui
 toquinapjaridenia aja madija
 bodicca tocorimedeni jahinine-
 jari tahimari huati, poroco tahi-
 mari huati toquinajari. ¹⁷Nadsapa
 poccadeni dsamadsa Jeso toccani-
 hijine dossede dissassera tajari:
 – ¡Ticcaniji, aji icca dsamadsapi
 timadi tejeraji! – quinajari.

¹⁸Nadsapa Jeso toqquedsippi-
 dsapa canoadsa toqquedsanijari.

Nadsapa madija tocorime cajiporaha tonomijaripa Jesodsa huahua najari: –¡Ohua naqui tiadsa occana! –najari. ¹⁹Naraha Jeso attipa: –Poni, ticcaniji. Ticca odsahuaji ticca madijadsa tijaniji. Ticca madija huati tinabaquina: “Onomijaropi Diojine. Diopa ohuadsa huati huana tajari” tinanina –nahi nade Jeso.

²⁰Nadsapa toccanidsa pocca ima huati naridsajari. Dsama arobeni Decaporicca odsa huapimadsa pohua tonomihicca ima, Jeso pohua inanomihicca ima huati taridsajari. Nadsapa huapima mittamanadsapa: –A, Diojine bica taha –quinahi nade.

**Jairo bedeni tonominicca ima,
Amoneje amaissoranaja coma
taraha tonominicca ima**

Mateo 9.18-26; Roca 8.40-56

²¹Jesopa pohua huatimadeni tedseje canoadsa jippehuaji

tohuaccanimanajari. Bacco tani-manadsapa madija Jeso qquide jahidsippappa canajari. Jesopa coridsa inididsa huajari. ²²Nanaja jodiodenicca Dio Atti mamarihuajicca tamine ojaria naco ccajonajari. Pohua onipa Jairo. Jesodsa bacco najonadsapa pohua bodipa: –Jesopa deni tojahi, ohuapi ajimani ojani –nadsa Jeso baccuhuaji pohua pitodsa huitta nadsa tocattedsa najari. ²³Nadsapa Jesodsa huati tajari: –Occa ejedeni amoneje bedeni tomijirani. Jina, occa odsahuaji icadaccana. Tidsepedsa poni bara tadsa tonomidsa madipomanijine –nahi nade Jairo. ²⁴Nadsapa Jeso Jairo tedseje jahui tohuedanijari. Naraha madija huapima Jesodsa cahuaja dsanoparijine Jeso queberibote dsanopajari.

²⁵Madija huapima jai tojahidsa naqui amoneje coma tajaro



tohuanajaro. Ponipi dsamacoma onini amaissorana caji-jaro. Poni coma tanicca huajanopa 12 naraha ama jicaquera tanicca totonahana dsanapojaro. ²⁶Coma tadsa toponi totonanomidedenihuaji ponima totocca naraha tonomi-jera-jaro. Denima coma dsanapojaro. Toponi totonanomidedenidsa poni manaconi cajicarisajaro. ²⁷⁻²⁸Naraha Jeso tahimari madija huati huati toquinahi mittajaro. Nema najaroa aji Jesotohui toccajaropaji. Poni bodinipi: –Pocca eterora bara onadsapi onominitohui –najaro. Madija si tocajajari canajonaraha amoneje coma tajaropi Jeso nattihuaji toccamissadsa tohuajiressissi nadsa pocca etero bara inajaro. ²⁹Naneje amadsati amani amossi najaro. Nadsapi poni doroni comani tomossini nahato tajaro.

³⁰Nadsapa Jeso pohua bodi nahato tajari, pocca dacorehejine madija inanomijaro. Nanaja amadsati Jeso pohua nattihuaji piti nahuajanidsa huati tajari: –¿Nejecojari occa etero bara inajaroneje? –najari. ³¹Naraha pohua huatimadedeni attidenia: –Madija si tocajajari canajonajaripa. Naraha tiapi: “¿Nejecjarina ohua bara najari?” tajaro –quinahi nade. ³²Naraha Jeso pohua bara najari tohui ahuaji qqui, ahuaji qqui naridsajari. ³³Nadsapi amoneje cappinehe ccajonadsa tacacca canajonajaro. Jeso baccouhuaji poni pitonidsa huitta nadsa poni cacomerajaro: –Ojinepa –najaro. Nadsapi poni amaissorana caji-jaro Jeso pocca etero bara inadsa amadsati tomossijarocca ima huati

tajaro. ³⁴Nadsapa Jeso ponidsa huati tajari: –Jehe asi, ohuadsa tibodi: “Jehe, Jeso ohua tonanomihijine pajirahi” tadsapi najarojine ticca dsamacomapi toccapa. Ticcanidsapi ticappina tejerana. Najaro comanidsa quidsa tapomajeranitohui –najari.

³⁵Nahidsa Jeso huati huati taraha, jodiodenicca Dio Atti mamarihuajicca tamine pocca odsacca madija bacco najonamanadsa ejedeni imehidsa huati toquinajari: –Jairo, ticca ejedeni dsoqqueni. Jidapapa ia Maride ccajona-jarana. Dsoqqueni. Epejeni, poni –quina-jari. ³⁶Nama quinaraha Jesopa Jairodsa: –Tibodipi ticappina tejerana. Pina “Jehe, poni tonomijnijine” tana –nahi nade Jeso atti. ³⁷Jeso pohua natti jai tojamissajari-deni pohuadsa jai toja-jarahijine Jeso eccocobaquijari. Naraha pohuadsa jai tojahijinepa Pedro, Satiaco, Huano quina-jari. Aja Huanopa Satiaco ohuaha. Pohuadenira jina inabaquijari.

³⁸Nadsapa Jairocca odsahuaji jai toja, bacco toquinajari. Bacco toquinadsa pina mohua mohua camajarissa najari Jeso qqui tajari. –Ejedeni dsoqqueni –quinadsa jadsirema oji oji camajari, johua johua camajari. ³⁹Odsadsa toqqedsimadsapa Jeso huati tajari pohuadenidsa: –¿Nejecotohui ticcadeni ojie dacorajaro? ¿Nejecotohui johua johua ticamajaro? Ejedenipi dsoqque-jerani. Huadani –nahi nade Jeso. ⁴⁰Naraha pohuadenipa Jeso atti jaja icanamanajari.

Naraha Jesopa madija huapima dosse ininebaquijari amossinihuaji. Nadsapa Jeso, pohua

huatimadedeni, ejedeni imehi, imeni quinadsa ejedeni huatijaro porinihuaji jai tojedsimajari. ⁴¹Nadsapa Jesoa ejedeni dsapani equididsa pohua attidsa huati tajari: –Taritta ccomi –najari. (Najaro ettidsapi: –Ejedeni, titehemaji –najari.) ⁴²Naneje ejedenipi amadsati camitemanidsapi totehemajaro. Nadsapi ccaridsajaro. Huajanorini 12 najari. Najaro ejedeni ccaridsadsapi madija huapima jabojo quinaraha huatidsemanajari: –A, apaja bica tahi –quinajari. ⁴³Nadsapa Jeso atti pohuadenidsa: –Ajijaro imapi huati taridsamana tejerana. Poni –najari. Nadsapa Jeso attia: –Ticcadeni ejedeni tinajipamanaji –nahi nade Jeso.

**Jesopa Nasaretihuaji
toccanidsa mari
icanabaqquijari**

Mateo 13.53-58; Roca 4.16-30

6 ¹Nadsapa Jeso pohua madihidsa nebo pohua napihihuajina toccanijari. Pohua huatimadedenima jai tojanijari. ²Odsa panani Nasareti bacco tanidsapa jassinajacca huadadsa Dio Atti mamarihuaji toqquedsimadsa mari icanabaqquijari. Nadsapa nahicca jassi tarijarideni mittamanadsapa huajo caniredsapa: –A ¿nejecohuaji tohuattajaritta? –quinajari. –¿Nejecojaricca nahatohue Jeso-dsa tojajarotte? ¿Nejecoma nadsa madija ihinanomi najari? Pohuapa canahatoriri canahi qqui qqui ihinana-jaraccade –quinajari. ³–¿Naraha ajararipa ahua cocobadejaraco? ¿Ahua cocobadedija, Maria bedia! Pohua imecotedeni naco:

Satiaco, Dsodse, Joda, Ssino quinaripajade. ¿Pohua caripenedeni naqui aji imadinidsa madimanageraqui? Madimanani –quinahinade. Nadsapa pohua atti mittade tojiperamanajari. ⁴Nadsapa Jeso attia: –Ohuadsa pajissa tiquinejersapi pina Dio Atti cacomeraqquri najarideni tahimarissa tinanamajaro: Madija huapimapa aja Dio Atti cacomerabotedsa: “Pajissa Diocca dossenija” quiquinanaraha aja pohua dsamariccapa nama quinarahi. Pohua imecotedeni, pocca odsacca naco pohua attidsa jiperaqquri naha nama najonamanajari –nahi nade. ⁵Nadsapa nahihuajicca madija Jeso-dsa pajissa quina-jaradsapa pohua canahatohuajapohui canahicca huapi tejerani. Madija pamahara bara inabaqquidsapa inanomibaqquijari nade. ^{6a}Nadsapa pocca odsahuajicca madija jehe quina-jaradsapa Jesopa pohuadenitohui pohua bodi huato-dsanapojari.

**Jesopa pocca dodosse tabaqqui
12 quinaha madija maride
dosse inaridsabaqquijari**

Mateo 10.1-15; Roca 9.1-6

^{6b}Nadsapa odsa onihihuaji odsa onihihuaji Jesopa mari mari naridsa najari. ⁷Nadsapa pocca dodosse tabaqqui 12 quinajari huahua inabaqquidsasosse inabaqquiridsajari. Ahuajicca jahui topama, ahujicca jahui topama, ahujicca jahui topama quinhijine dosse inabaqquijari. Jesopa pocca nahatohue pohuadenidsa inaridsajaro. Madija bodidencica tocorime naco dosse inineridsa-baqquihijine pohuadeni inapajirabaqquijari. ⁸Nadsapa

benehidsa jai tojadsa pohua attissa inanamananjine Jeso pohuadeni mari icanabaquijari. Pohua attipa: –Jehe ticcadeni benehidsapi tidsepedenitaji dsojo tiquina tejeraji. Tidsepedenidsapi tiadeni totocahuejidsara dsojo dsojo tiquineri naji. Dsamatapa naco tiaccamana tajarajo. Saco naqui tiaccamana tejeraji. Dsiniro naqui tiaccamana tejeraji. ⁹ Temoridenicca sadaria naco aja tedsamanajarira ohojariri najo. Ticcadeni etero naqui pamehepi tiaccamana tejeraji, aji tedsamanajarora ohojariri tinamananaji, onajaro –nahi nade Jeso.

¹⁰ –Nadsama odsa panani onihi bacco tiquinadsapi aji ticadedsima-pojarocca odsadsara timadimanaccana. Denima ticada-jeraccadsa najaro odsadsara timadimanaccana. ¹¹ Naraha odsa pananihuaji bacco tiquinadsa madija: “Ajidsapi timadimanaji” quina-jaradsapa, aja ticcadeni marinaja mittade jiperaquiri nadsa naco najaro odsadsa ticadeqqumani bica tani. Madija nama quinahicca odsa tinebomanadsapi temoridenicca sadariadsa ssiqui ma tajaro catojanijine pporo pporo tiquinana. Nahi poccadeni ibohue bodideni huatoma-manahijine, onajaro –nahi nade Jeso.

¹² Nadsapa pocca dodosse tabaqqi jai tojajari. Madija bodideni cacajiquimera-manahijine mari icanabaquii-ridsamana-jari. Puhuadeni attipa: –Imasiri tinebomanaji. Diodsara tiquejenaji –quinahi nade. ¹³ Madija bodidenicca tocorime ohuaha ohuaha naridsajarideni naco dosse dosse ihimaridsamana najari. Madija comaquiri najarideni naco

ihinanomi-ridsabaquimana najari. Oqui badsira taha tatidenidsa sso sso ihinariridsamana nadsa Diodsa huati huati totoquina nadsapa Diojine totocanomireridsa najari.

**Huano Baotista
dsoqquehicca ima**

Mateo 14.1-12; Roca 9.7-9

¹⁴ Nadsama dsama arobeni Carireahuajicca tamine *Herodepa Jesocca ima huati toquinahi mittajari. Jeso canahatori canaridsahicca ima naqui tojaribaquije najaro. Nadsapa Herode attia: –Jesopa *Huano Baotista dsoqqueraha nahatonijari. Najaro nahatonihejine canahatori canahi –nahi nade. ¹⁵ Naraha madija ohuaha attidenipa: –Jesopa maittaccadsamacca Dio Atti cacomerabote madipojari Eria ccanipomajari itidija –quinahi nade. Madija ohuaha attideni naco: –Aja Jesopa pina maittaccadsamacca Dio Atti cacomeraquiri najaridenissa najari –quinahi nade. ¹⁶ Naraha tamine Herodepa madija nama quinahi mittaraha pohua attia: –Jesopa Huano. Nahato onani. Soldado ocadossebaqqidsa Huano matto ca ijidsamanaraha nahatonijari –nahi nade.

¹⁷⁻¹⁸ Nadsama Herode atti nama nadsa tahide pohuajine Huano Baotista inanadsoqqe-manapojari. Najaro imapi ajima najaro: Tahidepa tamine Herode pohua imecote Feripecca amoneje Herodia icajidsa ima tojajaro. Huanopa poccadeni ima mittadsa Herodedsa huati tajari: –Diocca dossenjidsapi timecotecca amoneje tidijidsadsapi bica tejerani –nanaja najari Huano. Najaro ima Herodia

mittadsapi Huanodsa huadijaro. Ponicca maququidsa dosse dosse nadsa tamine Herodepa pocca dodosse tabaqqi idossebaququidsa Huano dama quinadsa toponi cocoro todsimadsa coro idsimanajari. ¹⁹Herodiapi Huanodsa jipera tadsapi pohua inanadsoqqemanahijine tohuini nadsa maququidsa huati taraha poni attinidsa jehe najaraccahi. ²⁰Herode cappinadsa: –Huanopa bica tahi. Diocca dosseniji –nanaja nadsapa ecahuahissa tajari. Nadsapa Huanocca marinaja mittadsapa pohuadsa bica taraha ibo tadsapa: –¿Nejecoma onapadseje? –najari. Naraha nama naha Huanocca marinaja mittahijine pohuatohui huahua huahua dsanapojari.

²¹Naraha huada onihidsa tamine Herode pohua tossonahicca huada bacco tadsa ejete inajararo. Nadsapa jipacquimanahijine huahua inabaquujari, taminedeni, soldado dossededeni, Carireahuajicca ime jocohuideni, pohuadsa jipacquimanahijine. Nadsapi Herodia najorajaro ponicca ima. ²²Herodia bedenipi dsobi nanijine toqqedsimajaro. Nadsapa tamine Herode, pohua tessedeni tedseje ponicca dsobinaja bica tani qqui toquinadsa, ponijine huatidsemanadsapa dsohuatodsa tamine Herode attia: –Jari jata, ticca huatinaja ohuadsa huati tinaji. Nadsapi ticca huatinaja da onanitohui –najari. ²³–¡Pajissa! Dio nahato tahi. Tia ocamaidsajerajaro. Occa dsama arobenitohui huati tinadsa naqui tiadsa da onanitohui –nahi nade tamine Herode atti. ²⁴Najaro ima mittadsa dsohuato toqqenadsapi imenidsa

huati tajaro: –Ami ¿nejecora huati onanijine? –najaro. Nadsapi imeni attinia: –Jari jata, Huano Baotista tatitohui huati tinaji –nani nade. ²⁵Nadsapi taminehuaji huassinaja toqqedsimanidsa ponicca huatinaja huati tajaro: –Jidapanana Huano Baotista tati parato imehidsa huittidsadsa ohuadsa da ticanajo –nani nade. ²⁶Nadsapa Herode pohua bodi Huano dsoqqehijine jipera taraha pohua atti tahide: –Dio nahato tahi. Tia ocamaidsajerajaro –nanaja napodsa aja pohua tessedeni: –Pajissehe huati tajari –quinahijine tohuini nadsa: –Ohuattissa onananitohui –nahi nade. Nadsapa poni attinidsa jehe najari. ²⁷Nadsapa pocca dodosse dosse inajari, Huano matto ca ijidsadsa tati dsojo icadsimani-nijine. Nadsapa pocca dodosse toponi cocorohuaji toccajari, Huano matto ca ijidsajari. ²⁸Tati paratodsa ettidsadsa dsojo icadsimanidsapa dsohuatodsa da icanajari. Ponina imenidsa da icaniquimajari. ²⁹Dsotode Huano pohua huatimadeni ima mittamanadsapa assiretohui jahijonajari. Ppa idsamanahijine dsojo ininemanadsapa siba odinidsa ibedsamanajari.

Jeso madija 5 mil quinajarideni inajipabaquujari

Mateo 14.13-23; Roca 9.10-17;

Huano 6.1-15

³⁰Nadsama Jeso pocca dodosse tabaqqi dosse inabaquipojarideni jahiniquujari. Jesodsa poccadeni benehicca ima huati nanimanajari: –Ima bicani dsati mari icanabaqqi-ridsadija. Ticca deni tojehe iadsa tinanarajone madija coma

tajari naco inanomibaqqui-ridsadija –quinahi nade. ³¹Nahidsa pohuadeni madimanahihuaji madija Jeso tohui quinadsa jahijonana canajari. Madija caji tadsa Jeso, pohua huatimadedeni tedseje dsepedeni ijimanahissa tadsapa jipamanahijine pajiramana-jarahi. Nadsapa: –Jina, madija madide nohuerahihuaji jaijana. Nanidsana jassi inaccana –nahi nade Jeso.

³²Nama nadsapa Jeso pocca dodosse tabaqqui tedsejedeni todidi tanihuaji jassi quinahijine canoadsa tohuaccamanajari. ³³Naraha madija Jeso toccahi qqui toquinadsapa: –A, Jeso pajamarahihuaji toccahijine –quinajari. Nadsapa madija odsa onihi onihi naridsanicca jai tojabacossadsa Jeso tedsejema bacco toquinapojari. Naraha dsotode Jesopa pohua huatimadedeni tedseje canoadsa bacco najonamanajari. ³⁴Huana tocanamanadsa Jeso toqquemoradsapa madija domo hueri nahi qqui inabaqquijari. Pohuadenipa pina edede pohuadeni cacahuade jiraha pohuama mamadiri naridsamanajarissa quinajari. Nadsapa Jeso pohua bodidsa: –A, tohuati nahanaqquri nahi –nadsa pohuadenitohui huati cahanari canajari. Nadsapa pocca ima onihi onihi nehe pohuadeni mari icanabaqquijari.

³⁵Maji toccadsa pohua huatimadedeni Jeso pohuadsa huati toquinajari: –Jaho, maji toccahi –quinajari. –Ahuajipa madija madide nohuerahi –quinahi nade.

³⁶–Madija dosse tinanibaqquijo. Ahuajipa dsamatapa mitta quinahijine nohuerahi –quinajari. –Aji,

odsa huajira tanicca dsamatapa mittade jai tojanina –quinahi nade.

³⁷Naraha Jeso attia: –Tiadeni tinajipabaqquimanajo –najari. Naraha pohuadeni attipa: –Taparideni mittade jaijanijinepi dsiniro huemani pina 200 *denario icajidsana pajiraraha çiana pohuadeni taparideni mittade jaijanijinerane? –quinahi nade. ³⁸Nadsapa pohuadenidsa huati tajari: –¿Nejecoma naha pan ticajimanani? ¡Qqui taridsamanajo! –nahi nade Jeso. Pan, aba qqui toquinadsapa pohuadsa huati nanimanajari: –Pan 5, aba pama napaja –quinahi nade.

³⁹Nadsapa Jeso madija huapimadsa huati tajari: –Nani dsero napi dsati caji tanidsa tiadenira jassi jassi tineri naridsaji –najari. ⁴⁰Nadsapa madija 100 quinaha queriqquidsa jassi tajari. Madija 50 quinaha queriqquidsa jassi tajari. Ohuahadeni naco totoqueriqquiri naridsadsa jassi taridsajari. Huapima nama naridsamanajari. ⁴¹Nadsapa Jeso pohua dsepedsa pan inacca, aba idsaba nadsapa memehuaji qqui tamacossadsa Diodsa huati tajari: –Jehe, epejeni. Ticca daniji iadsa bica tahi –najari. Nadsapa Jeso canahatori canajarijine pan, aba najari tohuapidsa icanabobiridsadsapa pohua huatimadedenidsa da inabaqquijari. Nadsapa pohuadenina madija jassi jassi teri najaridenidsa da inabaqqui-ridsamanajari. ⁴²Nadsapa jipamanadsapa accaridsa-manajari. ⁴³Jipamanahissa taraha mota tojajari. Pan bobi, aba ime mota inaccaniridsa-manadsapa quiqui 12 naha ijiridsajari. ⁴⁴Nadsama pan jipamanajaridenipa maqquideje 5 mil quinajari.

**Jeso passo tetepi
ccajonajaricca ima**

Mateo 14.22-33; Huano 6.16-21

⁴⁵Nadsapa canahatori canahicca pan jipamanahi nattipa Jeso pohua huatimadedeni coridsa jippehuaji dosse inabaquipojari: –Jari, canoadsa jai tijedsadsapi tahide odsa panani Besaidahuaji jai tijapoji, onajaro –nahi nade. Naraha Jeso pohuapa ibocajari. Nadsapa madija huapimadsa naco huati tajari: –Epejeni, jai tjanina –nahi nade Jeso. ⁴⁶Nadsa

jai tojanidsapa Jesopa ssonohuaji denima toqqemorajari, imehi Diodsa huati tahijine. ⁴⁷Jeso pohua motta nahi ssonohuaji Diodsa huatide tojadsa cadsomejari. Naraha pohua huatimadedenipa coridsa nocconi ori toquinahi paja naccaraha. ⁴⁸Nahidsa Jeso qqui icanamissabaquijari. Ori ori quinaraha jodejine canoa quehenacossajaro. Ssajaricossadsa Jeso toqqedsippanidsapa passo tetepi toccamissajari. Pina ssiqui toccajarissa najari. Pohuadeni natti toccamissajari, pohuadeni inori



tossoniquimahitohuiraha. ⁴⁹Pohuadeni inorihuaji qqui toquina-naja passo tetepi ccajonahi qqui toquinadsapa johua johua quinajari: – ¡Tocorime itidija! – quinajari. ⁵⁰Pohua huatimadedeni huapima qqui toquinadsapa jabojo quinajari. Nadsapa Jeso: – ¡Ticappinamana tejeraji, ohuapi ohua! – nahi nade. ⁵¹Nadsapa canoadsa toqquedsandsapa jojode totappajaro. Naraha jabojomana najarijine cappinamanahi paja naccajari. ⁵²Jeso huatimadedenipa Jeso pocca nahatohue aja pan da inabaquidsa inapajira-ridsabaquihijine qqui toquinaporaha bodideni ssamoqquri najari. Pohuadeni bodi Jeso tahimari mittamanahijine pajiramanahissa tajarajari. Bodidenidsa ahuatora tajaro.

**Jenesarehuaji Jesopa
comaquiri najari
inanomiridsa-baqqujari**

Mateo 14.34-36

⁵³Nadsapa Jeso pohua huatimadedeni tedseje coridsa jippehuaji tohuaquejidsamanajari. Dsama onini Jenesare bacco toquinajari. Huana tocanamanadsapa canoa ssoque icadsanamanadsa jai tojemorajari. ⁵⁴Nadsapa jai tojemoradsa nahihuaji madimanajarideni Jeso qqui toquinajari. ⁵⁵Nadsapa madija comaquiri najarideni-tohui domodeni toccaniridsajari. Jeso ccaridsahihuaji comaquiri najari taborodenima ihiaccamissa-baqquimana najari. ⁵⁶Jesopa odsa onihihuaji toccadsa, dsotode odsa capamanihuaji toccadsa, odsa pananihuaji toccadsa naco madija pohuatohui bacco bacco

nanajonamana najari. Huapima comaquiri najari inanomibaquihijine pohuadsa eheccajona-baqquimana najari. Pohua tedsejema jahuidsas, boronidsa naco ehequibaridsamana najari. Jesodsas huahua huahua quinajari: – ¡Jeso ohua tinanomiji! ¡Ticca etero iponira bara onanijine ahuaaji ticcajonaji! – quiquinanajari. Nadsapa pocca etero iponi bara quinajarideni huapimapa tocanomireridsahissatajari.

**Jodiodenicca marinajajine
Diocca dosseniji huahuattajo
tojajaro**

Mateo 15.1-9

7 ¹Nadsapa huada onihidsa odsapanani Jerosarehuajicca jodiodeni *marinaja pariseodsas jehe quinajarideni, jodiodenicca marinaja maridedeni tedseje Jesodsas bacco najonamanajari. ²Najari pohuadenina Jesocca mamari tabaqqi pohuadeni dsepe ssahuarahi jipamanahi qqui toquinajari. Najaropi pohuadenidsa bica tejerani. Pina imasiri inamanajarossa najaro, quiquinanajari. Aja jodiodeni poccadeni ididenicca marinajadsa iboqquri nadsapa *oppina tani quiquinanajari. ³Jodiodeni huapima, pariseodeni naco poccadeni ididenicca marinaja huapi tehe ecahuajonamanajaro. Najaro marinaja motapi jipamanabote nadsapa pohuadeni dsepe ssahua ssahua quiquinanapo najari. Najaropi obani noppineni jerani. Madija ohuaha aja jodio quejena-jarajarideni tedseje quejemamanajari noppine. ⁴Jodiodenipa dadahuaji jahinidsa naco tahide pohuadeni dsepea ssahua quinapodsana jijipamana najari.

Poccadeni jijipajinecca huapima pina parato, queneco, panera naqui ssahua ssahua quiquinanajari. Diocca dosse-nijipi nema nejeraraha jodiodeni poccadeni marinaja huapi tehe Dio Attidsa inaharimanajaro.

⁵Nadsapa pariseodeni, jodiodeni-cca marinaja maridedeni tedseje Jesocca mamari tabaqqi pohuadeni dsepe ssahuarahi jipamanahi qqui toquinadsapa Jesodsa huati toquina-jari: —¿Nejecotohui ticca mamari tabaqqiupa jodio quejenaraha icca ididenicca marinaja ecahuamanajerajaro? Ajana, pohuadeni dsepe ssahuarahi jipamanadsapa Diodsa bica tejerani, iadsa naqui oppina tani, ihinanajaro —quinahi nade.

⁶Nadsapa Jeso pohuadenidsa huati tajari: —A, tiadeni naqui Diocca dosseniji nahatoqqiri tiquinara-ha tecahuamananissa tejerajaro. Tiatenipi maidsehe ticajimanani. Maittaccadsama Djojine Pohua Atti cacomerabote Isahiapa ticca-deni imassa nehe dsodo inapojaro. Jidapanana najarossa najarodsa timadimanajaro. Ajana, maittaccadsama Djojine Isahiapa:

“Ajajarideni madijapa ohuadsa: ‘Dio, tiapi bica tinani’ quiquinanaraha pohuadeni bodi-denidsa otohui quina-jarahi.

⁷Pohuama ohuadsa jiri jiri quiquinanajari. Pohuadeni maride naco: ‘Dio Atti mari mari inajaro’ quiquinanaraha madijacca marinajara mari mari nanaridsamana najari” napohui nade Dio.

⁸Ajina, madijacca marinajana tiadenidsa denima bica tadsapi Diocca dossenijipi tinebomanajaro —nahi nade Jeso.

⁹Jeso denima huati tapomajari pohuadenidsa: —Ticcadeni madijacca marinajadsa disseraqqiri tiquinadsapi Diocca dosseniji ponima tinanamanajaro. ¹⁰Pina ajijaro imassa najaro Diocca dosse-niji Moisesi huati iqqumajaro:

“Ticcadeni abidsa, ticcadeni amidsa tetideni huanacquiri nana. Pohuadenitohui tetideni huanacquiri nadsa attidenidsa iboraacquiri tiquinana” napohui nade.

Pohua atti naqui: “Madijapa imehidsa, imenidsa imasiri inanadsapi manaco najaripa dsoqquehitohui”

napohui nade Dio Atti, Moisesijine dsodo nanidsa. ¹¹Naraha tiadenidsapi ima ajima najarona bica tajaro: “Madija imehidsa, imenidsa pohua attipa: ‘Jaho, tiadeni acco ocamabaqqinijineraha ocajijaro huapimapa Diodsa da onahijine onapodsapi tiadeni acco ocambaqqinijine opajira-jerani’ quina tahi.” ¹²Nadsa tettidenipi: “Jehe, madija nama nadsapa epeje, poni, pocca abidsa, pocca amidsa da inejerana” tiquinaraha. ¹³Ticcadeni madijacca marinaja tipotemanidenidsa mari mari tatajonamana najarodsana: “Bica tani” titiquina nadsapi tijinedeni Diocca dosseniji pajissacca huahuattajo tojajaro. Ticcadeni madijacca ima najarossa najaro caji tani —nahi nade Jeso.

**Tabaccorehe madija bodidsa
ahuatomsapi imasiri
toja tani**

Mateo 15.10-20

¹⁴Dsotodepa Jeso madija pohuahuaji jahijonahijine tohuideni

huahua napomajari. Pohua-huaji bacco najonamanadsa Jesopa: –Jari, huapima ohuatti titaharibobo canaji, timittamana-nissa tanijine. ¹⁵Tiadenidsapi jijipa oppina tahicca caji tahi. Madija nama nahicca jipadsapa tettidenipi: “Diodsa bica tejerani, Moisesicca marinajadsa naqui *oppina tani” titiquina najaro. Naraha ohuattipi ajima najaro: Huapima itaparipa dappi inadsa ibodidsa tojadsapa imasiri toja-jerani. Naraha ebondsa huati huati ihinanajarojinena madijadsa imasiri ihinanamana najaro. [¹⁶Nadsama teribodeni ticajimanadsapi ohuatti timittamananissa taji, onajaro –nahi nade Jeso.]

¹⁷Nadsapa Jeso madija inebo-baqquidsapa odsadsa toqquedsimajari. Nahidsa pohua huatimadedeni pohuadsa huati toquinajari: –Ia Maride ¿ticca marinaja nejecoma najaro? –quinahi nade. ¹⁸Nadsapa Jeso attia: –¿Tiadeni naqui ohuatti timittamana-jerajaroqui? Nema nadsapi timittamananissa tanijine tiadeni mari ocanabaqquipomana. Aja itapari huapima dappi inadsapa ibodidsa imasiri toja-jerani. ¹⁹Itaparipa ibodi huahuato nanihuaji toqquedsima-jarahi. Itaparipa idsonedsana totoqquedsima najari. Dsotode miji inadsapa toqqeequimajari –nahi nade Jeso. (Pohua atti nama nadsapa itapari huapima oppinera tahi, najari.)

²⁰Jesopa denima huati tajari: –Naraha madija pohua ajaridsa qqenajaropi pohua bodi huatodsa pohua ebenojine huati huati tajarijinena imasiri totoja najaro.

²¹Ajina, tabaccorehe huapimapi

madija pohua bodidsa ahuatomadsa pohua todossenidsapa imasiri inanjaro. Najaropi pina madija imasiritohui pohua bodi huatojari, maquideje tabiraraha amoneje ajade tohuini najari, amoneje tabiraraha maquideje najade tohuini najaro, botie tohuini najari, madija inanadsoqqehijine tohuini najari. Najaro ima madija pohua bodidsa ahuatomadsapi imasiri toja tani. ²²Tabaccorehe onihi naqui pina madija amoneje cajiraha amoneje onihi ajade tohuini najari, amoneje maquui cajiraha maquideje ohuaha najade tohuini najaro, madija ohuaha cajjaricca tohuini najari, ima tabaccora tajaro inananijine tohuini najari, madija icamaidsabaqquihijine tohuini najari. Najaro ima madija pohua bodidsa ahuatomadsapi imasiri toja tani. Tabaccorehe onihi naqui pina pohua cacahuade jipera tadsa huapima ponima tohuini najari, madija deni tojehe acconi bodi huadi tajari, madija tatamasso nahijine tohuini najari, pohua bodi “Ohuana bica onajaro, deni ojani” najari, madide ssamo tadsa maidsehecca imadsa pajissa najari. Najaro ima madija pohua bodidsa ahuatomadsapi imasiri toja tani. ²³Najaro tabaccorehe huapima madija pohua bodidsa ahuatomadsa pohua bodi totabaccorajari. Najarojinena madija imasiri ihinanamana najaro –nahi nade Jeso.

**Jodio madija jeraraha
Jesodsa pajissa najaro**

Mateo 15.21-28

²⁴Nadsapa nahihuaji mari icanabaqquia jicadsapa Jeso toccajari.

Odsa panani onini Tirocca dsama-huaji toccajari. Nahihuaajicca odsadsa bacco tadsapa mohuaradsa Jeso toqquedsimajari. –Bacco onani madija motadeni ssamoquiri nana –najari. Naraha pohua bacco nahi ima tojaridsajaro. ²⁵Naneje amoneje –Jeso ajadsa bacco nahi –quinahi ima mittadsapi pohuatohui toqquedsimajaro. Poni bedeni tocorime cajijaro. Imeni bodinipi: –Ajarina occa ejedeni inanomihijine pajirahi –nadsapi Jeso pohua bacchohuaji poni pitonidsa huittajaro. ²⁶Poni attinipi: –Jeso, occa ejedenidsa tocorime madidsahi. Dosse tininejo, tonominijine, onajaro –nani nade imeni. Naraha najaro amonejepi jodio jerani. Ponipi dsama Siria arobeni Penisiahuaajicca madija. ²⁷Nadsapa Jeso ponidsa huati tajari: –Madija ohuaha *jodio quejenajarajari acco ocamabaquipo-huijinepa bica tejerani. Najaro imapi pina madija pocca ejedenidenidsa dsamatapa da inaraha idinidsa pocca ettedsana da inajarissa najaro. Ejedenidenipa tahide jipamanapona, onajaro. Aja Diocca madija jodiodenina acco ocamabaquipo-huijine bica tani –nahi nade Jeso. ²⁸Nadsapi pohuadsa huati tajaro: –Pajissa ohua Medsede, naraha jijipacca huahuanari dopanidsa ejedenicca dsamatapa tabottodsas ette naco jipajari. Jodio ojajeraraha ohuadsa ticca acco camehe badsira tehe tinanaji, onajaro –nani nade Jesodsas. ²⁹Nadsapa: –Jehe, tetti nema nadsapi bica tani. Ticcanina. Ticca ejedeni bodinicca tocorimepa toqquenahi –nahi nade Jeso. ³⁰Nadsapi toccanijaro. Ponicca odsas bacco tanidsa

toqquedsimanidsapi poni bedeni tonominira qqui tajaro. Nadsapi mohuaradsa pori canajaro. Tocarimepa toqquenajari. Nohuerajari.

Madija huaribo didibote, huati tahijine naco ebena ssamo tajari Jesojine tobicajari

³¹Jesopa odsas panani Tiroccas joppemajari, odsas panani Sidohuaji toccahijine. Nahi Sidodsas tossoniqquma, ccahuajanidsas dsama arobeni onini Decaporidsas ccaridsajari. Dsotodepa Carireaccas coridsahuaji bacco tanijari. ³²Nahi Carireadsanas Jesodsas madijas huaribo didibote eccajonamanajari. Huati tahijine naco ebena ssamo tajari. Ccaccajonadedeni attidenia: –Jeso, itesse tinanabichijine tidsepedsas pohua bara tajo –quinahi nade. ³³Nadsapa Jeso aja huaribo didibote madija sibemas domo huahidsas iacca-ccas nadsas pohua dsepedsas huaribo odini ororo icanajaro. Pohua ebena naqui pohua dsepedsas ppito nadsas ebena bara inajari. ³⁴Nadsamas Jeso memehuaji qqui tamacossanaja pohuas sas tocanacossadsas pohua attidas huati tajari: –¡Eppatta! –najari. (Najaro ettidsapi: –¡Teribo ssire-re naji! –najari.) ³⁵Naneje pohuas huaribo ssire-re najari. Pohua ebena naqui tobicajaro. Nadsapas huati tahi tobicajari. ³⁶Nadsapas pohuadsas, pohuas tessedenidas naco Jeso huati tajari: –Ajijaro imapi tecomanana –najari. Narahas amadsatis pohuas tahimari ecomeraridsamanajaro. Jeso attipa: –Tecomamanaji, onapas –napomarahas jomas quina-jarajari. ³⁷Aja, huapima

jabojo quinaraha huatidsemanadsa attidenipa: –A, ima deni tojanijinecca qqui inani –quinajari. –Jesocca nahatohuepi huapima bica tani. Ajana, huaribo didi taraha pohuajine huaribo tobicadsapa tohuatti mittajari. Atti cappiraraha pohuajine atti cajijari –quinahi nade.

Jeso madija 4 mil quinajarideni inajipabaqqujari

Mateo 15.32-39

8¹Nadsapi huada onihidsa naqui madija huapima Jesodsa queriqquipomajari. Madija huapi taraha jipamanahijine dsamatapa jicajari. Najaria aja Jeso pohua huatimadedeni huahua inabaqquidsa pohuadenidsa huati tajari: ² –Madijadsa ohuati cahanariri canani. Huada ³ nehe ohuadsa jahiridsadsapa pohuadeni tapari jicajari. ³Naraha jipamanahijine poccadeni odsahuaji dosse onanibaqquidsapa pemi huatiacossaja camarana. Motadenipa dsamarideni huaji tani –nahi nade Jeso.

⁴Naraha Jeso huatimadedeni attidenia: –Naraha iapi madija madide nohuerahihuaji iqueriqquidsapi ¿nejecoma inadsa madija inajipabaqquihijine? –quinahi nade. ⁵Nadsapa pohuadenidsa huati tajari: –¿Nejecoma naha pan ticajimanani? –nahi nade. Naraha: –Pan 7 naha icajini –quinahi nade.

⁶Nadsapa Jeso madijadsa: –Huapima jassi tinaridsaji –nahi nade. Nadsapa Jeso pan 7 naha pohua dsepedsa inaccadsa Diosda huati tajari: –Jehe Abi Dio, epejeni, ticca daniji iadsa bica tahi –nadsapa pan icanabobiridsajari.

Icanabobiridsadsapa pohua huatimadedenidsa da inabaqqujari. Pohuadenina madija huapimadsa da inabaqqui-ridsamanajari. ⁷Aba bedi naco pamaha cajimanajari. Najari naco idsaba nadsa Jeso Diodsa huati tapomajari: –Jehe Abi Dio, epejeni, ticca daniji iadsa bica tahi –nadsapa idossebaqqujari: –Aba naco da tinabaqquimanajo –nahi nade. ⁸Nadsapa Jeso canahatori canajarijine pan, aba najari tohuapidsa madija huapima jipamanadsapa accararidsa-manajari. Jipamanahissata taraha mota tojjari. Pan bobi, aba ime mota inaccaniridsa-manadsapa quiqui 7 naha ijiridsajari nade. ⁹Nadsa madija jipamanajari-denipa 4 mil quinajari. Jipamanaha jicadsapa Jeso dosse inanibaqqujari nade. ¹⁰Nadsapa Jeso pohua huatimadedeni tedseje canoadsa jai tojedsajari. Coridsa jippehuaji tohuaccamanadsapa dsama Daomannotahuajina bacco toquinajari.

Pariseodeni: –Jeso canahatori canahi qqui inana –quinajari

Mateo 16.1-4; Roca 12.54-56

¹¹Jesopa coridsa jippehuaji bacco nanipomadsa nahicca Isaraeri potemahi jodiodeni mota marinaja pariseodsa jehe quinajaridenipa pohua quuide jahijonajari. Jesodsa bacco quinadsapa pohua tedseje ahuaji huati ahuaji huati quinarari. Pohuadeni bodipa: –Jeso nattome inana, pocca ima tossamonijine –quinadsapa Jesodsa huati toquinajari: –Jeso, pajissa Dioccadacorehe ticajidsapi memehuajicca nahatohue bicabote ahuato tinanaji. Qqui inana, inajaro –quinahi nade. ¹²Nadsapa Jeso pohua bodi

tonacasserahi nadsa jadsirema pohua ssa tocanacossadsa huati tajari: –¿Nejecotohui aja jidapana madija madimanajaridenipa ocanahatoriri cananijine tohuira huati toquinajari? Pajissara tiadenidsa huati onajaro: Jidapana madimanajaridenidsa occa nahatohue onahatona onejerani –nahi nade Jeso. ¹³Nadsapa inebobaquidsa canoadsa toqquedsanipomadsapa pocca dodosse tabaqqi tedseje jippehuaji jai tojajari nade.

–**Paji, jodiodenicca marinaja onini pariseo, tamine Herodecca ima naqui tiadenidsa toja-jerana –najari Jeso**


Mateo 16.5-12; Roca 12.1

¹⁴Coridsa jippehuaji jai tojaraha jipamanahijine poccadeni dsamata-pa huatideni ajamamanadsapa dsojo quina-jarahi. Pohuadenipa pan ojaría nahi canoadsa cajimanageraha huapimadsa pajira-jarahi. ¹⁵Nadsama nahi canoadsa jassi dsadsa Jeso pohuadenidsa huati tajari: –Tetideni huatoji. Jodiodenicca marinaja onini pariseo, aji tamine Herodecca ima naqui pina *pan ssaja tahijine quequejema tahimarissa najaro. Paji, najaro tiadenidsa toja-jeranijine tiadenipi dacoco tijiraji, onajaro –nahi nade Jeso. ¹⁶Pohua atti nama nadsapa pohua huatimadeni pohuadenira ojidsa huati tocanirere canajari: –¿Nejecotohui pohua atti nama najari? Aji ijipanijine pan icappirajarocca huati tajarirana –quina-jari. ¹⁷Naraha Jesopa pohuadeni bodi nahato tajari: –¿Nejecotohui pan ticappiramananicca imadsara

imahaha ticanajaro? ¿Nejecoma nadsa ticahatteranijine? ¿Nejecoma nadsa occa marinaja timittamananijine? ¿Tibodideni najoqquri najarorane? ¹⁸Tinoccodeni ticajimanaraha ¿qqi tiquinejerajaroqui? Teribodeni naqui ticajimanageraha ¿timittamana-jerajaroqui? Tinoccodenidsa qqi tiquinaporaha ¿tetideni ajimama canajarorane? ¹⁹Madija 5 mil quinaraha pan 5 naha dside onariridsadsa jiparidsamanajari. Motapa quiqui ijiridsahi ¿nejecoma naha tidiridsamanagera? –najari. Nadsapa: –Quiqui 12 nade –quinajari. ²⁰Nadsapa Jeso: –Aja madija 4 mil quinaraha pan 7 naha dside onariridsadsa jiparidsamanajari. Motapa quiqui ijiridsahi ¿nejecoma naha tidiridsamanagera? –najari. Nadsapa: –Quiqui 7 nade –quinajari pohua huatimadeni. ²¹Nadsapa pohuadenidsa Jeso attipa: –Pan ijipanijine ocanahatoriri canani opajirani. Naraha pan ticappiramananicca ima huati onejerapa. ¿Ticahatterajeraccajaroqui? –nahi nade Jeso.

Nocco siri Jesodsa eccajonamanadsa nocco ssire inanajari

²²Nadsapa Jeso pohua huatimadeni tedseje odsa panani Besaidahuaji bacco toquinajari. Nahicca madijapa Jesodsa nocco siri eccajonamanadsa attidenipa: –Jeso ¿ettidsa jipa tinaqui? Itesse nocco bara tajo, inajaro –quinahi nade. ²³Nadsapa Jeso nocco siri dsepedsa dama inadsa odsa panani huapihuaji iaccajari. Nadsapa pohua nassopedsa nocco siri nocco ppaja inanajari. Nadsana bara inadsa



pohuadsa huati tajari: –¿Nija, tinocco tohuatoqui? –nahi nade.

²⁴Nadsapa pohua nocco ssire-re nadsapa: –Jehe, madija qqui onabaqquiraha pohuadenipa pina ahua domoni ccaridsajarossa quinahi –nahi nade nocco siri.

²⁵Nadsapa nocco bara inapomadsapa nocco tohuatonissa tajaro. Huapima qqui taridsahissa tajari.

²⁶Nadsapa dosse inanijari pocca odsahuaji: –Jehe, ticca odsahuaji ticcaniji. Naraha odsa pananihuajipi tiqqedsimani-jeraccaji –nahi nade Jeso.

– **Jesopa Cristo-Mesia**
– **najari Pedro**

Mateo 16.13-20; Roca 9.18-21

²⁷Nocco siri tonomihi dsotodepa Jeso pohua huatimadedeni tedseje jai tojajari. Odsa panani Sesarea

de Piripo jahuihuaji jai tojadsapa nanihuajicca odsa capamema najaro onihidsa onihidsa jahiridsajari. Nadsa jahui jai tojadsa Jesopa pohua huatimadedenidsa huati tajari: –Madija otahimari huati huati nanaridsamana nadsapa ohuadsa attideni ¿nejecoma nejecoma quiquinanahi? –najari Jeso.

²⁸Naraha pohuadeni attipa: –Tiadsa madija motapa: “Huano Baotista tijani” quiquinanajari. Ohuadenipa: “Maittaccadsamacca Dio Atti cacomerabote Eria tijani” quiquinanajari. Ohuahadeni naco: “Maittaccadsamacca Dio Atti cacomerabote ohuaha tijani” quiquinanajari –quinahi nade Jeso huatimadedeni attidenipa.

²⁹Nadsapa Jeso pohuadenidsa huati tapomajari: –Naraha tiadenidsapi ¿nejecojari ojani? –nahi

nade. Nadsapa manaco Pedro huati tajari: –Tiapi *Cristo-Mesia tijani –najari.

³⁰Nadsapa Jeso pohua attipa: –Jehe, bica tani. Naraha occa imapi madija ohuahadenidsa tecomamanaccana –nahi nade.

**Jesopa pohua dsoqquehicca
ima huati tapojari**

Mateo 16.21-28; Roca 9.22-27

³¹Jesopa pohua huatimadedeni mari icanabaqquidsapa ajama najari: –Aji ohuapi Madija Bedi ojajaroa nidsa dsotode najidsohue imeni occaserani ohuanitohui. *Jodiodeni ime jocohuideni, *dada toqqumade taminedeni, jodiodeni-cca marinaja maridedeni quinajari-denipa ohua ettajomananitohui. Nadsapi ohua inanadsoqqe-mananitohui. Naraha ohua ppa idsa-manaraha huada huatinimade tojari nadsapi Abi Dio ohua nahatoni-hitohui –nahi nade Jeso.

³²Jeso pohua tedsejemacca ima huati tadsa ahuato tajaro. Naraha Pedroa Jeso iacca-cca nadsa huati tajari: –Jidacca ima huati tinajaro ticca ima nema najaro imapi huati tina tejeraji –nahi nade Pedro. ³³Naraha Jeso tahide huajanidsa pohua huatimadedeni icattabaqqi nadsa Pedrosda huati tajari: –¡Paji, otedsejemapi! Ohua teccocco tejeraji, onajaro. Tettipi pina maidsehe jinede Satana attissanani. Tiapi Dio jipa tahicca ssamo tinani. Madija tohuini quinajari-ccana nahato tinajaro –nahi nade Jeso.

³⁴Nadsapa Jeso denima mari icanabaqquihijine madija huapima, pohua huatimadedenima huahua

inabaqquijari. Pohua attipa: –Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimamanaji. Ohuadsara disseraqqiri tiquinaji. Madija tiadenidsa: “*Ahua porimacossanidsa tidsoqqeji” quinadsa naco: “Jehe, odsoqqueni bica tani. Jeso onebo-jarahi” titidsanapomana nana, onajaro. ³⁵Tiadenipi ticcadeni madie ohuadsa teccoramanadsapi otahimari madija tocassiejerahijine-cca maride tiquejenadsa naqui madija tiadeni tonajicabaqqui-manaraha camittehe jiquejeranicca ticajimana-dsanaponitohui. Naraha madija ohuaha pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui –nahi nade Jeso atti. ³⁶–Madija naco ajijaro namicca biquehe tohuini madidsa, ajijaro dsamacca ima deni tojanicca tohuini madidsa naco huapima pohuadsa tojaraha Diotohui najaradsapa nidsa pohua dsoqquedsa jororoni jiquejeranihuaji dsori tajarahitohui. Nadsapa pohua cajijaricca huapima ponima tojanitohui. ³⁷Pohuapa pohua cajijariccadsa camittehe jiquejeranicca mitta inanijine ssamo tani. ³⁸Aja jidapana madimanajarideni Dio Atti inebomanadsa imasiri ihinana-manajaro. Najarideni noppine madija cappinamanadsapa: “Jesocca madija ojajerani” quina tahi. Occa marinajadsa naco: “Omittana onejerani” quina tahi. Nama quinadsapa manaco ohuatti pohuadenidsa: “Occa madija tiquejenerani” onanitohui. Ohuapi Madija

Bedi ojajaroa nidsaranibote ajjaro namidsa occaronapomadsapi occa Abi Dio ssiejenema, pocca dodosse tabaqqi memehujicca tedseje occaronapomanitohui. Nadsana: “Onocco jidsa tani pohuadenidsa” onanitohui –nahi nade Jeso.

**Jeso assire tojidsa,
jidseremani najari**

Mateo 17.1-13; Roca 9.28-36

9¹ Jesopa pohuadsa queriqqi-manajaridenidsa denima huati tajari: –Ohuapi pajissara tiadenidsa huati onajaro. Ajidsa tidomodeni huajaro motadenipi tidsoqqemanageraccadsama Diocca cacahuehe dacorehema ccajonani qqi tiquinanitohui –nahi nade.

²Nadsapa Jeso najaro ima huati tahi nattini huada 6 nadsa ssonohuaji toqqemoradsapa Pedro, Satiaco, Huano quinajaridenira iaqqemorabaqqijari. Jai tojemoradsapa ssono tetepihuaji bacco tomoramanajari. Nahidsa qqi toquinanaja Jeso pano todsibehijaro. ³Pocca etero naqui amadsati todsibehijaro, nopo tajaro. Najaro noponipi madija ssamoqqiri nahi. Madija iapi etero ssabo ssabo inaraha ijine najarossa nanijine pajira-jerani. ⁴Nadsapa qqi toquinanaja Eria, *Moisesi tedseje Jesodsa ahuatomanadsa imahaha canajari. Pohuadenipa maittaccadsamacca Dio Atti cacomeraqqiri najarideni Jesohuaji ahuatomanajari.

⁵⁻⁶Nadsapa Pedrodeni cappinamanajari. Naraha Pedro pohua bodidsa: –¿Nejecora huati onanijine? –nanaja pohuama pohua atti Jesodsa: –Ia Maride, iapi

ajidsa iquejenadsa bica tani. Ticcadeni odsa huahuaqquide 3 canehe inahatona. Nadsapi tiadsa, Moisesidsa, Eriadsa cananijine –nahi nade Pedro. ⁷Naraha amadsati pohuadeni tetepihuaji essenii ccaronajaro. Ccaronadsapi pohuadenidsa ijihuajani-jaro. Nadsapa nahi essenii bodidsa atti qquenajaro: –Ajajaripa occa Ejedeni. Pohuadsa ohuati huana tajaro. Pohua atti timittamananissataji –nahi nade Dio. ⁸Nanaja qqi toquinaraha Jesodsa madija ohuahapa domo hua-jarahi. Pohua motta hua canajari.

⁹Nadsapa ssonohuaji jahidsippanidsa Jeso pohuadenidsa huati tajari: –Aji ssono tetepidsa qqi tiquinajarocca imapi tecomamanaccana. Ohuapi Madija Bedi ojajaropi nidsa odsoqqeni nattini onahatonidsana najaro ima tecomeramananijine bica tani –nahi nade Jeso. ¹⁰Pohua atti nama nadsapa madija ohuahadsa huati toquina-jararaha pohuadenira imahaha canajari: –¿Nejeco imara huati tajari? Pohua attipa: “Onahatoninitohui” naha –quinahi nade.

¹¹Nadsapa Jesodsa huati toquinajari: –¿Nejecotohui jodiodenicca marinaja maridedeni attipa: “Cristo-Mesia ccajona-jaraccadsama Dio Atti cacomerabote Eriana tahide ccanipohuitohui” quiquinanajari? –quinahi nade pohua huatimadedeni.

¹²Nama quinadsapa manaco Jeso pohuadenidsa: –Pajissa, tahidepa Eria ccanipohuitohui, ima huapima icattemaridsaponijine. Naraha ohua Madija Bedi otahimariipi Diojine Pohua Atti cacomeraqqiri najarideni dsodo quinapojaro. Najaroa

aji nanajidso ojadspapi ocasserani ohuanitohui. Madija naco ohua jaja icanamananitohui –nahi nade Jeso. ¹³ –Naraha ohuattipi: Eriapa ccanipode, onajaro. Aja Eria dsoqqejari ccanipo-jararaha madija ohuaha pina pahuassa najari ccajonadsa ima icattemaridsapode. Naraha nacasserehe pahuadsa inanamanade. Najaro ima pahuadsa tojajaropi maittaccadsama Dio Atti dsodo napojarossa najaro –nahi nade Jeso.

**Ejedeni bodidsa tocorime
madidsaraha Jeso dosse
ininejari**

Mateo 17.14-20; Roca 9.37-43

¹⁴Nadsapa Jeso, Huano, Satiaco, Pedro quinajarideni Jeso pohua huatimade mota madimanahihuaji bacco dsippanimanabote nadsa qqui toquinajari. Pahuadeni tesse madimanahidsa madija huapi taha toqueriqqui najari. Nahidsapa jodiodenicca marinaja maridedeni Jesocca madija tedseje ahuaji huati ahuaji huati quinajari. ¹⁵Naraha Jeso bacco nanihi qqui toquinadsa huatidsemanajari: –A, Jeso bacco nanihi –quinadsapa pahuadsa nija quinahijine pahuahuaji domo toqqejidsajari. ¹⁶Nadsapa Jeso pahuadenidsa huati tajari: –¿Nija, nejecotohui ahuaji huati ahuaji huati tiquinajaroneje? –nahi nade. ¹⁷Nahidsa madija ojaría Jesodsa huati tajari: –Ohua Maride, occa ejedeni tiadsa ohuaccajonajaripa. Pohua bodidsa tocorime madidsajari. Najarijine atti cappirajari. ¹⁸Pohua dama inadsa jadsirema cco inacossadsapa namidsa edima bohua nadsapa pohua ajari

ssabojene tocca tocca najari, ino ccado-do-do najari, assirema ccara-ra ccara-ra najari. Occa ejedeni nama nama nadsa tetimadedeni-dsa huati onajaropa: “Occa ejedeni pohua bodicca dosse tininemanajo” onaraha ssamoqqiri napaja –nahi nade imehi atti. ¹⁹Nadsapa Jesoa: –Jaho, madija huapima Diodsa jehe tiquinanissa tejerani. Tiadeni mari mari ohocanabaqqui naraha ¿nejecoma nadsa ticahattera-padseje? Ticcadeni jeheniji pajirani-ssa tejeradsapi ohuadsa ocassera taraha ¿nema nehe onahana-dsanaponijinequi? –nanaja: –¡Jari, ticca ejedeni ohuadsa teccajonajo! –nahi nade Jeso.

²⁰Nama nadsapa pahuahuaji ejedeni eccajonamanajari. Naraha tocorime Jeso qqui tadsapa ejedeni quidsa inanajari. Namidsa tohuedimajari. Dehue naridsa-dsapa ajari ssabojene toccajari. ²¹Nadsapa coma tajari imehidsa Jeso huati tajari: –¿Pohua coma tahicca abadsico nejecoma canahi? –najari. Naraha imehi attipa: –Badsira tadsamade –nahi nade. ²²–Huajijiradsa quidsa inanadsapa dsippodsa naco ihinassonidsana najari. Passodsa naco ihinassonippa nanaja najari, inanadsoqquehijine. Nadsapi Jeso tiana nahato tinanitide. Iadsa teti huana taji, ia acco ticamabaqquinijine –nahi nade Jesodsa. ²³Naraha Jesopa: –Jaho, tettiipi ohuadsa: “Tiana nahato tinanitide” tajaró nema tejeraji. Madijapa pohua bodi Diodsa jehe nahissa tadsapa nahato tajari: “Diopa ima huapima inananiijine pajirahi” najari –nahi nade Jeso. ²⁴Nadsapa imehia atti mohui tadsa

huati tajari: –¡Jehe, Diopa pajirahi!
onajaro. Naraha obodi acco
ticamaji, occa jeheniji todacorani
nanijine –nahi nade.

²⁵Nadsapa Jeso qqui tanaja
madija pohuadsa queriqquijonahi
tohuapihi nahi qqui tadsapa
tocorime dosse ininejari. Pohua
attipa: –Tocorime, tohuaribo
sibehe totonanade, tohuebeno
totonassamode, tia dosse omajaro.
¡Ejedeni tinebojo! ¡Tiqquenadsapi
tiqqedsimanipoma-jeraji, onajaro!
–nahi nade Jeso. ²⁶Nadsapa
tocorime johua najari. Pohuajine
ejedeni huatiacossadsa dari-ri-
ri nadsapa qquenajari. Nadsapa
ejedeni pina huatijarissa naha
ponajari. Nama nadsapa: –Huatiahi
–quinajari nade. ²⁷Naraha Jeso
ejedeni dsepedsa dama inadsapa
nomi taha inatehema najari.

²⁸Nadsa dsotode Jeso odsa-
huaji toqqedsimanidsapa pohua
huatimadedeni motaha: –¿Nejeco-
tohui iaha ajari ejedeni bodicca
dosse inehijine ipajira-jerapa?
–quinajari. ²⁹Nadsapa Jeso attia:
–Nama nahicca dosse tininmana-
hijinepa Diodsa huati tiquinadsana
toqquena tahi –nahi nade Jeso.

**Jesopa pohua dsoqquehicca
ima huati tapomajari**

Mateo 17.22-23; Roca 9.43-45

³⁰Nadsama nahidsa nebomana-
dsapa jai tojanijari. Dsama arobeni
Carireahuaji jai tojeqqumajari.
Naraha Jesopa pohua toqqe-
qqumahi madija nahatoqquri
nahijine jipera tadsa pohua cacoma-
dsa toqqeqquimajari. ³¹Aja Jeso
nema najaripa pohua huatimade-
deni pohuadenira maride dsepe

ijihijine. Pohua attipa: –Ohuapi
Madija Bedi ojararoa nidsa dsotode
madija ojaría ohua ccaccoradsapa
madija dsepedenidsa ojadssapi
ohua inanadsoque-mananitohui.
Ohua ppa idsamanaraha huada
huatinimade tojari nadsapi Abi Dio
ohua nahatonihitohui –nahi nade
Jeso.

³²Naraha pohuadenipa pocca
marinaja mittamanahissa tajara-
jari. –¿Nejecoma tajaro? –quina-
hitohuiraha cappinamanadsapa
Jesodsa huati toquina-jarajari.

**–¿Nejecojarina deni tojajari?
–quinajari**

Mateo 18.1-5; Roca 9.46-48

³³⁻³⁴Nadsapa Jeso pohua
huatimadedeni tedseje odsa panani
Capernaohuajicca jahui jai tojani-
dsa Jeso huatimade pohuadenira
imahaha tocananijari: –Aji ia
huapimapi ¿nejecojarina deni
tojajari? –tanimanajari. Odsadsa
bacco tanimanadsapa jai toje-
dsimanijari. Nadsapa Jeso pohua
huatimadedeni huati icanabaqqui-
jari: –¿Nejeco imara jahuidsa
imahaha ticananijaroneje? –nahi
nade. Naraha pohuadeni bodipa:
–Jeso icca imadsa jipera tahitide
–quinadsapa ecomeramana-jerani.
Tocadidire najari. ³⁵Nadsapa Jeso
huittaridsa pohua huatimade 12
quinajarideni huahua inabaqqui-
dsapa pohuadenidsa huati tajari.
Pohua attipa: –Madijapa: “Ohuana
deni ojani” najaripa Diodsa bica
tajarahi. Madijapa: “Ohuapi ajimani
ojani” najarina Diodsa bica tajari.
Najaripa madija huapimadsa acco
camade dissera tadsapa najarina
Diodsa bica tajari. Aji pocca ima

bica tadsapi pocca deni tojehe pajissacca ahuato tajaropaji –nahi nade Jeso.

³⁶Ejedeni huahua inadsa pohua huatimadedeni jassi nahuajanihini nocconidsa inahua najari. Nadsapa idi, dsojo ijidsadsa pohua huatimadedeni mari icanabaqqijari. ³⁷Pohua attipa: –Ajajari ejedenissa najari-dsa tetideni huanaqqiri nadsapi ohuadsa naqui tetideni huanaqqiri najaro. Ohuadsa tetideni huanaqqiri nadsapi ohua Cadossede Abi Diodsa naqui tetideni huanaqqiri najaro –nahi nade Jeso.

–**Madija iadsa huadi
tajaradsapa ia acco camajari
–najari Jeso**

Mateo 10.42; Roca 9.49-50

³⁸Nadsapa Huano Jesodsa huati tajari: –Ohua Maride, madija ohuaha tia oni hua nadsa madija bodicca tocorime dosse ininehi qqui inade. Naraha pohuapa iadsa ccaridsa-jaradsa pohuadsa: “Epeje taji. Poni” inade –nahi nade Huano.

³⁹Naraha Jeso attipa: –Pohuadsa poni tiquinejeraji. Madija ohua oni hua nadsa canahatoriri canadsapa nidsa dsotode ohuadsa atti tabaccora tajarahitohui. ⁴⁰Madija nama najaripa iadsa huadi tajaradsa ia acco camade tojajari –nahi nade Jeso. ⁴¹–Pajissara tiadenidsa huati onajaro: Aji ohuadsa tiquejenadsapi madijadenipa: “Jehe, pohuadenipa Cristo-Mesiacca madija, pohuadenidsa accora onana” quinadsa tiadenidsa da quinadsa bica tani. Passo dse tiquinanijine da icanamanadsa naqui manaco nidsaranibote Dio pocca biquehe pohuadenidsa inananitohui –nahi nade Jeso.

**Imasiri tinanadsapi oppina
tanihuaji ticcanitohui**

Mateo 5.29-30; 18.6-9; Roca 17.1-2

⁴²Jesopa denima huati huati tajari: –Nadsama madija ojarijine ohuadsa jehe quinajari imasiri inanamanadsapi pohuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocatteradsapa aja imasiri mamaride pohuadsa najidsohue oppina tanicca ssonarinitohui. Pina ajijaro imassa najaro: Siba ccanajabote pohua mattodsa ssoque dsanadsa passo imenihuaji je tahijine cco todsippadsapa oppina taraha najidsohue denima oppina tanicca pohuadsa ssonarinitohui.

⁴³⁻⁴⁴–Nadsama imasiri tinanajeranijinepi tibodi daco tijiradsa poni taji. Poni tejeradsapi ima oppina tanicca tiadsa ssonarinitohui. Pina tidsepedsa imasiri tinanabote naraha daco tijiradsa poni taji. Nema tadsapi pina tidsepeca ticajidsajarossa najaro. Tidsepecajarie amossi canaraha *Diocca cacahueheda timadidsapi tetidse-nitohui. Naraha imasiridsa dissera tinadsapi pina tidsepe capamehe ticajijarossa naraha *jororoni jiquejeranihuaji ticcanitohui. Najaro jororonipi ohuihuira tani.

⁴⁵⁻⁴⁶–Nadsama imasiri caji tanihuaji ticcanijine naqui tohuini taraha poni taji. Nema tadsapi pina temori ca ticajidsajarossa najaro. Temori cajariraha Diocca cacahueheda timadidsapi tetidse-nitohui. Naraha imasiridsa dissera tinadsapi pina temori capamehe

ticajjarossa naraha jororoni jique-
jeranihuaji tia coro todsimahitohui.

⁴⁷ –Nadsama tinocodsas naqui
tohuini tanicca qqui tinadsa ima-
siri tinananijine tohuini taraha daco
tijradsa poni taji. Nema tadsapi pina
tinocco huari, joca, jeo, coro tinajaro-
ssa najaro. Tinocco ojariraha Diocca
cacahueheda timadidsapi tetidse-
nitohui. Naraha imasiridsa dissera
tinadsapi pina tinocco pamehe
ticajjarossa naraha jororoni jique-
jeranihuaji tia coro todsimahitohui.
⁴⁸ Nanihuaji ocasserani tedsanapo-
nitohui. Timeqquene ssari-ri
cadsanaponitohui. Jororoni ohuihuira
taniccadsa time ca dsanaponitohui.

⁴⁹ –Aji tiadeni huapima Dio-
jine tibodideni tohuirenijinepi
pina sahojjine bani jadsi-jarajari-
ssa nanitohui. Pina dsippo jororo-
nijine bani cadsapa jadsi-jarajari-
ssa nanitohui. ⁵⁰ Sahopi bica tani.
Banidsa huira nadsapi jadsi-jaraha.
Naraha saho ajiboni tomossidsapi
tomajidera tani, icca bani naco
totabaccora tahi. Ajibo tapomanijine
ssamo tani. Tiadenidsa ohuatti pina
sahossa onanajaro. Ohuatti ticaji-
manana, imasiri tinanamana-jera-
nijine, madija ohuahadeni tinana-
bicabaqqi-manahijine. Titesedeni
tedseje ticajonerara canaji, onajaro
–nahi nade Jeso.

**Jesopa amoneje nebo nebocca
ima mari icanabaqqijari**

Mateo 19.1-12; Roca 16.18

10 ¹ Jeso odsa panani
Capernaodsas nebotsapa
dsama arobeni Jodeahuaji toccajari.
Hueni Jordao jippehuaji toccadsapa
dsama arobeni Pereaahuaji bacco
tajari. Nahidsapa madija sibema

pohuadsa queriquipomadsapa mari
icanabaqqijari. Jesopa nama nana-
ridsa najari. ² Nahidsapa jodiodeni
mota *marinaja pariseodsas jehe
quinajarideni Jesodsas jiperaqqiri
nadsa pocca marinaja inassamo-
mananijine ima najoramanajari.
Jesodsas tohuajiresimanadsapa
pohuadsa huati toquinajari: –Aja
¿maqquideje pocca amoneje inebo-
dsapi pohuadsa ima nohueraqi?
–quinahi nade.

³ Nadsapa Jeso attia: –Jari,
tecomeramanaji: Maittaccadsama
Moisesipa najaro ima mari icana-
baqqiipojaride. Pocca marinaja
¿nejecoma natte? –nahi nade.

⁴ Nadsapa pariseodeni attidenipa:
–Jehe Moisesicca marinajapi ajima
nade: “Maqquidejepa pocca amo-
neje inebonijinepi nebohuecca
papeo dsodo inadsa ponidsa da
inadsa inebodsapi pohuadsa ima
nohuerani” nadija –quinahi nade.

⁵ Nadsapa Jeso huati tajari: –Jehe
naraha najaropi maittaccadsama
ticcadeni idideni huaribodeni siba-
qqiri nadsa nebohue tohui quina-
dsapa Moisesi najaro marinaja
pohuadenidsa dsodo inajarode.

⁶ Naraha Dio dsama inahato-
ponipi amoneje nebo nebocca
ima nohueraccade. Diojine madija
toquejenapodsapa ima ajima najaro:

“Maqquideje amoneje tadsajani
inahatobaqqijari. ⁷ Nema najaro-
jinea maqquideje pohua bedi-
menidsa tojadsapa imehi imeni-
denidsa nebo, pohuadenira madi-
manajari. ⁸ Nadsapa pamaraha
pina ojarijarissa quinajari”
najaro Dio Atti dsodo nanidsa.
Nadsapa pajissa assiredeni pama-
raha cacajiredsapa Diojine pina

ojarijarissa dsanapomanahijine.
⁹Nadsama Diojine pina ojarijari-
 ssa quinaraha caneboredsapa
 bica tejerani. Madija ohuaha atti
 noppine caneboredsa naco bica
 tejerani –nahi nade Jeso.

¹⁰Nadsapa Jeso pohua huatimade-
 deni tedseje odsahuaji jahini-
 pomadsa odsa bodihuaji jassi
 dsadsapa Jesodsa huati toquinajari:
 –¿Ticca marinaja nejecoma najaro?
 –quinahi nade. ¹¹Nadsapa Jeso
 pohuadenidsa ima ecomerajaro:
 –Jehe maqquideje pocca amoneje
 inebodsa amoneje onihira icajidsapi
 pocca amoneje tahide inebojarodsa
 imasiri inanajaro. Nama nadsapa
 Diocca dosseniji ecahua-jerajaro.
¹²Amoneje naqui ponicca maqqui
 inebodsa ohuahara icajidsapa poni-
 cca maqqui tahide inebojaridsa
 imasiri inanajaro. Nema nadsapi
 Diocca dosseniji ecahua-jerajaro
 –nahi nade Jeso.

**Jesopa: –Abi, ticca biquehe
 ejedenidsa tinanaji –najari**

Mateo 19.13-15; Roca 18.15-17

¹³Nadsapa madija pocca-
 deni ejedeni Jesodsa eccajona-
 baqqui-manajari –Jeso tatideni
 bara inabaquidsa Diodsa huati
 tahijine –quinadsa. Naraha
 Jeso huatimadedeni attidenia:
 –¡Ejedenipa pohua! ¡Jesohuaji
 teccajonabaqquimana tajarajo!
 –quinahi nade. ¹⁴Naraha Jesopa
 pohua huatimadedeni ejedeni
 tedsejemadeni huacossamanahi
 qqui tadsapa huadijari. –¡Poni,
 nema tiquinejeraji! Pohuadeni
 jahijonana, onajaro. Eccajona-
 baqqui-manahijine tecossamana
 tejeraji. Madijapa pina ajajari

ejedenidenissa quinajarina Diocca
 cacahuehedsa toquejenahitohui.

¹⁵Pajissara tiadenidsa huati onana:
 Madijapa pohua bodicca jeheniji
 pina ejedenicca jehenijissa najara-
 dsapa Diocca cacahuehedsa toja-
 jarahitohui –nahi nade Jeso.

¹⁶Nadsapa Jeso ejedeni idi, dsojo
 ijidsadsa tatidsa bara nadsa huati
 tajari: –Abi Dio, ticca biquehe
 ajajari ejedenidsa tinanaji, onajaro
 –nahi nade. Ejedeni ohuahadeni
 naco nama inanabaqqui-ridsajari.

**Madija dsepe sse tajari Jesodsa
 huati tajari**

Mateo 19.16-30; Roca 18.18-30

¹⁷Nahi dsotodepa Jeso jahui tocca-
 dsapa pohuahuaaji madija ojaría joppa
 najonajari. Jeso baccohuaji pohua
 pitodsa huitta nadsa huati tajari:
 –Nija, Mamaride bicahi ¿nejecoma
 onadsa camittehe jiquejeranicca
 bacco onanijine? –nahi nade.

¹⁸Naraha Jesopa: –¿Nejecotohui
 ohuadsa: “Mamaride bicahi” tajaro?
 Madija bicahi nohuerahi. Diona bica
 tahi ojarihi. ¹⁹Naraha camittehe
 jiquejeranicca bacco tinanijinepi
 *Diocca dosseniji Moisesi dsodo
 inajarocca nahato tinani. ¿Najaro
 huapima tecahuanissa taqui? Diocca
 dossenijipi ajima najaro: “Madija
 tinanadsoque-jarajo. Madija
 ohuahacca amoneje tija tejeraji.
 Tiboti tejeraji. Maidsehedsa naqui
 madijadsa ponima ima tinahana
 tejeraji. Madija ticamajdsa tajarajo”
 nani Diocca dosseniji. Pocca dosse-
 niji onihí naqui: “Ticca abi, ticca
 amidsa bica tinadsa tinamadi-
 baqquihissa tajo” nani Diocca dosse-
 niji Moisesi dsodo inajaro –nahi
 nade Jeso.

²⁰Naraha Jeso baccodsa huittajari attipa: –Mamaride, najaro marinaja huapimapi dsabisso ojapodsama ohuacahuajonajarode –nahi nade.

²¹Nadsapa Jeso icattoma nanaja pohuadsa huati tohuanahi nadsa huati tajari: –Naraha ima ojarie tiadsa dsori taccani. Ticcanidsa tidsepetaji nemaneha manaconidsa da tinaridsaji. Nani najaro dsiniropi madija tohuati nahanaquiri najari-denidsa da tinabaquiniijine. Nema tinanadsapi nidsa memehuaaji Diocca biquehe tiadsa tojanitohui. “Nema onana” tadsapi ohuadsara dissera tinaji –nahi nade Jeso.

²²Najaro ima mittadsapa pano todsahi najari. –Jehe, nema onana –najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha toccanijari.

²³Nadsapa Jeso cattahuajanihi nadsa pohua huatimadedenidsa huati tajari: –¡A, madija dsepedeni ssequiri najaridenipa Diocca cacahueheda toquejenahijine najo tani! –nahi nade. ²⁴Nema najaro ima pohua huatimadedeni mittamanadsa huajo canirejari. Nadsapa Jeso huati nimanipomajari: –Jaho, otessedeni, madija Diocca cacahueheda toquejenahijine najo tani, onajaro. ²⁵Pina bani imehibote camellopa etero ssessequi odinidsa toqqequimahijine pajira-jarajari-ssa najari madija dsepe sse tajaripa Diocca cacahueheda tojahijine ssamo tani –nahi nade.

²⁶Nadsapa Jeso pohua huatimadedeni najaro ima mittamanadsa bodideni jabojojanadsapa huati tocanirere canajari: –Jaho, madija

tocassiejerahijinepa ssamo tani. ¿Nejecojarina tossiapadsaja? –quinahi nade. ²⁷Nadsapa Jeso pohuadeni icattabaquui nadsa huati tajari: –Madijapa ssamoquiri naraha Diodsapi ssamo tejerani. Pohujinena madija tocassiejerahitohui –nahi nade Jeso.

²⁸Naraha Pedropa Jesodsa huati tajari: –Ia Maride, iapi tiadsa jairidsanijinepi icca odsa, icca madija, huapima ineboridsabaquide –nahi nade.

²⁹Manaco Jeso atti: –Pajissara tiadenidsa huati onana: Madija ohua acco camahijinepa pocca odsa icanebo, pohua imecote inebobaquui, pocca ami, abi inebobaquui, pocca ejedeni inebobaquui, pocca dsama inebo nadsapa otahimari madija tocassiejerahijinecca tojaridsanijine dsepe ijiridsajari. ³⁰Nadsapa nidsa dsotode huapima pohua ineboridsajarossa nehe Dio pohuadsa da inaridsadsapi cajipomahitohui. Jidapana ajijaro namidsa pohua madicadsa huemani cajihitohui. Pohuadsa pina pocca odsa tohuapijarossa nanitohui. Pohua imecotedeni naco tohuapiridsahitohui, pohuadsa pocca amissa najaro cajiridsanitohui. Ejedeni ohuahadeni pina pocca ejedeni toquejenarissa naridsahitohui. Dsama naqui pina pocca dsamassa najaro pohuadsa tojaridsanitohui. Naraha otahimari pohuadsa tojajarojine pohuadsa najidsohue ssonarinitohui. Nema nanitohuiraha nidsa dsama dsati tojadsapi camittehe jiquejeranicadsa madi-dsanapohuitohui. Pajissa –nahi nade Jeso.

³¹–Naraha jidapana tiadenipi ajimani tiquejenaraha ajijaro imadsa tibodideni huatomanaji: Madija

jidapana madimanajarideni motapa deni toquejenaraha nidsaranibotepa ajamani toquejenahitohui. Jidapana madimanajarideni mota ajamani toquejenajarideni naco nidsaranibotepa deni toquejenahitohui –nahi nade Jeso.

Jesopa pohua dsoqquehicca ima huati nimanipomajari

Mateo 20.17-19; Roca 18.31-34

³² Jeso pocca madijama Jerosarecca jahui jai tojadsapa pohuana tahide tojadsanapojari. Pocca dodosse tabaqqipa pohua natti-huaji jai tojajari. Jeso dsoqquehijine noppine cappinamanadsa huatideni huatoto cadsanapojari. Madija ohuahadeni pohuadeni natti-huajicca jai tojamissajari naco cappinamanajari. Nadsapa pocca dodosse tabaqqi 12 quinajari pohuadenira huahua inabaquidsa pohuadsa queriqquijari. Nadsapa jahui jai tojadsa pohuadsa ima tojanijinecca huati huati dsanapojari. ³³ Jeso attipa: –Jerosarehuaji jajjemorajaropi nahatoqquri tiquinani. Ohuapi Madija Bedi ojajaroa nidsa Jerosare bacco inadsapi dada toqqumade taminedeni, jodiodenicca marinaja maridedeni quinarideni dsepedenidsa ojanitohui. Ohuadsa: “Dsoqquena, dsoqquena” quinahitohui. Dsotodepi madija ohuaha *jodio quejena-jarajaridenidsa ohua da quinanitohui, onajaro. ³⁴ Najaridenina ohua jaja icanaqqi-manajaro, ohua cossi inaquimanajaro nanitohui. Nadsapi ahua porimacossanidsa ohua inanadsoqque-manadsa ohua ppa idsamananitohui. Naraha huada huatinimade

tojari nadsa onahatoninitohui –nahi nade Jeso.

Satiaco, Huano tedseje Jesodsa huati toquinajari

Mateo 20.20-28; Roca 22.24-27

³⁵ Nadsapa Sebedeo bedideni Satiaco, Huano tedsejepa Jesohuaji tohuajiressimanadsa huati toquinajari: –Ia Maride ¿ettidsa jehe taqui? Icca huatinajassa tinanaji, inajaro –quinahi nade. ³⁶ Manaco pohuadenidsa: –¿Nejeco imara tiadenidsa onananijine? –nahi nade Jeso. ³⁷ Nadsapa pohuadenia: –Ticca cacahuehe bicanihuaji madija cacahuade tittaridsapi tinoridsa ipahimarinijine ohuapi tinori nahatonihuaji ohuittari, ocotepa tinori ssamohuaji huittari inanijine ¿jehe taqui? –quinahi nade Jesodsa.

³⁸ Naraha pohuadenidsa Jesoa: –A, najaro imapi ssamomo tinani. Ohuapi ocasserani ohuabote nani. Ohuadsa najidsohue ssonarinitohui. Aji tiadenipi najidsohue tinahanamananijine ¿tipajiramaquai? –nahi nade. ³⁹ –Jehe, ia naqui ipajirani –quinahi nade. Nadsapa pohuadenidsa Jesoa: –Jehe, pajissa ocasserani tinahanamananitohui. Aji ohua najidsohue onahana-dsapi tiadeni naqui nidsa dsotode najidsohue tinahanamananitohui. ⁴⁰ Naraha memehuaji occa cacahuedsa madija cacahuade ohuadsama pahimarihijinepa ohua dosse dosse onejerani. Abi Dio icattejidsa-baqqiujaridenina ohuonoridsa pahimarihijine –nahi nade Jeso.

⁴¹ Naraha Jeso huatimade mota 10 quinajaridenipa najaro ima imahaha canahi mittamanadsapa

Satiaco Huanodenidsa huadi-manajari. ⁴²Nadsapa Jeso huahua inabaquidsa pohuadsa toqueriqquidsapa pohuadenidsa huati tajari: –Tiadenipi madija ohuaha jodio quejena-jarajaridenicca madie nahatoqqiri tiquinani. Poccadeni taminedenipa dossede dacoraqqiri nadsa poccadeni madija dosse dosse quiquinanajari. Deni toquejenajari ohuahadeni naco poccadeni madija dacorehedsa ehecahuabaqqimana najari. ⁴³Naraha aji ohuadsa tiquejenajaropi nema tiquinanijine bica tejerani. Naraha titesedeni ojariapa: “Ohuana deni ojana” nadsapa pohuana huapima bijideni acco icamaridsabaqquihijinena bica tani. ⁴⁴Diocca cacahuehedsa deni tijanijinepi titesse bijideni acco ticamaridsajo, pina poccadeni medse tijajarossa tanijine. ⁴⁵Aji ohua *Madija Bedi ojararopi madija dosse dosse onanijine occajona-jerajaro. Madija acco ocambaqquihijinena occajonajaro. Madija poccadeni imasiri manaconi pohuadenidsa ssonari-jeranijine poccadeni imasiri manaconipi ohuana ohua ohuaccoranitohui –nahi nade Jeso.

**Jesopa Bartimeo nocco ssire
inanajari**

Mateo 20.29-34; Roca 18.35-43

⁴⁶Nadsapa Jeso pohua huatimadeni tedseje odsa Jericodsa bacco toquinajari. Nahidsa toqqequimadsapa pohua huatimadedeni, madija ohuahadeni naco huapi taha pohuadsa jai tojajari. Nani jahui inididsapa nocco siri huihuitta najari. Pohuapa Timeo bedi, onipa Bartimeo. Pohua dsepe da nadsa: –Ohuadsa dsiniro da tiquinaji

–tatacossa najari. ⁴⁷Najaria –Jeso Nasaretihuajicca toqqequimahi –quinahi ima mittadsapa Jesodsa huahua najari: –¡Jeso, *Dabi Potemahi! ¡Ohuadsa teti huana taji onaha! –najari.

⁴⁸Naraha madija motadenipa: –¡Poni! ¡Joma taji! –quinahi nade. Nama quinaraha denima paja huahua tarihi huahua tarihi najari: –¡Tamine Dabi Potemahi! ¡Ohuadsa teti huana taji! –napomahi nade.

⁴⁹Nama nadsapa Jeso huaha tahi nadsa –Jari, huahua tajonamanajo. Ccajonana –nahi nade. Nadsapa nocco siridsa huahua quinajari: –¡Jehe, bica tani! Titehemaji, tiadsa huahua nahi –quinahi nade. ⁵⁰Nanaja pohua teteppe ssiti, totehemahi, Jesohuaji toqquessijari.

⁵¹Nadsapa Jesoa: –¿Nejecora tiadsa onanijine? –nahi nade. Nadsapa nocco siripa: –Ohua Maride, onocco ssire tinanaji, onajaro –nahi nade.


⁵²Nadsapa Jeso: –Epeje. Ticcaniji. Tibodi ohuadsa pajissa tadsapi tinomini –najari. Nadsapa Jesojine amadsati pohua nocco ssire tajari. Jero sarecca jahui Jeso denima toccadsapa Bartimeo naco pohuadsa toccajari.

**Jesopa Jerosaredsa bacco
todsimajari**

Mateo 21.1-11; Roca 19.28-40;

Huano 12.12-19

11 ¹Nadsapa Jeso, pohua huatimadedeni, madija huapima tedsejedeni jai tojajari. Odsa panani Jerosarehuaji tohuajiramanadsapa ssono onini Oribodsa jai tojemorajari. Najaro ssonodsa odsa capamema najaro pamehe anijaro, oninidenipi Beta-paque, Betania najaro. Najaro



odsa pamehedsa bacco toquina-bote nadsa Jeso pohua huatimade pamahadsa huati tajari: ² –Jari, ajicca odsa capamema nanihuaji ticadapoji. Nanihuajipi bojo namidsadsa napidsati ssoque dsanaha huahi. Najari bojopa idedsa madija huittari-jaracchahi. Najari dicca tiquinadsa teccanimanajo –nahi nade. ³ –Naraha tiadenidsa madija attipa: “¿Nejecotohui bojo dicca tiquinajari?” nadsapa pohuadsa huati tiquinana: “Ia Medsede ajajari bojo tohui nadsapaja. Nidsa eccanihitohui” tiquinana –nahi nade Jeso.

⁴Nadsapa tohuedanaja, jahuidsa bojopa ssoque dsanahi bacco quinajari, odsa huajira tanidsa. Nadsapa bojo dicca quinajari. ⁵Nanaja nahicca madija domodeni huajari attideni: –¿Nejecotohui bojo dicca tiquinajari? –quinahi nade. ⁶Naraha manaco pohuadeni

cacomermanajari: –Ia Medsede tohui nadsapaja –quinahi nade. Nadsapa jehe quinadsa eccanimanajari.

⁷Nadsapa bojo eccanimanajari... Jesohuaji bacco nanimanadsapa poccadeni etero huapicca motarajaro ssiti quinadsa bojo idedsa bina quinadsa nahidsa Jeso huittarijari. ⁸Nadsapa madija huapi taha Jesodsa huatidsemanadsa pohua tedsejema jahui bina idsanapomanajaro, pohuadsa: –Deni tijani –quinahijine. Nadsapa jahuidsa pohuadeni teteppe namidsa hua idsanapomanani nade. Madija ohuahadenipa birijari eppe huamonicca ca ippimanadsa hua idsanapomanahi nade. Nadsapa Jeso jahui bina tani motta toccadsanapojari. ⁹Madija huapima pohua tedsejema jai tojaja, pohua natti-huaji jahijonaja dsanapomanajari.

Pohuadsa huatidsemanadsa
 huahua huahua dsanapomanajari:
 – ¡Diopa deni tojahi, deni tojahi!
 ¡Ia Medsede onima ccajonajari-
 dsa biquehera tojana, tojana!
 – dsanapomanajari. ¹⁰ – ¡Pohuapa
 icca idi tamine *Dabi Potemahi
 bicabote! ¡Ia Cacahuade tojahijine
 ccajonahi! ¡Bica tahi, bica tahi!
 ¡Memehuaji Diodsa madimana-
 jarideni pohuadsa: “¡Deni tijani!”
 quinana, quinana! – dsanapo-
 manahi nade.

¹¹Nadsapa Jeso Jerosaredsa
 bacco todsimadsa Diodsa dada
 toquimahuaji toccajari. Nahihuaji
 toquedsimadsapa qqui naridsahi-
 ssa tajari. Qqui naridsaha jicadsapa
 maji toccajari. Nadsapa Jeso pocca
 dodosse tabaqqui 12 quinajari
 tedseje Betaniahuaji jai tojanijari,
 bacco tanimanahi nade.

**Jesopa ahua iquiera bono-
 jarajaridsa atti ocassera tadsa
 huati tajari**

Mateo 21.18-19

¹²Huada ssiaja nahi Betania-
 dsa Jeso toccapomadsapa pemi-
 jari. ¹³Nadsapa huaji tanidsa
 ahua iquiera eppe cajipomahi
 qqui tadsa: – Bono naco caji-
 hitide – nahi nade. Naraha nahi
 bacco tadsapa eppe pohuara qqui
 tajari. Iquiera eppe cajidsapa
 bobono najariraha bono-jaraccahi.
 Pohua bonohuicca abadsico bacco
 tocana-jaraccajari. ¹⁴Nadsapa Jeso
 ahua iquieradsa huati tajari: – ¡A,
 apaja! Jidapapi tibono madija jipa-
 manapoma-jarahitohui. ¡Nohuera-
 hitohui! – nahi nade. Nahidsa
 pohua huatimadedeni mittamana-
 jari.

**Diodsa dada toquimacca
 odsadsa manaconitohui
 dadadedeni mohua
 ininebaquujari**

Mateo 21.12-17; Roca 19.45-48;

Huano 2.13-22

¹⁵Nadsapa Jeso Jerosarehuaji
 tocanajoranipomadsa *Diodsa
 dada toquimahuaji toqueds-
 mani-pomajari. Najaro odsacca
 boronidsa madija *bani bedi Diodsa
 da tahijinecca dade toquejenahi
 qqui tajari. Manaconitohui dadade-
 deni qqui inabaquidsapa huapima
 mohua ininebaquujari. Mimittade-
 deni naco mohua ininebaquujari.
 Dsiniro cacacajiquimeradedenicca
 huahuanari naqui hua inaridsajaro.
 Midsori dadadedenicca huihuittari
 naqui hua inaridsajaro. ¹⁶Madija
 ohuahadeni naco najaro odsacca
 boroni motta todsetetaji dsojo
 dsojo ihiquimamana nejeranjine
 Jeso ecossajaro nade. ¹⁷Nadsapa
 Jeso huapima mari icanabaquujari:
 – Dio Atti dsodo nanidsa
 ajima najaro: “Occa odsapi ohuadsa
 huati huati toquinahijinecca odsa
 tocajanitohui. Dsama huapimacca
 madija ohuadsa huatide jajahidsima
 nahijine” naponi nade Dio Atti
 dsodo nanidsa. Naraha tiadenipi
 madija titicamaisa-baquimana
 nadsa tijinedenia pina bobotide-
 denicca quequeriqui odsassa
 ticanamanajaro – nahi nade Jeso.
¹⁸Naraha dada toquimade
 tamedeni, jodiendenicca marinaja
 maridedeni tedseje najaro ima
 mittamanadsapa Jesodsa jipera-
 qquiri najari. Madija huapimapa
 Jesocca marinajatohui disseraqquri
 nadsapa tamedeni, mamaridedeni

tedseje Jeso deni tojahi noppine cappinamanajari. –Jesopa deni tojadsa ajimani iquejenarana –quinadsa Jeso dsoquehijine jara jara quinajari: –¿Nejecoma inanadsa Jeso inanadsoquehijine? –quinajari nade. ¹⁹Naraha todsidsidsa Jesopa pocca dodosse tabaqqi tedseje Jerosaredsa jai tojenajari.

Ahua iquiera bono-jarajari Jeso attijine botejari

Mateo 21.20-22

²⁰Nadsapa huada ssiaja dsidsidsa-massa ahua iquiera huahihuaji jai tojapomajari. Qqui toquinapomadsapa jaboma botejari. ²¹Nadsapa Pedro bodi huatomadsa Jesodsa huati tajari: –¡Ohua Maride, qqui tanaja! Maitta iquiera tettidsa tinajidsojaripa botea –nahi nade.

²²Naraha Jeso pohuadenidsa huati tajari: –Tibodidenidsa: “Diopa occa huatinajassa inananijine pajirahi” tiquinaji. ²³Pajissara tiadenidsa huati onajaro: Madijapa ajijaro ssonodsa huati tadsa: “Ssono, titehemadsa passo imenidsa jaro tidsanaji” nadsapa ssono nema nanitohui. Pohuapa jehe nahissa tadsa pohua bodi: “¿Pajissa tojapadseje? Nohueranitime” najaradsapa Diojine ssono jaro dsananitohui, onajaro. ²⁴Najaroa ohuatti: Diodsa huati tiquinadsapi tibodidenidsa: “Jehe, Diopa nema inananijine pajirahi” tiquinadsapi ticcadeni huatinaja Diojine najarossa inananitohui, onajaro –nahi nade Jeso.

²⁵–Diodsa huatide tiquejenadsa naqui madija tiadenidsa ima inana-pojarotohui tibodideni huatodsapi: “Najaro imadsa ohuati ajimana.

Pohuadsa ohuadi-jerana” tiquinaji, onajaro. Nema tiquinadsana ticcadeni Abi Dio memehuaji madijaripa ticcadeni imasiridsa huati ajamahitohui. [²⁶Naraha tibodideni najaridsa epeje tiquinejersadsapi ticcadeni Abi Dio memehuaji madijaripa ticcadeni imasiri epeje inana-jeranitohui, onajaro –nahi nade Jeso.]

–¿Nejecojaricca dacorehe ticajijaro? –quinajari Jesodsa

Mateo 21.23-27; Roca 20.1-8

²⁷Nahi dsotodepa Jerosarehuaji bacco tanimanapomajari. Nadsapa Diodsa dada toqqimahuaji Jeso toqquedsimadsapa pohuadsa jiperaqquri najarideni aja dada toqqimade taminedeni, jodio-denicca marinaja maridedeni, *jodiodeni ime jochuideni quina-dsa Jesodsa tohuajiressimanajari. ²⁸Nadsapa pohuadsa huati toquinajari: –Iadsa ticca ima tecomerajari. ¿Nejecojaricca dacorehe ticajijaro? ¿Nejecojari attidsa dadadedeni mohua tininebaqqijari? –quinahi nade.

²⁹Naraha manaco Jeso pohuadenidsa huati tajari: –Ohua naqui tiadenidsa huati onana, tecomermananijine. Ohuadsa tecomermanadsapi ohua dossede oni, occa dacorehe tahimarini tiadenidsa huati onanijine. ³⁰Jari, Huanopa ¿nejecojari icadossedsa topa idsana-baqqijaritta? ¿Diojine ttarana, madijajine ttarana? Jari, ohuadsa tecomermanaji –nahi nade Jeso.

³¹Naraha taminedenipa pohuadenira huati tocanirere canajari: –Jaho “Huanocca topanijipi Diocca dosseniji” inadsapi Jesopa:

“¿Nejecotohui pohuadsa jehe tiquinejerajarotte?” nahitohui iadsa –quinahi nade. ³² –Naraha “Huanocca topanijipi madijacca dosseniji” inadsapi madijaiadsa huadimanarana. Aja madijahuapima attidenipa: “Huanopa Dio icadossejari. Pajissa Dio Atti cacomerabote” quiquinanade –quinajari tamedenedi, madijadeni noppine cappinamanadsa. ³³ Nama quinana Jesodsa: –Ssamoququiri inani –quinahi nade.

Nadsapa Jesoa: –Ohua naqui ohua dosse onipa tiadenidsa ohuacomera-jarahi –nahi nade pohuadenidsa.

Huidsaja cacahuade tabaccoraququiri najaridenicca ima

Mateo 21.33-44; Roca 20.9-19

12 ¹Nadsapa Jeso pocca marinaja ajijaro namidsa imadinicca ima tadsajani mari icanabaququijari: –Madijapa pocca huidsajadsa ppa nahi uva pohuara ppa inajari. Nadsapi huidsaja inidi siba hua inahuajanijaro. Uva bono ttai nadsa ppejene tojahijine naqui sibadsa odi inahatojaro. Huidsaja cacahuade huittarihijine siba hua tamaroni naqui hua inamarojaro. Najaro huapima jicadsapi huidsaja jinede pocca huidsaja ecahuamananijine madijatohui qqui naridsajari, nahi pocca huidsajadsa tarabadsa quinahijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madijaqqui inabaququidsapa pocca huidsaja pohuadenidsa

inebojaro. Nadsapa jinede dsama huaji tanihuaji toccajari. ²Uva bono jadahicca abadsico bacco tadsapa huidsaja jinede huaji tanidsa madiraha pocca dodosse ojaria pocca huidsajahuaji dosse inanijari, uva bonotohui huidsaja cacahuadedenidsa huati tahijine. ³Naraha pocca dodosse huidsajahuaji bacco nanidsapa huidsaja cacahuadedeni dama quinadsa idaquuimanajari. Uva bono jiraha dosse inanimanajari. ⁴Nadsapa huidsaja jinede pocca dodosse ohuaha dosse inanijari. Huidsaja cacahuadedenihuaji bacco naniraha najari naco inajidsomanadsa tati biquerajari. Itamassomanadsa uva bono jiraha dosse inanimanajari. ⁵Nadsapa pocca dodosse ohuaha dosse inanijari. Naraha najaripa inanadsoqqe-manajari. Dsotode naco pocca dodosse tabaqqi dosse inanibaququi huapi taraha motadenipa itabaromanajari. Motadenipa inanadsoqqe-ridsamanajari.

⁶ –Nadsapa pohuadsa ojaria madi-cchahi, najaripa huidsaja jinede pohua pocca ejedeni. Najaridsapa huati huana tajari. Pohua bodipa: “Occa ejedenidsana cappinamanahitohui” najari. Nadsapa pocca huidsaja cacahuadedenidsa pocca ejedeni dosse inanijari. ⁷Naraha huidsajahuaji bacco nanidsapa huidsaja cacahuadedeni pohuadenira huati tocanirejari: “Ajaripa huidsaja jinede bedi. Nidsaranibote imehi dsoqqedsa huidsajapi pohuadsa tojanitohui. Jari, inanadsoqqeua, huidsajapi icca tojanijine” quinajari. ⁸Nama quinadsapa huidsaja jinede bedi dama quinadsa inanadsoqqemanadsapa huidsaja idenihuaji coro quinajari –nahi nade Jeso.

⁹Nadsapa Jeso pohuadsa queriqui-manajaridenidsa huati tajari: –Jari, tibodideni huatoji. Huidsaja jinede pohuadenidsa ¿nejecoma napadsaja? Pohuapa bacco nanidsa huidsaja cacahuadedeni inajicadsapa huidsajapi madija ohuahadenidsana da inanitohui –nahi nade Jeso.

¹⁰Nadsapa Jeso pohua tahimari pohuadenidsa ahuato tanijine Dio Atti dsodo nanicca huati tajari: –Tiadenipi Dio Atti dsodo nanicca hua hua titiquina naraha siba huahuattaajo tojajaro tahimarini ¿tetideni ajimanajaroqui? Imapi ajima najaro:

“Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro.

¹¹Aji siba huahuattaajo tojajaropi ia Medsede Djojine deni tojajaro. Najaro imajine Diodsa etidsejaro”

nani Dio Atti dsodo nanicca –nahi nade Jeso. ¹²Nadsapa dada toqqumade taminedeni, jodiodenicca marinaja maridedeni quinadsa Jesocca marinaja mittamanadsapa bodideni nahatoqqiri najari: –Jesopa icca ima huati huati tajari, iapi pohua ettajojarijine –quinahi nade. Nadsapa Jesodsa huadimanadsa: –Jeso todsepe inanana –quinaraha madija noppinedeni cappinamanadsapa apaja quinadsa jai tojanijari.

–¿Romanodenicca taminedsa icca dsiniro mota da inanijine bica taqui? –quinajari

Mateo 22.15-22; Roca 20.20-26

¹³Nadsapa jodiodenicca taminedenipa marinaja pariseodsa jehe quinajarideni pama, tamine

Herodecca madija pama quinaha dosse inajonabaqqi-manajari, Jesocca ima inassamomanadsa pohuadsa ima inassonarimananijine.

¹⁴Bacco najonamanadsapa huati toquinajari: –Mamaride, ticca ima iadsa ahuato tani. Pajissara huati huati tinajaro. Madija attideni noppine ticappina-jeradsapi ticca ima onihi toja-jerajaro. Madija deni tojajari, madija dsepe sse tajari, madija ajamani tojajari tedsejapa tiadsa najarissa caniquimerajari. Pajissehera Diocca marinajadsa madija madimanahissa tahijine mari mari titicanabaqqi najari –quinahi nade. –Nadsama iapi *romanodenicca tamine deni tojahicca pocca dossenijidsa icca *dsiniro mota pohuadsa da inanijine ¿bica taqui? ¿Bica tejerarane? Moisesicca marinajadsa ¿oppina taqui? ¿Oppinera tarane? ¿Tetti nejecoma tani? ¿Paca inanijinequi? ¿Paca inejeranijinerane? –quinahi nade. ¹⁵Jesodsa attideni bica tadsa huati huati toquinaraha poccadeni maidsehe pohuadsa ahuato tadsa pohuadenidsa huati tajari: –¿Nejecotohui occa ima tossamonijine ohuadsa huati tiquinajaro? Jari, ohuadsa dsiniro *denario dsojo ticanajonamanaji, qqui ocanana –nahi nade Jeso. ¹⁶Dsojo icanajonamanadsapi Jeso attia: –Jari, ajijaro ccararadsapi ¿nejecojari corimena anijaro? ¿Nejecojari oni dsodo najaro? –nahi nade Jeso.

Nadsapa pohuadsa ecomeramanageri: –Romanodenicca taminedija –quinahi nade. ¹⁷Nadsapa pohuadenidsa Jeso attipa: –Romanodenicca tamine pocca dsiniropi pohuadsa da tinanimanaji. Naraha Diocca

tiquejenadsapi Pohua jipa tahiccara Pohuadsa da tiquinaji –nahi nade Jeso.

Nadsapa –Jesocca ima tossamona –quinajarideni jabojojanadsa atti-denipa: –A, icca ima ecomeranijine nahato tajaria –quinahi nade.

**Nidsa jicamanajarideni
nahatonimanadsapa
caji caji cana-jarahitohui**

Mateo 22.23-33; Roca 20.27-40

¹⁸Nadsapa Isaraeri potemahi jodiideni mota *marinaja sadoseodsa jehe quinajarideni Jesohuaji bacco quinajari. Poccadeni marinajapi: –Idsoqqedsapi inahatoninijine nohuerani –quiquinanajari. –Najaro imadsa Jeso atti ijine tossamodsa cobara tana –quinadsa Jesodsa najaro ima huati toquinajari: ¹⁹–Mamaride, Moisesicca marinajadsapi ajima nani: “Maqquidejepa amoneje cajiraha ejedeni jiraha dsoqqedsapa pocca amonejepi pohua imecotena icajina, nahi ejedeni cajidsapa pocca ato dsoqqejaricca ejedenissa nahijine” nade Dio Atti Moisesi dsodo inajaro. ²⁰Nadsama tiadsa ima ajima najaro huati inana. Aja pohuadeni imecote pohuadenira 7 quinaha madimanajari. Tahideccaha amoneje cajipojari, naraha bedi jiraha dsoqqejari. ²¹Dsotodecca naco pohua ohuaha bedimeni icajiraha ejedeni jiraha dsoqqejari. Dsotodecca naco najaro amoneje icajiraha najari naco ejedeni jiraha dsoqqejari. ²²Najaro imapi nema dsanapojaro 7 quinaraaha ejedeni jiraha jicajari. Najarideni jicadsapa poni naqui dsoqqejaro. ²³Nadsapi dsama jicadsa madija inahatonidsapi pohua

imecote 7 quinajaripa ¿nejecojarina ponicca maqqui tojapadsaja? Huapimapa poni icajiquimanapora –quinahi nade.

²⁴Naraha Jeso attipa: –Ticcadeni marinajapi dsori tajaro. Dio Atti nahatoqqiri tiquinaraaha pajissa tiquinanissa tejerajaro. Diopa pocca dacorehema madija inahatonibaqquihijine pajirahi naco ssamoqquri tiquinajaro. ²⁵Jicamanajarideni nahatonimanadsapa caji caji cana-jarahitohui. Diohuaji madimanadsapa pina Diocca dodoses tabaqqui memehuajicassa quinahitohui. Aja pohuadenipa caji caji cana-jaradsa madimanajari.

²⁶–Nadsama Diojine madija nahatonimanahicca imapi Pohua Atti cacomerabote Moisesi dsodo inapojaro. Najaro Dio Atti dsodonani hua hua titiquina naraha ¿najaro imapi tetideni ajimamanajaroqui? Aji ahua diji tanidsa Diopa Moisesidsa huati tajari: “Ohuapi Dio, ticca idideni *Abarahao, pohua bedi Isahaca, pohua bedi Jacobo quinajaridenicca Dio ojani” nahi nade. ²⁷Aja Dio Atti nama nadsapa Abarahaodeni nahatonimanadsa madimana-dsanapohuicca ima ahuato tajaro. Diopa paja dsoqqemanarihi najaridenicca Dio jarahi. Diopa camittaqquri najaridenicca Dio. Pahuapa jidapana naco poccadeni Dio. Najaroa ticcadeni marinajadsa: “Nahatonie nohuerani” titiquina najaropi dsori tajaro. Pajissa jerani –nahi nade Jeso.

Diocca dosseniji deni tojanicca

Mateo 22.34-40; Roca 10.25-29

²⁸Jesopa sadoseodeni tedseje ahuaaji huati ahuaaji huati quinana

jodiodenicca marinaja maride
 ojariaha Jeso pohuadenidsa
 ecomerani bica tani mittadsapa
 pohua naco Jesodsa huati tajari:
 –Jari, Diocca dosseniji huapi
 taraha ¿nejecojaro dossenijina
 pocca dosseniji huapimadsa deni
 tojajaro? –nahi nade. ²⁹Nadsapa
 pohuadsa Jeso huati tajari: –Aji
 *Diocca dosseniji deni tojaniccapi
 ajima najarona paji:

“Isaraeri potemahideni,
 titaharibobo canaji. Ia Medsede
 Diopa ojarijari. Dio ohuaha nohue-
 rahi. ³⁰Tiadeni Medsede Diodsa
 tetideni huanacquiri naji. Tibodi-
 deni huatonissa tadsa, dacoco
 tijiradsa Pohuadsara disseraquiri
 tidsanapomanadsapi Pohuadsa
 tetideni huanacquiri nanijine.”

³¹Diocca dosseniji deni tojanicca
 onihi pina tahideccassa najaro.
 Deni tojaniccapi ajima najaro:

“Tinorideniccadsa tetideni huana-
 quiri naji. Pina tiadenidsa teti-
 deni huanacquiri najarossa naji.”
 Najaro Diocca dosseniji pamehena
 deni toquejenajaro. Pocca dosseniji
 onihipi najaro pamehessa nejera-
 jaro –nahi nade Jeso.

³²Nadsapa Jesodsa jodiodeni-
 cca marinaja maride attia: –Jehe
 Mamaride, tettiapi pajissa. Ia
 Medsede Diopa ojarihi. Ohuaha
 nohuerajari. ³³Nadsama Diodsara
 eti huanacquiri nanijine. Ibodi
 huatonissa tadsa dacoco ijiradsa
 Pohuadsara disseraquiri idsanapo-
 dsapi Pohuadsa eti huanacquiri
 nanijine. Inoriccadsa naqui eti
 huanacquiri nanijine pina aji iadsa
 eti huanacquiri najarossa ina-
 nijine. Najarona denima bica tajaro.
 Aji icca *bani bedi ono tojahijine

Diodsa dada toquimahuaji da da
 ihinanajaro, icca daniji onihi naqui
 dada toquimahuaji ihinebo najaro
 huapimapi Diodsa bica taraha aji
 tohuati huanehe pameheccadsa
 deni toquejena-gerani –nahi nade
 jodiodenicca marinaja maride atti.

³⁴Pocca cacomeraniji bica tani-
 cca Jeso mittadsapa: –Jehe, Diocca
 cacahueheda tijanijine tipajira-
 bote nani –nahi nade Jeso. Jesopa
 ecomeranissa dsanapodsapa ima
 onihi pohuadsa huati toquinahijine
 huapima cappinamanajari.

–¿Cristo-Mesiapa nejecojari
 potemahi tiquinajaro?
 –najari Jeso

Mateo 22.41-46; Roca 20.41-44

³⁵Nadsapa Diodsa dada toquima-
 huaji Jeso mari icanabaquidsapa
 madija ecomeramananijine huati
 tajari: –¿Nejecotohui jodiodenicca
 marinaja maridedeni attidenipa:
 “Cristo-Mesiapa *Dabi Potemahi”
 quiquinanajari? ³⁶Naraha tamine
 Dabipa maittaccadsama madidsa
 Dio Corimejine pohua tedsejemacca
 ima huati tadsapa pohua attipa:

“Ia Medsede Diopa ohua Medsede
 Mesiadsa huati tajari: ‘Ohuinori
 nahatonihuaji tittariji. Ohua
 tedsejepi tohuatti dacorajaro
 ticajiji’ najari. ‘Nidsaranibote
 tia huadidedenipa ajamani
 onanabaquihitohui. Pocca-
 deni dacorehepi onajicanitohui’
 napohui nade Dio.”

³⁷Naraha madija attidenipa: “Cristo-
 Mesiapa tamine Dabi Potemahi”
 quiquinanadsapa ¿nejecotohui
 Dabipa pohua potemahidsaraha:
 “Ohua Medsede” napojaritta?
 –nahi nade Jeso.

Nahidsa Jeso atti mittade madija huapi taha queriquimanajari. Pocca marinaja mittamanadsa huatidsemanajari.

**Pina jodiodenicca
marinaja maridedenicca
madiessa tiquinejeraji**

Mateo 23.1-36;

Roca 11.37-54; 20.45-47

³⁸ Jesopa madija mari icanabaquid-
sa ima ajima najaro huati tajari:
—¡Paji, tiadenipi! Pina jodiodenicca
marinaja maridedenicca madiessa
tiquinejeraji. Pihuadenipa etero
dequerajarodsa huedsaridsamana-
dsa attidenipa: “Tapi pina taminessa
inani” quiquinanajari. Aji dada-
huajicca jahuidsa jahiridsadsa naco
madija pihuadenidsa: “¿Nija, bica
tinani? Tiapi deni tijani” quinahijine
tohuini quiquinanajari. ³⁹ Dio Atti
mamarihuaji jassi tarihijinepa deni
toquejenaridenicca huihuittari
tohuini quiquinanajari. Jipaquie
imenidsa naqui deni toquejena-
jaridenicca huihuittaridsa jassi
tarihijine tohuini quiquinanajari.
⁴⁰ Nadsama tabira tocajamanajaro-
deni ponideni madimananijinecca-
raha icamaidsabaqqi-manadsa
pihuadenidsa totoja nadsapi poni-
denicca odsa naqui pihuadenidsa
totocajaridsa najaro. Naraha pocca-
deni tabaccorehe ahuatora tanijinepi
Diodsa huati huati toquinadsapa
poccadeni huatinaja dequerajaro,
aja madija pihuadenidsa: “A, Dio-
dsa disseraquiri nahi” quinahijine.
Pihuadenipa Dio Attima mamaisa-
mana nadsapa nidsa Diocca
najidsohue denima oppina tanicca
pihuadenidsa ssonarinitohui —nahi
nade Jeso.

**Amoneje tabira tocajani
ponicca dsiniro Diodsa da
inanicca ima**

Roca 21.1-4

⁴¹ Nadsapa Jeso Diodsa dada
toquimahuaji madicajari. Pihuapa
nahi bodidsa madijacca da naqqui-
naja dsiniro cocoro todsa cahittarini
tadsajanima huittarijari. Madija
poccadeni dsiniro cororo icadsa-
manani cattoma canajari. Dsiniro
ssequiqui najarideni huemani cororo
icadsamanani qqui tajari. ⁴² Nadsapi
nanidsa tabira tocajani tohuati
nahana tajaro ccajonajaro. Poni
madinijinecca dsiniro bedeniraha
ponicca danijijine capamehe cororo
icadsajaro. ⁴³ Nadsama najaro qqui
tadsapa pohua huatimadedeni
huahua inabaquijari: —Pajissara
tiadenidsa huati onajaro: Ajijaro
tabira tocajani cappiradsa tohuati
nahana taraha ponicca daniji dsiniro
bedeniraha deni tojani. Pina Diodsa
denima da inajarossa najaro. Madija
ohuahadenipa poccadeni daniji
toqueriquini huapi taraha Diodsapi
ajimani tojarossa najaro. ⁴⁴ Pohua-
denipa ssequiqui nadsa poccadeni
dsiniro mota arobeni da quinaraha
ajijaro tabira tocajanipi cappira-
raha nemanene da inajaro. Tohuati
nahana tani, poni madinijineccaraha
da inehe jicajaro —nahi nade Jeso.

**—Diodsa dada
toquimahuajicca odsa
taboridsanitohui —najari Jeso**

Mateo 24.1-2

13 ¹ Nadsapa Diodsa dada
toquimadsa Jeso qquenadsapa
pohua huatimade ojaría
attia: —¡Ohua Maride, qqui taneje!

*Diodsa dada toqquimahuajicca
odsa huapimapi siba bicanidsa
nahatoridsani bicaqquri naha
—nahi nade pohua huatimade.

²Nadsapa Jesoa: —Aji odsa imeni
sibadsa nahatoridsani bicabote
jidapana qqui tinaraha nidsa
dsotodepi taboridsehe jicanissa
tanitohui —nahi nade Jeso.

**Dsama jicani tohuajiradsa
nahatoqquri inanijinecca ima**

Mateo 24.3-28;

Roca 21.7-24; 17.22-24

³Nadsapa ssono Oribohuaji Jeso
pohua huatimadedeni tedseje jai
tojemorajari. Najaro ssonopi Diodsa
dada toqquimahuaji ahuato tajaro.
Nahidsa Jeso huittadsa Pedro,
Satiaco, Huano, Adiri quinajarideni
pohuadenira Jesodsa huati toquina-
jari: ⁴ —Ia Maride, jidacca ima
huati tinajaropi ¿nejecoma nadsa
tojapadseje? Najaro ima tohuajira-
dsa nahatoqquri inanijinepi
¿nejecora qqui inapopadseje?
—quinahi nade.

⁵Nadsapa Jesoa: —Paji, madija
tiadeni tocamaidasabaqqurana.

⁶Nidsa madija huapi taha pohuama
ohua onidsa maidsamanadsapa:
“Ohuapi Cristo-Mesia ojani”
quiquinanahitohui. Nadsapa madija
huapi taha icamaidsabaqqui-
manahitohui. ⁷Ima onihi naqui:
“Jadsire tojaridsani” timittamana-
nitohui. Naraha ticappinamana
tejerana. Jadsirepi epeje tojapo-
nitohui. Naraha dsamapi jique-
jeraccanitohui. ⁸Nadsama madija
dsama onihicca, dsama onihicca
tedseje jadsire inanamana-ridsa-
nitohui. Tamine ohuahacca madija,
tamine ohuahacca madija tedseje

cahadire-ridserahitohui. Namidsa-
dsa naqui tojaridsanitohui. Pemi
naqui cajiridsanitohui. Najaro
ocasserehe tahide tojaporaha
denima ocasserehe tojadsanapo-
nitohui —nahi nade.

⁹ —Paji, ¡tetideni huatomanaji!
Madija huadiqquri najari caji-
ridsahi. Najaridenipa tiadeni
tadamamanadsapa jodiodenicca
taminedenihuaji ticcadeni ima
mittamanahijine tiadeni tohuaqque-
dsimabaqqui-manahitohui. Jodio-
denicca Dio Atti mamarihuaji
naqui tiadeni itabaromananitohui.
Otahimari tiadenidsa tojajaro
aconi huadimanadsa dsama caca-
huadedeni baccodenidsa tidomo
huanijine tiadeni tohuaqque-
dsimabaqqui-manahitohui. Dsama
onihicca dsama onihicca madija
tamine deni toquejenajari bacco-
denihuaji naqui tidomo huanijine
tiadeni tohuaqquedsimabaqqui-
manahitohui. Nanidsana ticcadeni
ima tecomeramanadsapi tamine-
denipa otahimari mittamanahijine.
¹⁰ Dsama jiquejeraccadsama otahi-
mari madija tocassiejerahijinecca
dsama huapimadsa ecomeraridsa-
manaccanitohui. ¹¹ Nadsapa tamine-
denihuaji tiadeni tohuaqquedsima-
baqquimanadsapa pohuadenidsa
ticcadeni ima tecomeramana-
nijinepi ¿nejecoma onapadseje?
tiquinejerana. Ticappinamana
tejerana, onajaro. Taminedenidsa
ima huatide nahatoqquri tiquina-
nijine Dio Pohua Corimena tiadeni
acco tocamabaqquihitohui. Dio
Corimejine tiadenidsa ima ahuato
tadsapi najaro imara huati tiquinaji.
Huati tiquinadsapi tettideniraha
Dio Corimejinena huati tiquinajaro.

¹²Naraha najidsohuepi tiadenidsaha ssonarini ojari nejeranitohui. Aja ohuadsa jehe quinajaridenipa otahimaridsa toquejenarijine pohua ohuahadeniraha pohuadenidsa huadiquiri nadsapa ehccorabaquimana nahitohui, inajicabaqqui-manahijine. Imehideni naco pohua bedideni otahimaridsa toquejenarijine bedidenidsa huadiquiri nadsapa pohuadeni bedideni ehccorabaquimana nahitohui, inajicabaqqui-manahijine. Bedideni naco imehideni otahimaridsa toquejenarijine pohuadeni imehidenidsa huadiquiri nadsapa imehideni ihinajicabaquimana nahitohui.

¹³Occa madija tiquejenaroinepi madija huapima tiadenidsa jiperaquiri nahitohui. ¡Naraha tiadenipi dacoco tijiraji! Najaro huadie tinahanamana-dsanapodsapi tijicaraha ticassiejeranitohui. Timadimanaccadsa dsama jicani bacco tiquinadsa naqui ticassiejeranitohui —nahi nade Jeso.

¹⁴Jesopa dsama jicanicca ima denima mari icanabaquijari. (Pocca marinaja hua tiquinadsapi timittamananissa taji.) Pohua attipa: —Nidsa jodio quejena-jararidenijine Diodsa dada toquimahuaji oppinabote corime huedsadsapa toppinanitohui. Nahidsa huedsahipa bica tejerani. Nadsapi pohuadenijine icca madija jodio-denipa icappinaquimanadsa Diodsa dada toquima paji inebomanarinitohui. Najaro ima tojani qqui tiquinadsapi tiadeni huapima dsama Jodeahuaji timadiridsa-manajaropi ssonohuaji tidomo toqqemorana.

¹⁵Madija pocca odsa amossinihuaji ccaridsadsapa pohua dsepetajitohui

pocca odsahuaji toquedsimani-jarana. ¹⁶Madija pocca huidsajahuaji dsepe ijijari naco paja joppa tarina. Pocca eterotohui odsahuajiccanni-jarana. ¡Poni! ¹⁷Jaho, amoneje jiamanajarodeni, bacconideni ijimanajarodeni naqui joppa toquinanijine tohuati nahanaquiri nanitohui. ¹⁸Najaro ima oppinabote tojadsa tidomo toccadsapi ssirini nohueranijine Diodsa huati huati tidsanapomanapoji, onajaro. ¹⁹Najaro ima oppina tanicca bacco nadsapi madija huapima ocasserani imeni nahanamanitohui. Maittaccadsama Dio dsama inahatoponipi nema nanicca ocasserehe qqui quinapo-jerani. Nohuerani. Ia naqui qqui inejerani paji nani. Nidsa dsotode naqui nema napoma-jeranitohui. Nohueranitohui. ²⁰Najaro ocasserehe nema dsanapodsapi madija tossiajaja cama-jarahitohuiraha najaro ocasserehecca huada Dio ajimani inananitohui. Dio pocca madija pohua icattejidsa-baqquijaridenidsa huati huana tadsapa: “Nanidsa epejena, jicana” nahitohui Dio —nahi nade Jeso.

²¹—Nadsapa madija tiadenidsa pohuama: “Qqui, ajararipaja ia Idinide Cristo-Mesia” quina-dsa, madija ohuaha attideni naco: “Qqui, ajaccajarina Cristopaja” quinadsapa pajissa tiquinejerana, onajaro. ²²Madija mamaidsadedeni naco tiadenidsa jahijonahitohui. Pohuadenipa: “Ohuapi Cristo-Mesia ojani” quinahitohui. Ohuahadeni naco: “Ohuapi Diocca dosseniji ojani, Pohua Atti ohuacomeranijine” quinaraha maidsamanajari. Pohuadeni bodipa: “Dio icattejidsabaqquijarideni icamaidsabaquina”

quinadsa poccadeni maidsehe canahatorimana canaridsahitohui. Madija pohuadenidsa: “Pajissa Diocca dosseniji” quinahijine tohuini quinarahe Dio Pohua icattejidsa-baqquijarideni motapa pohuadenidsa pajissa quina-jarahitohui. ²³Nadsapa ¡paji! Ajijaro ima huati huati onajaropi tetideni ajimajerana. Najaro huapimapi nidsarani-bote tojanijineraha jidapana tiadenidsa huati onajaropajipa –nahi nade Jeso.

Jeso ccaronapomahicca ima

Mateo 24.29-35, 42-44;

Roca 21.25-33; 17.26-30, 34-36

²⁴Jesopa ima denima huati huati tajari: –Naraha ocasserehe inahanamanani nattinipi maji ohuihitohui. Abadsico naco cahuihitohui. ²⁵Memecca abadsico bedi naco catojahitohui. Jidapapa memecca huapima dacoraqquri naccahi naraha dsotodepa meme dsadsa nadsapi huenene huenene canahitohui. ²⁶Nadsana ohuapi Madija Bedi ojajaroa nidsa meme essenima oquejemehe occaronapomani madija huapima qqui toquinahitohui. Occa dacorehe, occa deni tojehe ahuato tanitohui. ²⁷Nadsapa occa dodosse tabaqqi memehuajicca dosse onaridsabaqquidsapa Dio icattejidsa-baqquijarideni inequeriqquni-baqquimanahitohui. Dsama nemanehedsa madiridsamanajarideni huapima ahuajicca, ahuajicca inequeriqquni-baqquimanahitohui –nahi nade Jeso.

²⁸ –Jari, ahua iquiera tahimaridsa ticahatteraji. Eppe moro nimanihi qqui tiquinadsapi: “Jehe, dsadsajade tojemanini” titiquina najaro. ²⁹Pina

najaro imassa najaro aji dsama jicani tahimarini huati huati onajaro qqui tiquinadsapi: “Jehe, Jeso ccanihi. Pina icca noccobijidsa huajarissa najari” tiquinana, onajaro. ³⁰Pajissara tiadenidsa huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinacahitohui. ³¹Meme, nami naqui jicaridsanissa tanitohui. Naraha ohuattipi jiquejeranitohui. Aji huati huati onajaropi najarossa nanitohui –nahi nade Jeso.

³² –Occaronapomanicca huada, maji naco madija huapima ssamoqquri nahi. Diocca dodosse tabaqqi memehuajicca naco ssamoqquri nahi. Dio Bedi ohua naqui najaro ima ssamo onani. Naraha Abi Dio Pohuana nahato tahi ojarihi –nahi nade.

³³ –Nema nadsapi tetideni huatonissa taji. Occaronapomanijinecca huada ssamoqquri tiquinarahe otohui tinajoramanehe timadimanaji. ³⁴Ohuapi Madija Bedi ojajaroa occaronapomanicca imapi pina ajijaro imassa najaro: Madijapa dsama huaji tanihuaji toccahijine joppemadsapa pocca odsa ecahuamananijine pocca medse nahidsa inebobaqquijari. Huapimapa dsepedeni ijimanahijine tarabai-dsa onihi onihi cajiridsamanajari. Jinedepa noccobiji cacahuadedsa: “Otohui ticattoma canana” nadsapa toccajari. ³⁵Odsa cacahuadedeni huapimapa jinede ccanihicca huada ssamoqquri nadsapa najoramana madimanajari. “Maji toccadsa ccanihitide, dsome nocconi itide, tacara huahua nadsa itide, ssiajadsa itide”

quinajari. Tiadeni naqui occaronapomanicca huadatohui tinajoramanehe timadimanaji, onajaro.

³⁶ Ajana, odsa cacahuadedeni jinedetohui najoramana-jaradsapa nassa cahadijadsa bacco naninaja. Tiadeni naqui ohua occaronapomadsapi tinajoramana-jeradsa bacco onanirana. ³⁷ Nadsapi tiadenidsa ohuattipi ajima onajaro: Occaronapomanicca huadatohui tinajoramanehe timadimanaji. Madija huapima naco nama quinana, onajaro –nahi nade Jeso.

**Jeso todsepe tojahijine
imahaha canajari**

Mateo 26.1-5; Roca 22.1-2;

Huano 11.45-53

14 ¹ Jodiodenicca ejete pamehe tohuajirajonajaro. Tahidecca huadadsapi *Pascoa tojapojarro. (Ettidsapi: Dio tossoniquimajari, inajaro.) Dsotodepi *Pan ssaja tajarahi jipamanajaricca ejete tojapomajaro. Najaro ejete tojanijinecca huada pamehe dsori taccadsapi ajijaro ima tojajaro. Dada toqqumade taminedeni, jodiodenicca marinaja maridedeni quinajaridenipa Jesodsa jiperaquiri najari huapima queriqquidsa: –¿Nejeco maidsehedsa Jeso todsepe tojadsa dsoqquehijine? –quinahi nade. ² Naraha pohuadeni atti onihipi: –Ejete tojadsapi ima nohueraccanijine. Jesodsa madija jipaquiri najarideni pohua dama inahi qqui toquinadsapa mohua mohua canarana –quinahi nade.

**Jeso tatidsa majoyo sso
inarijarocca ima**

Mateo 26.6-13; Huano 12.1-8

³ Jesopa odsa capamema najaro onini Betaniahuaji madidsa Ssino

huapi jadsidsi quiquinanajaricca odsadsa toqquedsimajari. Nahi Ssinocca odsadsa jipade jassi taridsa amoneje Jesodsa tohuajiressijaro, poni dsapanidsa siba onini alabastro nahatoni jojo bicahi dsojo inajonajari. Najari jojodsa majoyo bicani oninipi nardo dsojo icadsimajaro. Najaro majojopi passodsa quejemerani, huatini ccara tanicca. Nadsapi jojo bono idejidsadsa Jeso tatidsa nemanehesso inarijaro. ⁴ Naraha nahidsa jassi tarijarideni motaha huadimandisapa pohuadenira imahahacosseri najari: –¿Nejecotohui majoyo ponima inajicajaro? –quinahi nade. ⁵ –Najaro majoyo manaconipi dsiniro ccarara 300 *denario denima nitide. Iadsa da inadsapi madija cappiramanajaridenidsa da iquimanitohuiraha –quinahi nade, pohuadenira huati canirere canadsa. Nadsapa ponidsa naco atti atti quinajari nade. ⁶ Naraha Jesoa: –Epeje tiquinaji. ¿Nejecotohui ponds tedimanajaro? Ponijine ohuadsa nema nadsapi bica tani. ⁷ Cappiramanajaridenina tiadenidsa madi mana-dsanapohuitohui. Tohuini tiquinadsapi pohuadeni tinanabica-baqquimanahijine bica taraha ohuapi tiadenidsa omadidsanapojeranitohui. ⁸ Aji majoyo ohuassiredsasso inarijaropi pina odsoqquedsa ohua ppa idsamananijinessa najaro najorapojaro –nahi nade. (Jodiodenipa poccadeni madija dsoqquedsapa nama quiquinanajari.) ⁹ –Pajissara tiadenidsa huati onajaro: Dsama onihi, dsama onihi dsatahimari madija tocassiejerahijinecca ecomeramanadsapi aji otatidsa majoyo sso inarijarocca

ima naqui madija mittaridsamanahitohui. Nema nadsapi ponicca ima huatideni ajamamana-jarahitohui –nahi nade Jeso.

Jodapa Jeso eccorahijine najorajari

Mateo 26.14-16; Roca 22.3-6

¹⁰ Jesocca dodosse tabaqqi 12 quinajari ojaría oni Joda Iscariotepa dada toqqimade taminedenidsa Jeso eccorahijine huatide toccajari. ¹¹ Nadsapa Jodacca ima mittamana-nda huatidsemanajari: –Jehe, Jeso teccorajari manaco dsiniro tiadsa da inana –quinahi nade. Nadsapa Joda toccanidsa pohua bodi najorajari. Jeso pohuadenidsa eccorahijine innocodsaridsajari.

Ia Medsedecca jipaqqiue

Mateo 26.17-29; Roca 22.7-23;

Huano 13.21-30

¹² Pan ssaja tajarahicca ejete bacco tajaropi huada 7 nehe jicani-ijine. Najaro ejetecca huada tahideccadsa jodiodeni pohuadeni motta edede bedi Diodsa da da quiquinajari. Edede bedi inandsoqqe-manadsa ibanamanadsapa jipamanajari. Najaro ejete oninipi Pascoa quinajari. Nadsapi najaro huada bacco tadsa Jesodsa pohua huatimadedeni huati toquinajari: –¿Nejecohuaji Pascoacca jipaqqiue tiadsa inajoranijine? –quinahi nade. ¹³ Nadsapa pohua huatimadedeni pamahadsa huati tajari: –Odsa pananihuaji ticadapoji. Maqquideje jojoridsa passo dsojo tanihi bacco tiquinadsapa pohua natti ticadamissana. ¹⁴ Pocca odsadsa toqquedsimanidsapa nahicca odsa jinededsa huati tiquinana: “Ia

Maride attipa: ‘¿Nejecohuajicca coba canahuajaninidsa Pascoacca jipaqqiuedsa ojipanijine ohuatimadedeni tedseje?’ napaja” tiquinana.

¹⁵ Nadsapa pocca odsa tetepicca coba canahuajanini imeni tiadenidsa nohue inanitohui. Nanidsapi huahuanari, huihuittari najoraponi. Nanidsana jijipa tinajoramanaponijine –nahi nade Jeso. ¹⁶ Nadsapa tohuedadsapa pina Jeso pohua huati tajarissa najaro odsa najorani qqui toquinajari. Nanidsa Pascoacca jipaqqiue dsome jipaqqimanahijine najoramanajari.

¹⁷ Jesopa pocca dodosse tabaqqi 12 quinajari tedseje dsomejondsa jipaqqimanahijinecca odsadsa bacco toquinajari. ¹⁸ Huahuanaridsa jassi nahuajanidsa jipade toquejena- dsapa Jeso huati tajari: –Pajissara tiadenidsa huati onana: Ohuadsa jipade tiquejenaraha ojaría ha ohua ccaccoradsapa todsepe ojanitohui –nahi nade Jeso. ¹⁹ Nama nadsapa pohuadeni bodi qquedsadsa: –¿Aji ohuadsaqui? –naridsamanajari.

²⁰ Nadsapa Jeso attia: –Tiadeni 12 tiquinaraha ojariana icca paratodsa pohua naco pocca pandsa depo apa, depo apa nahi. Najarina ohua ccaccorahitohui. ²¹ Jehe ohuapi Madija Bedi ojararoa nidsa odsoqqenitohui. Pina maittaccadsama otedsejemacca ima Dio Atti cacomeraqqiri najarideni dsodo quinapojarossa onanitohui. Naraha ohua ccaccoradedsa oppina tehe tojanitohui. Jaho, najari maqquideje tossona-jaradsapa bica taraha, oppina tanicca dsori tahitohuiraha –nahi nade Jeso.

²² Nadsapa jipade toquejena- dsa Jeso pan idi nadsa Diodsa

huati tajari: –Jehe Abi Dio, ticca daniji iadsa bica tahi –nahi nade. Nadsapa pan icanarobedsa dside jai da, dside jai da inaridsajari. Pohua huatimadedenisa huati tajari: –Aja, apa tiquinajo. Ajjaropu ohuemecca ima –nahi nade Jeso.

²³Dsotodepa dse quinahijine dsedse equidi nadsa Diodsa huati tajari: –Jehe Abi Dio, ticca daniji iadsa bica tahi –nahi nade. Nadsapa pohuadenisa da icana-dsa dse naridsamanajari. ²⁴Nadsapa pohuadenisa huati tajari: –Ajajari dsedsepa ohuemenecca ima. Dio madija tedseje jehe canirehijine-cca ima tojanijine. Nidsa ohua odsoquedsa ohuemene toccadsapi najaro *jehe canireniji pajissa tojanitohui. Aji ohuemene toccajaropi madija huapimadsa ima bicani tojanijine. ²⁵Pajissara tiadenisa huati onajaro. Aja uva ppejene dse inajaripa dse onapoma-jaraccatohui. Nidsa memehuaji Diocca cacahuhe-dsana uva ppejene ohuaha dsatira dse onahitohui –nahi nade Jeso.

**Pedro pohua namaidshijine
Jeso huati tapojari**

*Mateo 26.30-35; Roca 22.31-34;
Huano 13.36-38*

²⁶Pascoacca jipacquie jicadsapi Diodsa jiri quinajari. Jiri quinaha jicadsapa ssono Oribohuaji jai tojemoranijari. ²⁷Nahihuaji bacco tomoramanadsana pohuadenisa Jeso huati tajari: –Tiadeni huapima ohua tinebomananitohui. Pina Dio Atti dsodo naporarodsapi ajima nanitohui: “Nidsa edede cacahuade dsoquedsapa pocca edede tojaribaquihitohui.” ²⁸Naraha ohuapi Djohne onahatoninitohui.

Onahatonidsapi titedsejemadeni dsama arobeni Carireahuajina occaninitohui –nahi nade Jeso.

²⁹Naraha Pedro attia: –Huapima tia inebomanaraha ohuapi tia onebo-geranitohui –nahi nade. ³⁰Nadsapa Jeso Pedrodsa: –Pajissara tiadsa huati onana: Tiapi ajijaro dsome tacara huahua nahi pama najaraccadsa ohuadsa: “Onocco jidsa tani” tanitohui. Dsotode naqui: “Onocco jidsa tani” tapomanitohui. Dsotode naqui nema tapomanitohui –nahi nade Jeso. ³¹Naraha Pedroa: –¡Nohuerani! ¡Ohuapi nema onejeranitohui! –nahi nade. –Ima oppina tadsa naqui tiadsa “Onocco jidsa tani” onejeranitohui. Tiadsama odsoqueniijine bica tani –nahi nade Pedro. Jeso huatimadedeni huapima naco attideni nama quinahi nade.

**Jesemanihuaji Jeso Diodsa
huati huati tajari**

Mateo 26.36-46; Roca 22.39-46

³²Nadsapa najaro ssonods ahuapa nahi oni Jesemanihuaji jai tojjari. Bacco toquinadsapa Jeso attia: –Tiadenipi ajidsa jassi tinaccaji. Ohuapi ajiccadsa Abi Diodsa huati onaccana –nahi nade pohua huatimadedenisa. ³³Nadsapa Pedro, Satiaco, Huano quinajarideni jina inabaquidsapa najaridenina pohuadsa denima jai tojjari. Nahidsana Jeso bodi qquedsadsapa ojibote najari. ³⁴Nadsapa pohuadeni-dsa: –Obodi ocassera tajarojine ohuatiabote-te canani. Tiadenipi ajidsa tibomanaccaji. Tinoccodeni bissaccana –nahi nade Jeso.

³⁵Nadsapa Jeso tocca-cca nadsa pohua baccohuaji namidsa pona nadsa Imehidsa huati tajari: –Abi,

aji ima comabotepi ohuadsa huaji tinanaji. ¿Madija tocassiejerahijinecca ima onihi nohueraqui? Nohueradsapi epeje –nahi nade. ³⁶Imehidsa huati tapomadsa naco: –Abi, nahato tinani. Madija huapimacca ima manaconi najidsohue ohuadsa tojadsapi ocasserani ohuanitohui. Pina dsedse bidabote dse onanijine-ssa najaro. Najaro onahananijine jipera onaraha ohua jipa onanicca tohui onejerajaro. Tia jipa tinaniccana paji. Najarodsana ibora onajaro –nahi nade Jeso.

³⁷Nadsapa pohua huatimadedeni-huaji ccanijari. Bacco nanidsapa cahadijahira qqui tajari. Nadsapa Pedrodsa Jeso huahua najari: –Ssino ¿tedajaroqui? ¿Dsome nocconi ocaja-jeraraha tinoccodeni bissade tipajiramana-jerajaroqui? ³⁸Ticahadija-jeradsa Diodsa huati tiquinaji, ima oppina tehe tojadsapi tijaparimanadsa ima tinanamana-jeranijine. Tibodidenipi ibora taraha tessiredenina mijira tajaro –nahi nade Jeso.

³⁹Nadsapa toccanipomadsa pina Imehidsa huati tapohuissa najari huati tapomajari. ⁴⁰Nadsapa pohua huatimadedenihuaji ccanipomara-aha cahadijahira qqui inabaqquijari, huada comani ahuamanaja nadsa. Jeso ccanidsa nocco toquejenajari. Naraha pohuadsa huati toquinahijine tossamomanajari. ⁴¹Diodsa huatide tocanajoranipomajari, pohua huatimadedenihuaji ccanipomadsapa: –¿Tiadenipi ticahadija dsanaponijinequi? Epeji, ohuapi Madija Bedi ojararoa jidapapi ohua ccaccoradejine imasiri cajimanajarideni dsepedenidsa ojanitohui –nahi nade. ⁴²Nadsapa:

–Jina, titehemamanaji. Ajana, jidapapa ohua ccaccorade ccajonahi –nahi nade Jeso.

Jodajine Jeso dama quinajari

Mateo 26.47-56; Roca 22.47-53;

Huano 18.1-11

⁴³Jeso huati huati naccaraha Joda bacco najonajari. Jodapa Jeso pocca dodosse tabaqqui 12 quinarideniraha. Puhua madija huapi taha eccajonabaqquijari. Jadsirecca massito eccajonamana, huahuacca eccajonamana najaro. Puhuadenipa dada toqqimade taminedenicca dosseniji, jodio- denicca marinaja maridedenicca dosseniji, ime jocohuidenicca dosseniji jahijonajari. ⁴⁴Jodapa Jeso todsepe inahijine eccajonabaqqui-jaraccadsama taminedenidsa huati tapojari: –Nidsa pano mose onahitohui. Najarina dama tiquinadsapa biji jore tiquinadsa teccanimanana –napojari nade. ⁴⁵Nadsapa huapima jahijonadsa bacco najonamanajari. Nanaja Joda Jesodsas tohuajiressi, pina pajissa pohuadsa bica tajarissa nadsa: –¿Nija ohua Maride? –nanaja pano mose inajari. ⁴⁶Nadsapa Jeso dama quinajari. ⁴⁷Naraha Jesocca madija ojariana massito dsoppa jeo, dada toqqimadedenicca tamine deni tojararicca medse huaribo ca taneje tajo canajaro.

⁴⁸Nadsapa Jeso pohuatohui jahijonajaridenidsa huati tajari: –¿Nejecotohui tiadenipi ohua dama tiquinanijine jadsirecca massitoma, huahuaccama jai tijajonajaro? Nema tiquinadsapi pina bobotidetohui jai tijajonajarossa najaro. ⁴⁹Nadsa tiadenidsama huajijiradsa Diodsa

dada toqqimahuaji mari mari ohonanaraha ohua dama tiquinehe nejerade. Naraha epeje, najaropi pina aji *Dio Atti dsodo napojarossa najaro tojanijine –nahi nade Jeso.

⁵⁰Nadsapa pohua huatimade huapimapa Jeso inebomanadsa domo toccajari. Nadsapa Jeso pohua motta ojari naha iaccanimanajari. ⁵¹Naraha dsabissopa pohua teteppe-dsara pohua teppe nadsa Jeso iaccanimanahi natti toccamissajari. Nadsapa Jeso tohuaccanidedeni pohua qqui quinadsa dama quinaraha ⁵²pohua teteppe ssiti, ccoroje joppa tadsapa dsori tajari nade.

**Dada toqqimadedenicca
tamine deni tojajaridsa
Jeso iaccamanajari**

Mateo 26.57-68;

Roca 22.54-55, 63-71; Huano 18.14

⁵³Jeso dama quinadsapa dada toqqimadedenicca tamine deni tojajarihuaji iaccamanajari. Nadsapa nahidsa dada toqqimade taminedeni queriqquijari, ime jocohuideni, jodiogenicca marinaja maridedeni huapima naco nahidsa toqueriqqui najari. ⁵⁴Naraha Pedropa huajima tohuanamissadsa dada toqqimadedenicca tamine deni tojajaricca boronidsa bacco todsimajari. Caipacca dodosse tabaqquidenidsama huittajari. Jassi nahujanidsa dsippodsa pohuadeni dsepe da quinajari.

⁵⁵Nadsapa dada toqqimade taminedeni, jodiogenicca *ima cacattemededeni deni toquejenajarideni tedseje Jesodsa ima inassonarimananjine tohuini quinadsa madijadsa huati taridsamanajari. Aja madija attidenipa: –Jesopa icca

marinajadsa oppina tanicca inana-paja –quinadsa taminedeni: –Jehe, najaro imadsa Jeso dsoqquehijine pajirahi –quinaraha ima oppina tanicca bacco quina-gerani. ⁵⁶Madija huapi taha maidsaniji onihi onihi huati toquinaraha poccadeni imapi najarossa naridsa-gerani. ⁵⁷Nadsapa madija ohuahadeni totehemamandsa Jesodsa poccadeni maidsaniji inassonarimanajaro. ⁵⁸Attidenipa: –Titaharibobo canaji. Jeso atti ajama nahi imittade. Pohua attia: “Aji Diodsa dada toqqimacca odsapi madija icanahatomanaraha ocatabodsapi huada 3 nadsa ocanahatoninitohui. Najaropi madija icanahatomana-gerani” nade pohua atti –quinahi nade. Pohuadeni atti nama quinaraha maidsamanajari. Pina Jeso attissa nejerani. ⁵⁹Naraha pohuadeni pamahacca ima nemanehipi najarossa nejerani. Najaro imadsa naqui Jeso inandsoqqe-manahijine pajira-gerani.

⁶⁰Nadsapa dada toqqimadedenicca tamine deni tojajari totehema, hua nadsa Jesodsa huati tajari: –¿Tiapi tia tecomajaroqui? Tiadsa ima inassonarimanajaropi ¿nejecoma naneje? –nahi nade tamine atti. ⁶¹Naraha Jesopa pohua cacoma najari. Nadsapa tamine huati nimani-pomajari: –¿Tiapi Cristo-Mesia tijaqui? ¿Dio Bicabote Bedi tijaqui? –nahi nade tamine. ⁶²Nadsapa Jeso: –Jehe, nema onajaro –nahi nade. –Ohuapi *Madija Bedi ojajaroa nidsa dsotode Dio Dacorabote ohua deni tonanadsapa Pohua inori nahatonihuaji ohuittarini qqui tiquinanitohui. Nidsa meme essenima occaronapomani ohua qqui tiquinanitohui –nahi nade Jeso atti.

⁶³Nanaja dada toqqimadedeni-cca tamine deni tojajaripa Jeso atti mittadsa huati jami nadsa pocca etero joca taneje sseo najaro. Nadsapa huapimadsa huati tajari: –¡Epeje! Jidapapi pocca ima nahatoqqiri inani. Madija ohuahacca imatohui huati inajerana. ⁶⁴¡Dio itamassojar! “Ohuapi Dio ojani” najarissa naha. Pohua atti tabaccora tani timittamanani. ¿Jari, tetti-deni nejecoma tiquinani? –nahi nade Caipa. Naraha huapima: –¡Jehe, pohua atti nama nadsapa dsoqquena inajaro! –quinahi nade. ⁶⁵Nadsapa pohuadsa ppito-to ppito-to canajari, nocco ssoque quinadsapa idaquimanajari. Nadsapa attidenia: –Jari ¿nejecojari tia idajari? ¡Tecomerajo! –quinahi nade. Nadsapa dada toqqimahuajicca cacahuadedeni Jeso pohuadenidsa tojadsapa pohuadeni naco Jeso idaquimanajari nade.

Pedropa Jesodsa: – Onocco jidsa tani – najari

Mateo 26.69-72; Roca 22.56-62; Huano 18.15-29

⁶⁶Jesopa odsa bodihuaji nanajidso tojaraha Pedropa amossinihuaji boronidsa huittajari. Nadsapi aji dada toqqimadedenicca tamine deni tojajaricca medse dsohuato ccajonajaro. ⁶⁷Pedro dsippo jiade tojahi qqui tadsa icattoma nadsapi pohuadsa huati tajaro: –Tiapi Jeso Nasaretihuajicca huatimade tijadija –nani nade. ⁶⁸Naraha Pedro pohua namaidsajari: –A, ohuapi onocco jidsa tani. Qqui onajarade. Najaro ima ssamo onani ohuapi –nahi nade. Nadsa Pedropa

boroni qquequedsimahuaji toccadsa huajari. Nanaja tacara huahua najari. ⁶⁹Naraha taminecca medsepi Pedro qqui inapomadsa nahidsa toqueriqquijaridenidsa huati tapomajaro: –Ajajari maqquidejeba Jeso huatimadedija –nani nade. ⁷⁰Naraha Pedropa pohua namaidsapomajari: –Onocco jidsa tani –napomahi nade.

Naraha dsotodepa nahidsa toqueriqquijari attidenipa: –¡Pajissade! Tiapi Jesocca tijade. Carireahuajicca madija tijaha –quinahi nade Pedrodsa. ⁷¹Nadsapa Pedro huadijari. –Pajissa huati huati onejeradsapi Dio ohua tinajidsoji, onana. Pajissa tiadenidsa huati onajaroa: Pohuadsa onocco jidsa tani. Jidacca najari tahimari huati tiquinajaro ohuapi qqui qqui onajaradija –nahi nade Pedro. ⁷²Nanaja tacara huahua nimanidsapa Jeso atti Pedro bodi huatomanijari: –Tacara huahua najaraccadsapa tetti tinamaidsani 3 nanitohui –napojari. Aja Jeso atti Pedro bodi huatomanidsapa bodi qquedsadsa oji idimajari nade.

Tamine Piratodsa Jeso iaccamanajari

Mateo 27.1-16; Roca 23.1-5; Huano 18.28-40

15 ¹Ssijadsapi dada toqqimade taminedeni, ime jocohuideni, jodiodenicca marinaja maridedeni, jodiodenicca ima cacatimadedeni huapima queriqquimanadsa pohuadenira imahaha canajari. Jehe caniredsapa Jeso biji jore quinadsa tamine Piratohuaji iaccamanajari, –Jeso dsoqquena –quinahijine. Tamine Piratopa

romanodeni. Pohnapa jodiodenicca dsama cacahuade tojajari. ²Nadsapa tamine Piratohuaji Jeso iaquedsimamanadsapa Pirato Jesodsa huati tajari: –¿Tiapi jodiodenicca tamine tijaqui? –najari nade. –Jehe, tetti nema tajaropaji –nahi nade Jeso.

³Nadsapa dada toqqumade taminedenipa Piratodsa poccadeni maidsehe huati toquinajari. ⁴Nadsapa Pirato Jesodsa huati tapomadsa: –¿Tia tecomera-jerajaroqui? Aja pohnudenipa ticca imapi tabaccora tani huapi tani huati huati toquinaha –najari nade. ⁵Naraha Jeso joma najari. Nama nadsapa tamine Pirato jabojo najari. Pohnapa bodipa: –¿Nejecotohui pohnapa cacomajari? –najari nade.

–**Baraba qqquenana, Jesopa dsoqquena –quinajari**
Mateo 27.15-31; Roca 23.13-25;
Huano 18.38–19.16

⁶Huajano huajijiradsa jodiodenicca ejete Pascoa tojadsa tamine Piratopa toponi cocorodsa madija huedsamanajari ojaria pohnuajine qqequeenamana najari. Madija huapima: –Najari qqquenana –quinadsapa ihineqquena najari. Piratopa najarossa inananijine najorajari. ⁷Nadsapa toponi cocorodsa huedsajari ojaria onipa Baraba. Barabapa toponi nanajidsodedeni tedseje toponi cocorodsa domo huedsajari. Pohnapa pohnapa tessedeni tedseje romanodenicca taminedsa jara jara quiquinandsa madija ojaria ijinedeni ahuamanajari. ⁸Nanaja madija huapima tamine Piratodsa huatide jahijonadsa attidenipa: –Ejete Pascoa tojadsapi toponi cocorodsa huedsajari ojaria tijine qqequeena

nade. Najarossa tinanapomaji inajaro –quinahi nade. ⁹Naraha Piratoa: –Jehe, aja pohnuadsa: “Jodiodenicca tamine” quinajari tappa onahijine ¿jipaqquiri tiquinahui? –nahi nade.

¹⁰Piratopa pohnapa bodidsa Jesopa ima cappirahi nahato tapojari. Pohnapa bodipa: –Dada toqqumade taminedenipa Jesocca deni tojehe acconi huadimanadsa ohuadsa eccajonamanajari –najari. ¹¹Naraha dada toqqumade taminedenipa Jeso tossiajahijine jiperaquiri nadsa madija huapimadsa huati naridsamanapojari: –“Barabana qqquenana” tiquinaji –quinahi nade. Nadsapa huapima Barabatohui johuahua johuahua canajaripaja.

¹²Naraha Piratopa domo huajari-denidsa huati tapomajari: –Jehe, naraha pohnuadsa “Jodiodenicca tamine” quinajaripa ¿nejecoma onanahijine jipaqquiri tiquinani? –nahi nade. ¹³Naraha huapima johuahua johuahua canapomadsapa: –¡Ahuah porimacossanidsa dsoqquena, dsoqquena! –quinahi nade. ¹⁴–¿Naraha nejecotohui dsoqqehijine? ¿Nejeco imara inanjaro? –nahi nade Pirato. Naraha domo huajarideni huapima paja johua toquinarihi nadsa: –¡Ahuah porimacossanidsa dsoqquena, dsoqquena! –quinahi nade.

¹⁵Nadsapa tamine Pirato pohnuadsa madija huapima huatidsemanahijine Baraba ineqqenajari. Nadsapa pocca soldadodeni Jeso cossi inaqquimanahijine icadossebaquijari. Cossi inaqquimanaha jicadsapa icadossebaquippomajari: –Ahuah porimacossanidsa coba tidsanamanahijine tiaccamanajo –nahi nade Pirato.


¹⁶Nadsapa tamine Piratocca soldadodenipa odsa imeni bodihuajicca boronidsa Jeso iaququedsimanajari. Nahidsa romanodenicca soldado huapima toqueriquijari. ¹⁷Pohuadenipa: – Jeso pina taminessa inanana – quinaraha maidsamanajari. Nadsapa etero macconi motaranicca pina taminedeniccassa najarodsas Jeso inehedsamanajari. – Jeso taticca pina tamine tatideniccassa nana – quinaraha cotihi atinema jore nahuajanihira ettarianajari. ¹⁸Nadsapa jaja icanaquimanahijine pohuadsa: – ¡Deni tijani jodiodenicca tamine! – quinahnade maidsamanadsa. ¹⁹Pohua tatisda ahua ppahua tajarodsas huacca huacca quinajari. Ppito inaquimanajari. Nadsapa: – Pina taminedsassa inana – quinadsa Jeso baccuhuaji pohuadeni pitodsas huittamana, tocattedsamana, huittamana, tocattedsamana naraha maidsamanajari. ²⁰Nadsapa maidseheda

pohuadsa jidsa jidsa quinaha jicadsapa etero macconi motaraniccapi ssiti quinadsa pohua pocca eterora inehedsanimanajari. Nadsapa ahua porimacossanidsa Jeso coba idsanamanahijine iaccamanajari.

**Jeso ahua porimacossanidsa
coba idsanamanajari**

*Mateo 27.31-56; Roca 23.26-40;
Huano 19.16-30*

²¹Soldadodenipa Jeso iaccamanajaja dsama Sirenecca madija Ssinopa huidsajahuaji ccanidsa soldadodeni bacco ijidsamanajari. Najari Ssinopa Arejadro, Rofodeni cca abi. Jeso ahua porimacossani dsojo inaraha ja tojadsa soldadodenipa Ssino icadossemanajari: – Manaco tia ajararicca ahua porimacossani dsojo tinaji – quinadsapamanaco Ssinona dsojo inajaro. ²²Nadsapa ssono Cocottahuaji Jeso iaquemoramanajari. (Ssono onini Cocotta ettidsapi: Totati Tonanissa



nani, quiquinajari.) ²³Nahidsa bacco toquinadsa uva ppejene, ahua amani onini mirra quejemadsa Jesodsa da icanamanajari, –Pohua comene ojidsama nanijine –quina-dsa. Naraha Jesopa pohua najari nade.

²⁴Nadsapa *ahua porimacossanidsa coba idsanamanajari. Coba idsanamanaha jicadsapa acca icanamacossa-manajari nade. Nadsapa soldadodeni: –¿Jesocca etero nejecojaridsana tojanijine? –quina-dsa siba bedenidsa coro coro quinajari. Najaro sibadsa ittomemandsapa pocca etero pohuadenidsa ojari ojari naridsajaro nade.

²⁵Dsidsidsamassa maji 9^{da} Jeso coba idsanamanajari. ²⁶Pohua tati tetepihuaji dsodo nani coba idsanamanajaro. Najaro dsodo nanipi: –Ajaripa Jodiodenicca Tamine –najaro. ²⁷⁻²⁸Bobotide pamaha naco Jesodsama topamajonahijine ahua porimacossanidsa cobaba idsanamanajari. Ohuahapa Jeso inori nahatonihuaji que, ohuahapa Jeso inori ssamohuaji que tajari nade.

²⁹Madija nahi jai tojeqqimajari-deni Jesodsa jiperaququiri nadsa Jesodsa tatamasso quinajari. Tati-deni huide huide quinadsa attidenipa: –Ajina tettipi: “Diodsa dada toqquma ocatabodsapi huada 3 nadsa ocanahatoninitohui” teteje nade –quinahi nade. ³⁰–Jari, tia tinassiajaji. Ahua porimacossanidsa tia tidinidsa ticcaronaji –quinahi nade. ³¹Nadsapa dada toqqimade taminedeni, jodiodenicca marinaja maridedeni quinajaridenipa Jeso itamassomanajari: –Ajana madija ohuaha inassiajabaququiraha pohua tonassiajadepa ssamo tahi.

³²Pohuapa Cristo-Mesia Isaraeri potemahi jodiodenicca tamine tojadsapa porimacossanidsa cca-ronana. Nadsana qqui inadsa pohuadsa pajissa inanijine –quinajari. Pohua inoricca naco ahua porimacossanidsa cobaba dsanaraha najaro tohuattissa najarodsa Jesodsa atti atti quinahi nade.

Jeso huatiajari

Mateo 27.45-56; Roca 23.44-49;

Huano 19.28-30

³³Maji itetepi tojadsa dsama nemanehe todsidsini najaro. Dsidsi dsanapojaropi maji 3 bacco tajaro. ³⁴Najari maji 3^{da} Jesopa pohua attidsa jadsirema huahua najari: –Eroi, Eroi ¿rema sabatani? –nahi nade. (Najaropi: –Abi Dio, Abi Dio ¿nejecotohui ohua tinebojaro? –najari nade.) ³⁵Naraha nahidsa domodeni huajari mittamanadsapa: –¡Titaharibobo canaji! Maittaccadsamacca Dio Atti cacomerabote Eriadsa huahua nahi –quinahi nade. ³⁶Nadsapa nahidsa domo huajari ojaria huassinaja joppa tajari, huassa tajari idi, uva ppejene ssicata bidada najaridsa edsippa, ppaja tojadsa bobadsa oro, da icanamacossajari. Nadsapa najari attia: –¡Maqui, nidsa padseje! Pohua idironahijine Eria ccajonahitidija. Qqui inaccana –nahi nade.

³⁷Naraha Jeso jadsirema johua nadsapa huatiajari. ³⁸Naneje Diodsa dada toqquma bodihuajicca *huahuacossa etero sibabote naqui Diojine sseo naronajaro, carobe najaro. ³⁹Nadsapa Jeso bacchohuaji soldado tamine Jeso cacahuade huajaripa Jeso huatiahi qqui tadsa: –¡Jaho! Pajissa ajari maququdejepa

Dio Bediraha –nahi nade soldado tamine atti.

⁴⁰ Amonejedeni naqui huaji tanidsa cattade domoni huajaro. Ponidenipi huapi taraha mota oninidenina Maria Madarenahuajicca, Jose Satiacodenicca ami Maria, Sarome quinajaro. ⁴¹ Mariadenipi Jeso dsama arobeni Carireadsa ccaridsapodsa pohua accode pohuadsa jahiridsajaro. Amoneje onihideni naqui huapi tani. Ponidenipi Jerosarehuaji Jesodsa jahijonajarodeni.

Jeso ppa idsamanajari

*Mateo 27.57-61; Roca 23.50-56;
Huano 19.38-42*

⁴² Jeso dsoqquehicca huadapi viernes. Jodiodenipa najaro huadadsa poccadeni *jassinajacca huadatohui nanajoramana najari. Huada ssiaja sabadopu poccadeni jassinajacca huada tojadsapi dsepedeni ihijimana najarajari. Madija dsoqquedsa ppa idsamanahijine naco oppina tani quiquinanajari. ⁴³ Nadsapa viernes dsomebote nadsa odsa panani Arimateahuajicca madija oni Dsodsepa cappinera tadsa tamine Piratodsa huatide toccajari. Puhuapa jodiodenicca ima cacattemadedeni ojaria. Madija huapimapa pohuadsa nahatoqquri najari. Pohua naco Diocca caca-huehetohui najoraha madijari.

Nadsapa tamine Piratodsa bacco tadsa Jeso assire ppa idsahijine huati tajari. ⁴⁴ Naraha Dsodse atti mittadsapa Pirato jabojo najari, –Jeso amadsati huatiahi –quinahi mittadsa. Nadsapa huahua najari soldadodeni taminedsa: –Nija ¿pajissa jidaccadsama dsoqquejarico? –nahi nade

Pirato. ⁴⁵ Nadsapa soldadodenicca taminea: –Jehe, pajissa, dsoqquejaripa –nadsapa Pirato Dsodsedsa: –Jehe, Jeso assire dicca tadsa ppa tidsahijine tiaccajo –nahi nade. ⁴⁶ Nadsapa Dsodse etero dsojorani onini lino, bica tanicca mittade toccajari. Mitta inadsapi Jeso coba dsanaha que tahihuaji tocanajoranijari, Jeso assire dicca inadsa eterodsa jore inaquijari. Nadsapa Jeso assire tonocobirihuaji dsojo inajari. Nanidsa tonocobirijine sibasda hui todsimani najorapojaro. Nahidsa Jeso assire dsojo idsimadsa ibedsajari. Siba imeni pata inanidsa Jeso noccobiri odinihuaji ecossajaro nade. ⁴⁷ Nanidsa Maria Madarenahuajicca, Josecca ami Maria quinarodeni Jeso assire ibedsahi qqui toquinajaro.

Jeso nahatonijari

*Mateo 28.1-10; Roca 24.1-12;
Huano 20.1-10*

16 ¹ Jassinajacca huada jicadsapi Maria Madarenahuajicca, Maria Satiaco imeni, Sarome quinadsa ahua majiconi majoni bica tajaro mittade jai tojajaro, Jeso assire huira inarimanhijine. ² Semana tojapomanicca huada tahidecca domingo dsidsidsamassa maji ssido najonadsa Jeso noccobirihuaji ahua majiconi majoni bica tajaro iaccamanajaro. ³ Nadsapi Jeso noccobirihuaji jai tojadsa imahaha cadsanapojaro: –¿Nejecojari ia acco camapadsaja, Jeso noccobiricca siba imeni pata inanijine? –quinani nade. ⁴ Naraha bacco toquinadsa qqui toquinaneje tonocobiripi tohuabeje najaro. Siba imenipi pajimaranihuajina huitteje



najaro. ⁵Nadsapi jai tojedsimadsa qqui toquinaneje dsabisso eterori nopo taha nahatonihuaji huittari canajari. Nadsapi jabojo quina-jaro nade. ⁶Dsabissopa ponidenidsa huati tajari: —¡Ticappinamana tejeraji! Tiadenipi Jeso Nasareti-huajicca qquide jai tijonajaro. Najaripa ahua porimacossanidsa coba idsanamanadsa dsoqqueraha nahatonijari. Ajadsapa nohue-rahi. Jari, pohua ibedsamanahi-huaji qqui tiquinajo. ⁷Nadsapi jai tijanidsa pohua huatimadedenidsa, Pedrodsa naqui ima huati tinanimanaji. Jesopa titedsejema-deni dsama arobeni Carireahuaji toccanipohuitohui. Nanihuaji jai tijanidsana pohua qqui tiquina-hijine, pina pohua dsoqqe-jaraccadsama tiadenidsa huati tapojarissa najaro —nahi nade dsabisso atti. ⁸Nadsapi amonejedeni jabojomana-dsa tacca-cca-cca quinadsa tonocco-birihuaji domoni qqenadsapi

domoni toccanijaro. Nadsapi jahui domoni ccanidsapi cappinamaneri nadsa Jeso nahatonihicca ima huati toquina-jeraccani nade.

**Jesopa Maria
Madarenahuajiccadsa
ahuatomajari
Huano 20.11-18**

⁹Jesopa semana tojapomannicca huada tahidecca domingodsadsidsamassa nahatonijari. Nahi dsotodepa Maria Madarenahuajiccadsa ahuatomajari. Najaro Mariapi tahideponi bodinidsa tocorime 7 quinaha cajiporaha Jeso dosse ininebaqqujari. ¹⁰Maria Madarenahuajicca Jeso qqui tadsapi pohnadsa jahiridsapo-jaridenidsa huatide joppa nanijaro. Pohnadenipa oji oji camaraha Maria baccanidsa Jeso nahatonihitahimari huati tajaro. ¹¹Poni attinipi: —¡Jesopa camittemanidsa madipa! ¡Pajissa qqui onapa! —nani nade. Naraha poni attinidsa pajissa quina-jarajari.

**Jesopa pohuadsa pajissa
quinajarideni pamahadsa
ahuatomajari**

Roca 24.13-35

¹²Dsotode naco Jeso pohuadsa pajissa quinajarideni pamahadsa ahuatomajari. Pohuadenipa odsa capamema najarohuaji tohuedadsa jahuidsa Jeso bacco quinaraha pohuadenidsa jidsa taccajari. Dsotodena noccodeni jidsera najari. ¹³Nadsapa tohuedanijari. Jesodsa toquejenajaridenidsa Jeso nahatonihicca ima huati tanimanaraha pohuadeni attidsa naco pajissa quina-jaraha nade.

**Jesocca dosseniji pohua
huatimadedenidsa**

*Mateo 28.16-20; Roca 24.36-49;
Huano 20.19-23*

¹⁴Dsotode naco pohua huatimadeni 11 quinajari jipade toquejenahidsa Jeso ahuatomajari. Pohuadenipa: –Jehe, Jeso nahatonihijine pajirahi –quina-jaradsa huaribodeni sibaquiri nadsa Jeso huati icanabaquijari: –¿Nejecotohui occa madijapa onahatonini qqui toquinaraha pohuadeni attidsa pajissa tiquinejararo? –nahi nade. ¹⁵Nadsapa denima huati tajari: –Dsama huapimadsa jai tijaridsaji. Madija huapimadsa otahimari madija tocassiejerahijinecca teccoraridsa-manaji –nahi nade. ¹⁶–Nadsapa madija otahimaridsa pajissa quinadsa passodsa totopa cajimanadsapa tocassiejerahitohui. Naraha madija ohuadsa

pajissa quina-jarajaridenipa Diojine *najidsohue jiquejeranihuaji jai tojahitohui. ¹⁷Ohuadsa pajissa quinarjaridenipa ohua onidsa dsepedeni ijimanadsa canahatorimana canahitohui. Canahatorimana canadsapa Diocca dacorehe ahuaato tanitohui. Jehe, ohua onidsa huati huati toquinadsapa Satanacca dodosse tocorime dosse ininebaquimanahitohui. Tohuatti onihidsa naco huatide nahatoquiri nahitohui. ¹⁸Macca coma tahicca damade pajiramanahitohui. Coma tahicca oni veneno dse quinadsa naco pohuadenidsa comene nohuerahitohui. Madija comaquiri najarideni naco pohuadeni dsepedsa bara quinadsapa totocanomire nahitohui –nahi nade Jeso.

Jeso toccamacossanijari

Roca 24.50-53; Tahimarideni 1.9-11

¹⁹Nadsapa ia Medsede Jeso pohua huatimadedenidsa huati taha jicadsapa memehuaji Dio pohua iaccamacossanijari. Diopa Jeso deni inanadsapa Pohua inori nahatonihuaji inahittaritari, madija ihicadossebaquini nahijine. ²⁰Nadsapa Jeso tahimari icassiejeranijinecca pohua huatimadedeni dsama huapimadsa ecomeraridsa-mananijine jai tojaridsajari. Ecomeraridsa-manadsapi ia Medsede acco icamabaquidsa pocca dacorehema canahatorimana canaridsajari. Nama quinadsapa madijadenidsa Jeso tahimari pajissa ahuaato tajaro. Epejeni.